

35.3.1.14. 150 5
CENSVRÆ
FACVLTATVM
SACRÆ
THEOLOGIÆ
LOVANIENSIS
AC
DVACENSIS.

SVPER QVIBVSDAM ARTICVLIS
de Sacra Scriptura, gratia, & præde-
stinatione Anno D. 1586. Loua-
nij scripto traditis.



PARISIIS,

M. DC. XXXXI.

35.3.I.14



CENSURA LOVANIENSIS.

PRÆFATIO.

REVERENDIS IN CHRISTO

*Patribus, Patri Rectori ac Professoribus ceterisque
Patribus Collegij Societatis Nominis IESV in
Vniuersitate Louaniensi, Decanus & reliqui Theo-
logiæ Facultatis in eadem Vniuersitate Magistri ater-
nam salutem pacemque precantur.*



EVERENDI Patres. Cum nuper ad aures nostras peruenisset, peregrina, offensiva, & periculosa quædam dogmata, circa Dei gratiam, & prædestinationem, in publicis prælectionibus vestris, anno superiori tradita atque asserta fuisse, quæ proinde inter auditores communésque discipulos, dissidia, contentiones, ac partium studia generarent, non id putauimus negligendum. Ne quid tamen leuiter aut temerè credidisse, vel processisse videremur, certis quibusdam Collegij nostri Magistris negotium dedimus, ut perlectis diligenter Professorum vestrorum in hoc argumento dictatis, dispicerent, veranè an falsa perlata

ad nos forent, si quid autem deprehenderent, id fideliter excerptum ad nos referrent. Cum autem quæ notanda putarant, lecta coram nobis fuissent, quanquam cum ijs quæ perlata initio fuerant, valdè consentire viderentur, ne quid tamen diligentia, aut humanitatis prætermissum à nobis videri posset, decreuimus vt selectiora quæque Reuerendis Paternitatibus vestris offerretur, num ea pro vestris agnosceretis, aut si quid non satis dextrè excerptum, aut obscurius fortassis, minusuè consideratè dictum foret, id supplere, illustrare ac emendare dignaremini. At verò vique adeo de priore sententia discessum non est. vt pauculis tantum mutatis verbis. oblatis articuli seu assertiones pro vestris agnoscerentur, approbarentur, & adiecto passim scholio pluribus etiam rationibus confirmarentur. Quo cognito, non potuimus non sane grauius pro causæ ipsius magnitudine commoueri, quando præcipuum illud de gratia Christi ac diuina prædestinatione argumentum tot nouis, imò iam olim reprobatis reiectisque periculosis opinionibus, corrumpi ac iacisci cerneremus, quemadmodum ex subiectis assertionibus vestris, censurisque nostris euidenter patebit. Vt autem præcipuas doloris nostri causas generatim colligamus quatuor potissimum sunt, quas hac præfatione duximus proponendas.

*Quatuor
præcipua
causæ quæ
S. Theol.
Facultatem
mouerunt
vt se huic
doctrina op-
poneret.*

*Causa pri-
ma*

*In scholio
quæst. 4.
§. x.*

In primis quod D. Augustini de gratia & libero arbitrio, deque prædestinatione & reprobatione doctrinam, in qua tuenda, explicanda, ac illustranda tot annis, tot editis libris, tanta diligentia atque instantia virtanto ingenio, tanta sapientia, tot Dei dotibus tam excellenter ornatus, iam æui maturus ac senex pro Dei Ecclesia desudauit, non in aliqua, vt dicitis, sui particula, sed totam propemodum ex proposito oppugnari, funditusque destrui ac euerti videmus. Ac in B. Augustini scriptis quid tandem est, quod eum Ecclesiæ Dei tam gratiosum, venerabilem, ac suspiciendum hactenus reddidit, quam hæc ipsa de gratia & Dei prædesti-

natione doctrina? Quam ei laudem & gloriam si quis eripiat, nā is præcipuum illi decus, & quasi fidem ac coronam capitis detraxerit, vt ob cætera non sit cur eum magnoperè admiremur. Si verò in tanti momenti argumento explicando vel lapsū fuisse, vel non rectum ac necessarium tenuisse modum existimabimus, non modò eius labascit in cæteris auctoritas, sed, quod fidenter dicimus, multum quoque ac turpiter falsa erit, atque aberrauerit Ecclesia quæ illius ductum iudiciūque secuta inimicos gratiæ Christi debellasse sese, ac triumphasse de illis crediderit. Quod sanè vel cogitare nefas ac impium fuerit: vt hanc aduersus Augustinum criminationem non ad ipsius modo, sed totius etiam Ecclesiæ & Apostolicæ sedis non minimam pertinere existimemus iniuriam, cū in huius argumenti arena, tantum ei non dubitarit tribuere; quantum contra Valentinianos & Gnosticos Irenæo, contra Arrianos Athanasio atque Hilario, contra Nestorianos Cyrillo, dēnique contra Euthychianos Leoni Pontifici, fideles semper omnes tribuerunt; vt quemadmodum isti aduersus supradictos hæreticos diuinitus sunt excitati, ita B. Augustinus contra gratiæ Dei inimicos singulari prouidentia destinatus, cuius ductu atque auspiciis Catholica acies pugnaret, ac vinceret. Vnde ipsius etiam defuncti auctoritatem & famam aduersus tum eius, tum gratiæ Dei oppugnatores Celestinus Pontifex tuendā suscipiens, tantū illi perhibet scientiæ testimonium, vt non modò illum dicat *necessarium inscribendo non excessisse modum, nec nullo vnquam sinistre suspicionis vel rumore saltem fuisse aspersum*, verum etiam *inter optimos Ecclesiæ Magistros à suis semper antecessoribus habitum, qui proinde cunctis & amoris & honoris fuerit, meminisse se assueverit.* Quod Apostolicæ sedis tam luculentum elogium est, vt aduersus calūniatores eius omnes, vel vnum abundè sufficiat, neque necesse sit cæterorum Ecclesiæ Patrum, quas in eum congerere non dubitârunt, accumulare hic laudes, quando vnum illud instar sit omnium. Quare

*Epistola ad
Episcopos
Galliæ 2.
& 3.*

intolerabile vobis visum, quod non solum aduersus Pelagium, & eius hæredes, infeliciter laborasse Augustinus fingitur, sed idem quoque de Lutheranismò ac Calvinismò suspectus redditur, tanquam imperitus, stupidus, ac cæcus habetur, vt non modo gratiæ ipsius, de qua dislerebat, vim naturamque nescierit, sed nec arbitrij humani libertatem, ne monitus quidem, dogmate suo euertere se senserit. A qua hæreticorum & veterum, & nostræ tempestatis sententia & argumentis, si non potest Augustini doctrina vindicari, grauissimè profectò & à sede Apostolica, & cæteris Ecclesiæ proceribus peccatum est, qui B. Augustini vigilias, labores atque doctrinam, tam magnificè prædicauerint, cum tanquam periculosam, perniciosam, & hæreticam arguere potius damnareque debuerint. At verò quid Ecclesiæ Dei calamitosius luctuosiusq; accidere queat, quid verò hæreticis gratius, iucundius, aut optabilius, quam vt aduersus Catholicos, vel in hoc vno dogmate, stare pro ipsis, etiam nostra confessione tantopere laudatus Augustinus putetur? Nam hoc concesso, quis non videat quanta illi virium accessione firmentur, Catholici verò quanti præsidij iactura debilitentur? Prement nos illi auctoritate viri huius, quæ in Ecclesia Dei maxima semper hætenus fuit: quam tamen aduersus eos quâ nos fronte vel in cæteris opponemus, quando tam graui ac indigno errore tam infirma, immò fracta & vilis effecta sit? Dispiciant igitur Reuerendæ Paternitates vestræ, quam rectè se credant obistere facilius hæreticis posse, si contempto & damnato Augustini dogmate, & auctoritate tam grauiter labefactata, diuersam aduersamque illi in gratiæ ac prædestinationis negotio doctrinæ rationem sequantur. Nam emplastrum illud quod post^a Massilienses, ^b Catharinum, ac ^c Pighium, tam grauiter saucio & attrito Augustini capiti apponere tandem conamini, videlicet eius vos viri doctrinam, hoc vno excepto, plurimum suspicere & admirari, eamque in cæteris omnibus au-

^a Hilar. ep.

^{ad} Aug.

^b In cap. 9.

^{ad} Rom.

^c lib. de lib.

arb.

dire libenter ac sequi paratos, quàm miserum ac euandum sit, atque ad mitigandam duntaxat inuidiam comparatum, quis non intelligat?

Et quasi non hæc satis atrocia sint, nouum quoddam ab Oriente bellum Augustino conflat, ut Græci Patres omnes in supradicto argumento, & scripturis huc pertinentibus explicandis, diuersam ab eo discipulisque ipsius sententiam tenuisse inducantur, ut in præcipuo fidei articulo oriens & occidens dissidere inter se existimetur. Quod quàm periculosè perniciosè dicatur, etiam nobis tacentibus, facile quiuis intelligat. Sed absit, ut Ecclesiæ Patres, per quos vnus idemque, non dissensionis, sed concordie locutus est spiritus, pugnantes in fide minimèque concordēs, ut in cæteris, ita & in hoc argumento sententias habuisse suspicemur; cùm in damnanda Pelagii ac sectatorum eius doctrina, ut occidentalis Ecclesia Augustini, ita orientalis in Ephesina Synodo Celestini Romanæque Ecclesiæ sequuta iudicium sit. Quomodo ergo pugnare illorum inter se putantur sententiæ? Et est quidem ita, quòd veteres Græci contra sui temporis hæreticos Manichæos, differentes paulo aliter interdum locuti, ac scripturas nonnullas tractasse reperiuntur, quodque nondum exorto, vel manifestato Pelagio, quid de gratia ac prædestinatione Dei sentiendum esset, non tam apertè disertèque explicarint, sed contraria tamen atque aduersa tradidisse nusquam deprehenduntur. Quamquam ad hanc ipsam obiectionem ipse iam olim etiam Augustinus abundè respondit.

*Secunda
causa.*

*Lib. de prædest. sanct.
c. 14.*

Mirum verò quid ita visum sit non hanc modo, sed cæteras etiam penè omnes Massiliensium, aliorumque eidem huic B. Augustini doctrinæ per Gallias olim obstrepentium querelas, post Catharinum ac Pighium, de integro renouare, ac suscitare, quas tamen à sede Apostolica per Celestinum Pont. repressas, coercitas, castigatas, & æterno constare esse damnatas silentio? ut autem palam fiat non alia B. Augustino à vobis obiici, nec

*Tertia
causa.*

*Epistola ad
Episcopos
Gallia.*

diuersas esse vestras de doctrina eius quere monias, quam quas olim Prosper atque Hilarius ad ipsum primum Augustinum, deinde ad Celestinum Pontif. retulere, breuiter eas ex ipsorum scriptis collectas proponemus.

*Masilien
sum cont. B.
Augustini
doctrinam
querela.*

1. Et primum quidem quod quicquid B. Augustinus in scriptis suis aduersus Pelagianos editis de vocatione electorum secundum Dei propositum disputasset, totum id Patrum opinioni, ac sensui Ecclesiastico esset aduersum.

2. Ad hæc quod scripturæ, quas ex Pauli ad Rom. Epistola ad manifestationem diuinæ gratiæ electorum merita præueniētis proferret, aliter ab aliis scriptoribus intellectæ forent, qui omnes vna sententia propositum, & prædestinationem Dei secundum præscientiam acceperunt.

3. Per præuenientis seu præoperantis Dei gratiæ, ac prædestinationis doctrinam liberum arbitrium tolli.

4. Sub prædestinationis eiusdem nomine, absolutam necessitatem induci.

5. Augustini doctrinam, de gratia humanos omnes præueniente conatus, audientium ædificationi esse contrariam.

6. Si omnia bona opera Deus in nobis operetur, meritum omne nostrum excludi.

7. Dei constitutio si humanas præuenire cum Augustino ponatur voluntates, omnem remoueri industriam, virtutesque tolli.

8. Quod Augustini de prædestinatione & reprobatione doctrina lapsis curam adimat resurgendi, sanctis adferat torporis occasionem, eo quod in vtramq; partem superfluous labor sit, si neque reiectus vlla industria possit intrare, neque electus vlla negligentia excidere.

9. Quod ea res desperandi necessitatem iniiciat.

10. Quod præceptis etiam & exhortationibus aduersetur.

11. Quod cum propitiatione quæ in sacramento sanguinis Christi vniuersis hominibus sine exceptione proposita est, non satis consentiat.

12. Postremò paruulorum causam non rectè in hoc argumento ad exemplum ab eo maiorum adferri. Sanè non alia ferè in scriptis dictatisque vestris aduersus Augustini doctrinam argumenta videmus opponi.

Iam verò ad eorum quod attinet sententias & opinioniones, quam exceptis paucissimis non procul ab eis discèdere doctrina vestra videatur, aduertere quæsumus paulisper dignemini.

*Masilien-
sij sententia
ac opinionæ
huc perti-
nentes.*

1. Et initio quidem volebant eligendorum ac reijciendorum discretionem non ex Dei vocantis pendere proposito, sed ex præiudiciis cuiusque operibus ac meritis. Præiudicasse enim Deum quinam credituri, & in suscepta fide permanfuri essent, qui non essent; eos itaque in regnum suum prædestinasse, quos gratis vocatos dignos electione futuros, & de hac vita bono fine excessuros præiudicet.

2. Certum electorum numerum qui nec augeri, nec minui possit, præordinatum à Deo non esse.

3. Quantum ad Deum pertinet, paratam æqualiter omnibus vitam æternam, eos autem apprehendere qui Deo spontè crediderint, & auxilium gratiæ merito credulitatis acceperint.

4. Credendi possibilitatem ex Deo cuique esse, fidem seu credendi voluntatem ex seipso.

5. Ad Dei cognitionem, mandatorum obedientiam, regenerationis gratiam, posse quemque peruenire per naturalem facultatem petendo, quærendo, pulsando, ut idè accipiat, idè inueniat, idè introeat, quia bono naturæ benè vsus ad istam saluantem gratiam meruerit peruenire.

6. Quod Dei gratia humanam non præueniat, sed sequatur voluntatem, ut non idè velit quia adiuuetur, sed idè adiuuetur quia prius voluerit.

7. Per gratiam Dei non opus ipsum, sed operistan-

tum possibilitatem donari.

8. Perseuerantiæ donum in hoc generaliter positum non quo perseuerans quisque fiat & sit, sed esse possit si velit.

9. Sanctis omnibus perseuerantiæ munus donari.

10. Perseuerantiam semel donatam amitti posse.

11. Non aliam nec potentiorē nunc electis perseuerantiā dari, quam primis hominibus collata fuerit. Has fuisse olim Massiliensium aliorumque quorundam per Gallias inter cetera opinionationes quas aduersus Augustinum retinendas putarent ex Prospero atque Hilario intelligi potest, cum quibus utrum nihil habeatis commune, quæsumus prudentia vestra etiam atque etiam dispiciat. Nam quod in eius rei adfertis argumentum, fidem illos Dei donum negasse, vos esse fateri, equidem (videt etiam vobis doneimus) prorsus non satisfacit, videris enim quam alia multa supersint à quibus adhuc vindicari habeatis. Et tamen ut quod sentimus dicamus ingenuè, nec in illa parte multum videmus discriminis. Nam fidem quidem illi ex possibilitate volebant existere naturæ, ita tamen ut non solum externæ prædicationis beneficium, sed nec internam quidem illuminationem ac reuelationem diuinæ veritatis neque propositis præmiis, nec poenis excitationem, ac pulsum exclusum voluerint, quando ea negare nec Pelagius potuit, quo tamen non obstante, Dei donum esse fidem, negare iudicati sunt. Ex quo autem alio capite eam Dei donum vestra faciat sententia, equidem non satis intelligimus, nisi quod sub præueniente ac excitante vestra gratia scrupulos etiam conscientiae (quod tormentum homines etiam inuiti sentiunt suppresseréque conantur) & velleitates quasdam seu imperfecta quædam emendandæ vitæ comprehendatis desideria. Sed quæ nimirum omnia cum ipso erroris ac infidelitatis dominatu consistunt, quo fiat ut veram saltem erroris ac infidelitatis depositionem, atque ipsam ad credendum voluntatis determinationem

q. 48 + 5. 1.

Apud Augustinum lib.
de gratia
Christi c. 7.
10. & 11.

humani tantum arbitrij facere videamini. Nam con- *Vide plura
inferius ad
asseriones
8. 9. 10.*
comitans gratia quam in auxiliante concursu colloca-
tis, nec conuersionem ipsam nec velle tribuit, sed adest
tantum ad cooperandum paratis, sed vt dicitis, si prius
ipsi voluerimus quem concursum non putamus, nec Pe-
lagium fuisse negaturum. Quare omnibus benè consi-
deratis, nec in hac quidem parte satis videmini à Massi-
liensibus recedere, neque in alio differre, quam quod
præter interiorem prædicationem ac Dei pulsus im-
perfecta quædam boni desideria, ac velleitates inter-
dum quasdam superaddatis. Quæ quam paruo discrimi-
mine ac intervallo distent, per communem quæsumus
salutem aduertere dignemini. Iam verò quando & in-
fideles omnes etiam obduratos & excæcatos satis ad
conuersionem auxilij semper & vbique habere vultis,
ad quam vtrique in primis necessaria fides est, vt si face-
rent quod ex naturali dispositione possunt, non de futu-
rus sit eis illuminator & adiutor Deus vt credere & con-
uerti possint, an non & fidem ipsam secundum initia
saltem sua ex quadam voluntatis sanitate & possibili-
tate deducitis?

Quam verò tum hæc tum superiora omnia & pericu- *Quarta
causa.*
losa & vt liberius loquamur perniciofa sint, velimus
prudencia vestra pressius consideret, deprehensuram
speramus ex his doctrinæ fontibus pestiferos istos ma-
nare riuulos. Dei gratiam secundum merita nostra da-
ri, fidem, conuersionem, bona opera, ac in eis perseue-
rantiam nostrarum esse propriè virium. Ex lege esse ius-
titiam. Non esse orationem magnopere necessariam,
in toto salutis nostræ negotio quod præcipuum est ho-
mini tribuendum, quod minus est Deo. (Quis enim
non videat præstantius esse ipsum fidei, conuersio-
nis, bonæ vitæ ac perseuerantiæ opus, quam solum hoc
posse & huc excitari) Item in opere gratiæ priores ho-
minis esse partes, posteriores Dei. Quemque sibi du-
cem esse ad bonum, pedisequum ac subseruientem es-
se Deum. Denique fas esse iam non in Domino sed in

seipso gloriari. Immo quod ex istis conficitur ad præcipuos salutis effectus gratis esse mortuum Christum. Atque id totum propterea, quia verè atque efficacis gratiæ Christi cum libero arbitrio iniri putetur non satis posse concordia. Quæ res quum visa semper fuit esse difficilis, & credi tamen interea concordiam necesse foret, etiam si humano ingenio minus id plenè comprehendere posset, queri studiis vestris ille magis videtur modus qui ad humanum sit captum plausibilis, quam secundum scripturarum doctrinam solidus. Sed hæc de iustissimi doloris nostri causis generatim dixisse sufficiat, cætera in assertionum censuris particulatim latiusque persecuturi sumus. In quibus tamen assertionibus colligendis, & refutandis quoad fieri potuit, proposita nobis breuitas fuit. Nam qui omnia exactè notare, deque singulis censere vellet, iusto erat volumine opus. In excerptis autem recitandis, ea fide vsi sumus quanta maxima adhiberi à nobis potuit, quin & loca scriptorum indicauimus vnde repetita quæque forent, vt si quid aliter, aut clarius in codice legi existimeretur inspicendi eius facultas esset. Nam vt tota huc disputationes transferremus neminem futurum arbitramur, qui postulandum hoc à nobis, aut expectandum putârit. Cæterum de Scriptura sacra assertiones aliquot vestras tametsi posterius seriùsque ad nos perlatas, non tamen esse putauimus absque censura dimittendas, eas igitur, ordinem tractationis secuti, ad responsi nostri caput adieciimus.

Quod autem superest Reuerendi Patres, obsecramus vos in Christi visceribus, vt rem hanc totam, seposito paulisper anticipatæ opinionis præiudicio, liberis animis intueri seriòque expendere dignemini, vt si fieri queat in tam magno fidei nostræ de gratia Christi ac Dei prædestinatione negotio vnum idemque concorditer sapiamus, eo magis quod (vt idem de Massiliensibus queritur Prosper) eadem aliquando nobiscum melioraque senseritis. Neque enim de studiosorum exci-

dit memoria quænam Reuerendi Patres Robertus Belarminus ex eadem cathedra vestra de his ipsis argumentis nuper & senserit & publicè docuerit, vestro nunc dogmatiplanè aduersa atque contraria, in quod iisdem cum Massiliensibus de libero arbitrio moti argumentis abduci vos passi estis, quod quam grauiter prudenter ac circumspectè factum à vobis sit, Massiliensium docere vos potest exemplum. Nam vt liberi arbitrij, cum vera Christi gratia conciliationem difficile fuerit ad popularem captum, intelligentiàmque deducere, non tamen moueri quenquam hinc oportebat, sed meminisse potius Prophetici dicti. *Nisi credideritis non intelligitis.* Equidem valdè dolemus pietatem vestram Domini Nostri IESU nomen titulumque præferentem, gratiæ ipsius (vt nobis sanè videtur) obscurare gloriam eiusq; vim & efficaciam enervare. Et cum de Christianorum moribus optimè sitis hætenus promeriti, non parum veremur, ne si in suscepta semel doctrina ista perseueretis, eius contagio plurimum sitis obsuturi, & qui bonæ vitæ exemplo multos ædificastis in Christo, dogmatis iam huius magisterio plerosque malè vobis credulos in ruinam quod absit exitiùmque præcipietis. Cæterum libertatem in dicendo hîc nostram cum Christiana tamen vti speramus charitate modestiâque coniunctam, rogamus vt æqui bonique consulere dignemini, nam causæ ipsius & æquitas & magnitudo hanc prorsus visa nobis est loquendi postulare fiduciam, vt remissos hic, & flaccidos esse iusta non potuerit reprehensione carere. Si quid autem erit in quo putabitis non satis esse vos à nobis intellectos, nec id doctrinam habere vestram, quod nostra illic Censura reprehendit, gratissimum erit si scripto vicissimaliquo mentem vestram clarius explicueritis, vt enim solis inter nos verbis & dicendi explicandique modo differamus, in re autem ipsa consentiamus, vnicum id votum nostrum maximumque fuerit.

ASSERTIONES QVÆDAM EX publicis prælectionibus Reuerendorū Patrum Societatis nominis IESV anno 1586. in Vniuersitate Lovaniensi habitis, verbatim excerpta & ab ipsis ibidem Professoribus pro suis agnitæ, comprobata, scholijsque illustrata, quæ Sacræ Theologiæ ibidem facultati offensivæ, & ex subiectis rationibus improbanda videntur.

ET PRIMVM DE SCRIPTVRÆ
SACRÆ ASSERTIONES.

*Excipiis
tribus de
Scripturæ
assertioni-
bus, quæ
quia ferius
ad Facultatem
allata
fuerunt, ex-
hiberi cum
cæteris non
potuerunt.*

1. **V**T aliquid sit Scriptura Sacra, non est necessarium singula eius verba inspirata esse à Spiritu sancto.
2. Non est necessarium, vt singulæ veritates & sententiæ sint immediatè à Spiritu Sancto ipsi scriptori inspiratæ.
3. Liber aliquis (qualis fortè est secundus Machabæorum) humana industria sine assistentia Spiritus sancti scriptus, si Spiritus Sanctus postea testetur ibi nihil esse falsum, efficitur Scriptura sacra.

CENSURÆ.

Tres istæ assertiones accedere videntur ad damnatam olim Anomæorum opinionem, qui Prophetas & Apostolos in multis volebant vt homines fuisse locutos, vt refert Epiphanius hæresi 76. & ad eorum Sententiam quam præfatione in Epistolam ad Philemonem & alibi D. Hieronymus reprehendit, de qua & notatus Erasmus fuit. Nec immerito quidem, siquidem

Scriptura sacra eaque tota non hominum, sed Dei est verbum à Spiritu Sancto vt Tridentina Synodus ait dictatum. Vnde Petrus Apostolus, *Omnis inquit Prophetia scriptura propria interpretatione non fit, Non enim humana voluntate (vt addit) allata est aliquando Prophetia, sed Spiritu sancto inspirati locuti sunt sancti Dei homines.* Similiter & Paulus Apostolus, *omnis scriptura diuinitus inspirata.* Quo fit vt veteres Patres Sacrorum scriptorum linguas & manus non aliud quam Spiritus sancti calamos fuisse testentur. In quorum proinde scriptis certam quandam eloquendi facultatem propriumque texendi sermonis modum B. Augustinus agnoscit, vsque adeò vt regietiam hic eodem teste mentem suam plus vtique nobis, illi ipsi sentirent.

Sess. 4.

2. Petri. 1.

2. Tim. 3.

Aug. lib. 1.

de conf.

Euang. c.

vlt. Greg.

praf. in Iob.

Thiod. praf.

in psal. lib.

12. conf. c.

26. lib. 6.

de conf.

Euang. c. 7.

De Prædestinatione & Reprobatione.

ASSERTIO I.

Augustinus definit, quod Prædestinatio est præscientia, & præparatio beneficiorum Dei, quibus certissime liberantur quicunque liberantur. Quæ definitio valdè bona est, si intelligatur de prædestinatione hominum, quæ supponit seruitutem & peccatum & de certitudine ex præscientia non ex mera præordinatione.

De dono
perseu. c. 24.

CENSURA.

Hic commentarius Massiliensium videtur renouare sententiam, qui Dei electionem ex meritorum esse volebant præscientia, quam B. Augustinus loco supradicto refellendam sibi proponit. Quare peruerit & supradictam Augustini definitionem. Constat enim ex antecedentibus ipsius verbis loqui eum non de conditionata præscientia, qualem in prædictis verbis Patres intelligunt, si videlicet acceptare gratiam & per-

seuerare voluerint, sed de præscientia eorum quæ ipse facturusest, quæ propterea se facturum præsciuit, quia facere sine conditione voluerit, sicuti absque conditione facturum se absolute promisit, & propterea quicumque secundum æternam Dei prædestinationem de massa perditionis liberantur, ideo certissime liberantur, quia gratiæ suæ beneficiis liberare illos Deus decreuerit, faciendo non solum vt possint si velint, sed faciendo etiam vt velint & faciant, idque perseueranter vsque in finem. Eiusmodi sunt enim promissiones Abrahæ & semini eius electisque noui testamenti filiis apud Moysen, Ieremiam, Ezechielem, atque alibi factæ, vt eruditè prosequitur B. Prosper lib. 4. de vocat. gen. c. 9.

Gen 12.
Ier 31
Ezech. 36.

ASSERTIO II.

Deus post præuisum peccatum originale habuit voluntatem dandi Adamo & toti eius Posteritati sufficientia media contra peccata, & auxilia ad consequendam vitam æternam, ergo dat illis sufficiens auxilium vt possint reuerti.

CENSURA.

Quamuis locutio de sufficienti auxilio tolerari & excusari aliquo sensu possit, quia videlicet nunquam Dei beneficia mundo defuerint, quibus si adulti bene vsi fuissent peruenire ad salutem potuissent, proprie tamen & exacte loquendo, quia (vt & ipsi fatentur) id solum sufficit præter quod aliud necessarium non est, rectius veriusque dicitur non fuisse toti Adæ posteritati sufficientia ad salutem auxilia data, imò ne Iudæis quidem sub veteri adhuc testamento constitutis: Non enim dicendum est legem eis ad iustitiam suffecisse, quam propter infirmitatem ac inutilitatem suam reprobata fuisse Apostolus testatur, quâ tamen si bene vsi Iudæi fuissent

c 4 q. 3. in
excerptis
§. 1.

Hebr. 7.

fuisſent ad ſalutem peruenire potuiſſent.

ASSERTIO III.

Tota ſcriptura plena eſt præceptis & exhortationibus, vt peccatores conuertantur ad Deum: Atqui Deus non præcipit impoſſibilia, ego ðat illis ſufficiens auxilium vt poſſint conuerti.

CENSURA.

Secus Tridentinum Concilium *Deus* inquit, *impoſſibilia non iubet, ſed iubendo monet & facere quod poſſis, & petere quod non poſſis.* Sentit ergo ad Dei implenda mandata non habere ſemper omnes ſufficiens auxilium, vt quiſquis hoc ſibi deeſſe ſenſerit, petere admoneatur quod nondum accepit. Cui ſimile eſt & illud Proſperi, *ideò dari præceptum vs præcipientis queratur auxilium.* Ex quo intelligi poteſt, vt nihil præcipi dicatur impoſſibile, ſatis eſſe vt in Dei virtute ac bonitate ſufficiens ſit paratum auxilium, quò impleri quod iubetur poſſit, etiam ſi nullum adhuc eius habeatur beneficium quod dici ſufficiens queat. Nam quantumcúmque in Dei hoc repositum potentia ſit, & ex eius bonitate petentibus paratum, quandiù tamen donatum acceptumque non eſt, dici nondum poteſt haberi.

*Epistoła ad
Demetr.*

ASSERTIO IV.

Dices Deum quidem omnes vocare ad pœnitentiam, ſed non ſecundum propositum, aut non illa vocatione, quæ eſt ſine pœnitentia.

Reſpondeo, hoc videtur alienum à bonitate Dei quia non hoc eſſet ſeriò, ſed deluſoriè vocare, ſi vocaret aliquem non ex intentione vt conuertatur. Auguſtinus autem (vt in ſcholio additur) propositum Dei accipere videtur, vt idem ſit quod illo modo quo nouit illum ſecuturum.

CENSURA.

Nulla Dei vocatio delusoria est, neque enim alia sit vlla intentione ac fine quam vt conuertatur quisque aut conuerti possit. Non enim vocatur quisquam à Deo, nisi vt sic adiutus & commonitus conuerti possit ac debeat, & si vocanti non obtemperet, inexcusabilis habeatur. Seria ergo omnis Dei vocatio est. Docetur tamen ab Augustino iuxta doctrinam Apostolicam, quod non omnis Dei vocatio secundum æternæ sit prædestinationis propositum, quemadmodum clarissimè expressissimèque scribit lib. 1. retract. c. 23.

Non omnium inquit qui vocantur vocatio est secundum propositum, sed tantum electorum, quia non omnes sic vocantur vt eis sit ad æternam salutem profuturus vocatio. Multi enim vocati, pauci verò electi, & crediderunt Paulo qui præordinati erant ad vitam. Commentarius autem ille de intellectu Augustini prorsus nec ipsi, nec Apostolo congruit. Non enim hoc est vocari secundum Diuinæ voluntatis propositum, sed secundum nudam præscientiam eamque conditionatam, quomodo etiam multi non electi vocantur, neque hoc tam est secundum Dei propositum vocari, quam hominis, quod præscit Deus.

Lib. 2. cõs.
duas Episto-
las Pelag. c.
9 de corr. &
gratiæ 7.
de prædest.
sanct. c. 16.

ASSERTIO V.

Iubentur omnes baptizari, ergo Deus quantum in ipso est vult omnibus dare gratiam baptismi.

CENSURA.

Argumentum nullius momenti, sicut enim non vult Deus dare omnibus gratiam suam voluntate beneplaciti; ita non vult omnes nec baptizari. De illa enim scriptum est voluntate. *Omnia quacunque volui feci in cælo & in terra.* Non ergo aut baptismus aut gratiam dees-

Psalm. 134.

se cuiquam passus fuisset, si ea bona sic omnibus voluisset. Baptizari autem vult omnes voluntate signi quæ in præcepto est, quod post promulgationem non obligat nisi adultos. Quod autem huius prædicationis ministerium non omnibus populis ne noui quidem testamenti tempore semper adhiberi voluerit, patet ex actis ubi Paulus & Syllas vetantur à Spiritu Sancto verbum Dei in Asia loqui, & cum tenarent ire in Bythiniam, non permisit eos Spiritus IESU. Quomodo baptizari ergo tunc eos voluit, quibus ne predicari quidem permisit?

Act. 16
Prosp. Epi-
stola ad
Ruffin. &
resp. ad 4.
oblat. 8.
Galierum.

ASSERTIO VI.

Hunc locum Deus vult omnes homines saluos fieri, id est, vult omnes saluos fieri qui salui fiunt, non videtur exponere Augustinus secundum intentionem Apostoli, & sex ampliusque argumentis dicta interpretatio oppugnatur.

1. Tim. 2.
Epistola 107
De prædest.
sanct. c. 8.

CENSURA.

Mirum cur, dissimulatis aliis pluribus loci huius apud Augustinum interpretationibus, vna hæc potissimum accepta sit, quæ tam operose oppugnaretur, nisi quia forte ad expugnandum visa opportunior est, quæ euersa, alteri quæ Massiliensibus potissimum placuit certior aditus muniretur, eaque deinde periculo dogmati fundamentum sterneretur: Cum tamen illa ipsa Augustini interpretatio nec à scripturarum sit consuetudine aliena, nec sensui Apostolico male congruat. Cum enim pro omnium salute fundi orationem B. Paulus voluisset, quid inconueniens si hoc ideo faciendum subiunxit, quia Dei donum sit hominum conuersio, & nemo saluus fiat, nisi quem ille saluum gratiæ suæ proposito fieri voluerit. Propterea enim pro infidelibus ut conuertantur orat Ecclesia quia fidem & penitentiam à Dei dono & gratia pendere non dubitat. Sed neque hanc expositionem (ut scholium adieci

*Ezech. c. 103
de cor. c.
gratia c. 14.
c. 15. lib. 2.
de vocat. ger.
c. 25.*

significat) vel D. ipse Augustinus vel Prosper tanquam minus consentaneam vsquam corrigit, tamen B. Augustinus, ut paulo ante indicabamus, alias plures proponat, & Prosper sic alicubi locum tractet, ut ad omnes pertinere possit, sed quo ad generalem quandam Dei benignitatem, non autem specialem, ut loquitur, Dei misericordiam.

ASSERTIO VII.

Deus voluit dare Christum in redemptionem pro omnibus nullo excepto, ergo omnibus præparavit sufficientia remedia per Christum. Prob. conf. quia eatenus est Christus omnium Redemptor, quatenus per ipsum dantur omnibus sufficientia auxilia quibus resurgant à peccatis, si enim non darentur sufficientia, verus non esset eorum redemptor, quia neque quoad sufficientiam, neque quoad efficaciam.

CENSURA.

Non dissimilis erat olim Massiliensium ratiocinatio, sed cui sic respondendum, Christus Redemptor est omnium quoad pretij sufficientiam, quia merito sanguinis eius omnes à peccatis liberari possent si crederent. Non est autem redemptor omnium secundum efficaciam, quia non omnibus per eum datur ut credant, ut enim infidelis credat præter prædicationis beneficium, necessarium est gratiæ specialis donum, quo fiat ut prædicationi consentiat.

ASSERTIO VIII.

Ut peccator possit conuerti non est necessarium ut recipiat utrumque auxilium (præueniens scilicet & concomitans) in actu secundo, sed satis est ut accipiat auxilium præueniens in actu secundo, & tunc ve-

rè habet auxilium sufficiens ad actualem conuersionem.

CENSURA.

Hæc assertio & scripturarum & D. Augustini de speciali Christi gratia doctrinam videtur euertere, quæ habet, cor lapideum per eam gratiam auferri, & car-necum tribui, nec solam possibilitatem sed ipsam vol-untatem operationemque conferri. Nam excitans il-la gratia quæ in assertione per præueniens auxilium in actu secundo intelligitur, non aliud est, quam interior quædam Dei suasio, quæ ut vehementior sit, magisque quam exterior commoueat, & imperfecta quædam de-sideria seu velleitates excitare possit, cordis tamen con-uersionem non operatur, quin consistere cum eâ gratiâ tota ipsius cordis durities rebellioque potest. Suadet ergo tantum, non persuadet, adiuuatque, sed hæcenus tantum ut benefacere quisque possit si velit, non autem ut absolutè velit ac bene operetur bonusque ex malo fiat. Non igitur specialis hæc Christi est gratia, cui pro-prium id esse euidentissimis verbis Augustinus scribit, ut non sit bonis malisque communis, sed bonos discernat à malis, atque ut alibi ait, à duro nullo corde respuatur, quoniam per eum ipsa cordis durities auferatur. In quâ fideliter agnoscendâ, quid a Pelagio idem olim po-stularit, opera pretium fuerit ex eius hic verbis subiice-re. *Quantum attinet*, inquit, *ad istam de Diuina gratia & adiutorio questionem*, tria ista quæ Pelagius aperissimè di-sinxit, attendite, posse, velle, esse, id est, possibilitatem, vol-untatem, actionem: si ergo consenserit nobis, non solum possibi-litatem in homine, etiam si nec velit nec agat benè, sed ipsam quoque voluntatem & actionem, id est, ut bene velimus & bene agamus, quæ non sunt in homine nisi quando vult, & benè agit. Si ut dixi, consenserit, etiam ipsam voluntatem, & actionem diuinius adiuuari ut sine illo adiutorio nihil bene velimus & agamus, eamque etiam gratiam Dei per Iesum Christum D. N. in qua nos sua, non nostra iustitia iustos sa-

De predesti-
sanit. c. 5.
ibid. c. 8.

De gratia
Christi c. 47.

cit, ut ea sis vera nostra iustitia qua nobis ab illo est, nihil de adiutorio gratia Dei, quantum arbitror inter nos controuersa relinquetur.

ASSERTIO IX.

Concomitans concursus specialis seu supernaturalis ita præparatus est peccatori, sicut concursus naturalis & generalis præparatus est potentia naturali, verbi gratia potentia videndi; & infra Deus non dat ipsa opera bona, nisi quatenus per gratiam præuenientem dat nobis auxilium sufficiens & paratus est dare concursum gratia concomitantis in actu secundo si velimus.

CENSURĀ.

Hæc assertio specialem cooperantemque Christi gratiam quam nobis scriptura commendat, & de qua Augustinus disputat, obscurare conatur per concomitantem quendam concursum quem specialem seu naturalem appellat generali & naturali similem, cum istud quaecumque concomitans auxiliū bonam ipsam voluntarē operationemque non tribuat, non magis quam generalis ille concursus videre vel ambulare nos facit, nisi videre ipsi ex nobis ambulareque voluerimus. Deinde concomitans istud auxilium, etiam ante lapsum, primis fuit hominibus necessarium sine quo adeoque nec Angeli quidem sancti etiam si vellent perseverare possent. Vbi ergo illa est propria lapsum gratia quam Paulus prædicat operantem in nobis velle & perficere? quam Propheta commendat cor auferentem lapideum & carneum tribuentem, facientem ut faciamus & in præceptis diuinis ambulemus? Non ergo concursus ille diuinus ea Christi gratia est quam nobis Prophetica scripta promittunt atque Evangelica commendant. B. sanè Augustino nè per somnium quidem vnquam in mentem venit, Nec tam mentis inopem fuisse putamus Pe-

Philip. 2.

Ezech. 36.

lagium, vt hoc diuini concursus concomitans auxilium ad bona opera omnia necessarium fuerit negaturus. Cæterum quod istud concomitans auxilium coloris causa velut speciale quiddam & supernaturale commendatur, frustra id ac superflue fit, cum generalis ille diuinæ prouidentię omnia comprehendentis concursus ad supernaturales etiam virtutum effectus, nè in ijs producendis frustraneus sit efficacis voluntatis conatus, abundè sufficiat, per quem vt videre possumus & ambulare si volumus, cur non & credere benèque operari si velimus?

ASSERTIO X.

Augustinus vbi cūque dicit nos non tantum gratiā egere quā possumus, sed etiam quā faciamus, intelligendus est de supradicto concomitante concursu, quod scilicet non possumus facere sine auxilio gratiæ concomitantis, alioqui dictum eius non esset vniuersaliter verum. Nam vt faciamus non requiritur efficax excitatio quę voluntatem infallibiliter determinet, qualis forte fuit in Paulo, Magdalena, alijsque nonnullis dum conuerterentur; sed sufficit multo minor, quæ plenissimam relinquat libertatem.

CENSURA.

Ridiculum est B. Augustinum de hoc naturali seu vt ipsi appellant supernaturali concomitante auxilio interpretari velle, quo præstetur duntaxat nobis posse si velimus aut etiam velle si voluerimus, non autem præueniendo nos, operetur vt velimus & faciamus. Quasi in hac nostra infirmitate non vniuersaliter tam efficacē Dei gratiam postulet Augustinus, quæ humanam voluntatem infallibiliter determinet, quæque præponenda vt Domina sit, non autem libero arbitrio subijcienda quasi pedissequa, & subseruiens si velit. Plana quippe

Cap. 12.

est eius doctrina lib. de corrept. & gratia ubi talem gratiam non paucis quibusdam sanctis ut Paulo, Magdalene, similibusque propriam, sed omnibus omnino sanctis ad piè viuendum facit necessariam, ut isto scilicet modo humanæ voluntatis infirmitati, qua omnes laborant subueniretur, eamque à primi hominis gratia accuratè distinguens, non solum ei tribuit posse si velimus, sed facere etiam ut velimus. Cæterum si sancti illi quibus tam efficax tributa est gratia minore propterea sunt libertate conuersi, sanè minor etiam conuersionis suæ laudem apud Deum hominésque merentur, quam alij multi, qui maiore sunt voluntatis suæ libertate conuersi, quo eodem argumento Pelagiani olim efficacis gratiæ doctrinâ merita nostra prætendebant euertere.

*Prosp. ad
excerpta
Genuanensium
ad dub. 8.*

ASSERTIO XI.

*De dono
per son. c. 14.*

Quod dicit Augustinus, eis qui non sunt à perditionis massa segregati non adhiberi dicta vel facta diuina per quæ possent credere si audirent ea vel viderent, cum grano salis accipiendum est, ut intelligantur non accipere in actu secundo illa auxilia cum quibus Deus nouerat eos de facto conuertendos, quod certissimum est de omnibus qui non conuertantur.

CENSURA.

Rursum hic Augustini peruertitur sententia quasi generaliter diceret vniuersis qui à perditionis massa non sunt segregati dicta eiusmodi vel facta non adhiberi, cum de quibusdam se loqui tantum manifestissimè significet. Deinde quod pro grano salis adhibetur, magis insipidam reddit Augustini sententiam, & ut ex antedictis liquet prorsus non congruit eius proposito.

ASSERTIO XII.

ASSERTIO XII.

Ad illud quod ex cap. 6. de prædest. Sanctorum obijcitur, vbi Augustinus docet hunc nolle credere, quia eius voluntas non præparatur à Domino quod tamen erat necessarium vt credere vellet: Respondetur valde improprie dici quod is cui sufficienter proposita est fides, ideò nolit credere quia eius voluntas non præparatur à Domino.

CENSURA.

Nec hoc asserit Augustinus quod hîc ei imponitur, propterea videlicet quosdam non credere, quia non eis præparatur voluntas à Domino, sed aliud nihil colligi ex eius verbis potest, quam iis qui non credunt voluntatem à Domino non præparari. Idque iusto iudicio fieri, proprie si quidem ideo non credunt, quia credere nolunt: Qui tamen indubie crederent si & eis voluntas esset à Domino præparata. Quàm autem superior loquendi modus Augustino non congruat, liquet ex libro de dono perseu. cap. 22. vbi huiusmodi sermonem his verbis reiicit. *Nec illud est omnino dicendum quod in peccatorum dilectione remoramini, ideò necdum surrexistis quia necdum vos adiutorium gratiae miserantis erexit* Nam vt idem alibi ait, *nullius culpe humana in Deum rejicienda est causa.*

Lib. 2. de
peccat. mor.
c. 17.

ASSERTIO XIII.

Est quoddam perseverantiæ donum consistens in quodam speciali auxilio & protectione, qua Deus ita protegit, & munit quosdam vt ferè indeclinabiliter & infallibiliter in gratia perseverent vsque ad mortem, quod quibusdam conceditur, vt fortè Apostolis post acceptum S. Spiritum & (vt in scholio additur) ijs qui

dicuntur confirmati in gratia. Aliud est perseverantiæ donum quod consistit in quodam auxilio & protectione qua Deus ita adest ut possint in gratia perseverare si velint, & hoc donum est necessarium ad salutem, & datur omnibus iustis immediate in actu primo.

CENSURA.

Hanc duplicis doni perseverantiæ in hominibus lapsis distinctionem unius quo perseverari possit etiam si non perseveretur, alterius quo in finem usque actu perseveretur, nec scriptura, nec Augustinus agnoscit, sed unum illud duntaxat quo perseverandi possibilitas cum ipso sit perseverandi actu coniuncta. Etenim inter perseverantiæ donum primis hominibus tributum, & id quod nunc infirmis datur, hoc facit Augustinus discrimen quod illis datum sit auxilium sine quo perseverare etiam si vellent non possent, nunc verò tale detur, quo fiat ut perseverent, sed neque Tridentinum Concilium ubi de hoc argumento ex professo agit (quanquam diversum in scholio significetur) alterius generis perseverantiam agnoscit, dum perseverantiæ donum absoluta certitudine quenquam sibi polliceri vetat, cum tamen iustus quilibet absolute certus sit ad futurum sibi Deum ut perseverare possit si velit. Cæterum nec scripturæ, nec D. Augustini doctrinæ consentaneum est, quod hic aliqui statuuntur in gratia confirmati, & mutabilitatis periculo minimè obnoxij, quasi quibus præsens gratia ad perseverandum sufficiat. Cum ad omnes pertineat illud, *Qui stat videat ne cadat: vigilate & orate ne intretis in tentationem*, omnesque propter suam infirmitatem specialibus atque assiduis gratiæ auxilijs necesse sit & regi & protegi. Non tamen negaverimus eos qui adversus tentationes perstant invidi ad id gratia Dei corroborari, & confirmari, aliisque esse alijs firmiores, iuxta quod Apostolus ait, *Debemus nos firmiores imbecillitates infirmorum sustinere*, quam quisque gratiæ firmitatem pete-

Seff. 6 c. 12.

1. Cor. 10.
Mat. 26.

Rom. 12.

re frequenter quantumlibet iustus debet, cum Prophe-
ta dicens *Spiritu principali confirma me*, ut à quo confirma-
ri potius quotidie, quam semel confirmati censerì de-
bemus, ob hoc quod nostræ confirmationis gratiam
non tam habeamus in nobis permanentem, quam per
quotidianum Dei auxilium accipiamus desuper illa-
bentem.

Psalm. 50.

ASSERTIO XIV.

Indurati & exæcati habent sufficiens auxilium ex
parte Dei ut conuertantur: & infra, omnes infideles sem-
per & ubique habent sufficiens auxilium ad salutem ex
parte Dei.

CENSURA.

Mirum est istud non de infidelibus modo, sed de in-
duratis etiam & exæcatis dici, cum hæc ipsa obdura-
tio, atque exæcatio à superni auxilij & diuinæ lucis in-
terclusione desertionēque descendat, quomodo id er-
go auxilium haberi ab istis sufficiens potest? At verò
cum certum sit non præstari à Deo eiusmodi hominibus
gratiam eam quæ cor lapideum, & cæcitatem auferat,
manifestum est eos non habere sufficiens auxilium ut
conuertantur, cum sine iam dicta gratia nullum eis au-
xilium sufficiat, siue illa exterior sit etiam cum miracu-
lis prædicatio, siue interior per Spiritum timoris con-
cussio aut velleitatis etiam cuiusdam inspiratio: unde Ec-
clesia non solum pro incredulis omnibus orat, ut cre-
dant, fideique illis Deus ostium aperiat, verum etiam
ut rebelles eorum ad se compellat propitius volunta-
tes. Quid autem orando petit nisi auxilium quod suffi-
cienter non habetur (si quidem insufficientiæ & indi-
gentiæ argumentum oratio est) nisi fortè ut facilius fiat,
quomodo elabi olim Pelagius conatus est.

*In secreta
Domin. 4.
post Pentecost.*

ASSERTIO XV.

Omnia loca scripturæ sacræ, quæ significant, esse impossibile quosdam conuerti, intelligenda sunt, vt impossibile accipiat pro eo quod est valdè difficile.

CENSURA.

Certum est locis quibusdam non difficultatem, sed impossibilitatem significari, sed respiciendo ad solas naturæ vires, vt, *si potest Aethiops mutare pellem suam, sic vos poteritis bene facere cum didiceritis malum, &c. non poterat mutari naturalis malitia eorum, &c. nemo potest corrigere quem Deus despexerit, &c. non poterant credere, &c. sine me nihil potestis facere, &c. quod impossibile erat legi, &c.* Vbi si impossibile idem est, quod difficile, sequitur quod ex lege quidem potuerit esse iustitia, & sine Christo, sed eius obtinendæ facilitas per Christum ex gratia, quomodo olim scripturas eiusmodi eludere Pelagius solebat.

Hier. 13.

Sup. 12.

Eccles. 7.

Ioan. 12.

Ioan. 11.

Rom. 8.

Aug. Ep. 18.
106. fol. 131

ASSERTIO XVI.

Paruuli ex parte Dei habent remedium sufficiens contra peccatum, præsertim in noua lege. Nam Christus pro omnibus mortuus est, & pro omnibus instituit sacramentum in remedium peccatorum, nemini excepto. Atque id (quod in scholio additur) ex Epistola B. Cypria. 59. satis aperte colligitur.

CENSURA.

Ex eo quod Christus pro omnibus est parualis mortuus, & baptismum instituit, non recte colligitur sufficiens eos contra peccatum habere remedium. Vt enim dicit Prosper, *non sufficit hominum redemptioni crucifixum esse Dominum Christum, nisi commoriantur, & conspeliuntur ei in*

Ad 9. cap.
Gallorum.

baptismo. Et quanquam dici possit sufficiens pro parvulis institutum remedium, dici tamen non potest, id eos habuisse, quod nec in sua, nec in suorum habuerunt potestate. Ad Cyprianum verò quod attinet, non modo non satis apertè, sed ne tenuiter quidem, colligi ex eo contrarium potest.

A S S E R T I O XVII.

Quod applicatio talis remedij (Baptismi videlicet) his vel illis ob aliqua impedimenta occurrentia fiat impossibilis, non est Deo imputandum, quia non ordinat, ut non possit applicari, vel ut talia impedimenta occurrant, sed tantum permittit secundum communem cursum rerum, sicut permittit peccata.

C E N S U R A.

Satis manifestum est quorundam parvulorum baptismi mortis celeritate impediri; nec dubium videtur, quin mors talis Deo sit imputanda. De quo generaliter scriptum est, quod vita & mors à Deo sint; quod mortificat & vivificat; quod sine eius voluntate nec pilus de capite, nec folium de arbore defluit, nec in terram passereculus cadit, quanto minus anima rationalis? Id quod tunc apparet clarius, quando talis mors nullo hominum procurante, sed per naturales accidit causas, (vel ut saxo desuper cadente, aut lupo rapiente) quas Deus ordinat, suaque providentia regit. Vnde perspicitur tale salutis impedimentum Dei iudicio verissimè imputari. Ideoque B. Augustinus, *Cum parvulorum, inquit, alij baptizati, alij non baptizati vite huius terminum finiunt, satis indicant misericordiam & iudicium; misericordiam quidem gratuitam, iudicium debitum.* Et rursus, *utrisque inquis nostrum profundum sit, cur, & in maioribus, & in minoribus, Deus velit alteri, & nolit alteri subvenire.* Et alibi, *cur providentia Dei, cui nostri capilli numerati sunt, sine.*

*Eccles. 11.**1 Reg. 2.**Math. 10.**De predest.**sanct. c. 24.**lib. 4. contr.**Iul. c. 8.**Epistola 105.*

cuius voluntate non cadit passer in terram, quæ nec fato premisur, nec fortuitus casibus impeditur, nec ulla iniquitate corrumpitur, ut renascantur ad hereditatem celestem, non consulit omnibus paruulis filiorum suorum, & nonnullis consulit etiam paruulis impiorum? Et infra: Nimia vanitatis & cecitatis sunt, si etiam ijs consideratis nondum dignantur exclamare nobiscum: O altitudo diuinitatum, quam incomprehensibilia sunt iudicia eius! Quo pertinet & illud Prosperi. Instat & omnipotens providentia Dei sic indefinenter vniuersa diiudicat, ut nemo in hunc mundum veniat, nemo ex hoc mundo discedat, nisi eo ortu atque discessu, quem rerum arbiter secundum altissimam scientiam sapientiamque suam discernit, sicut scriptum est in lib. Iob. Quis ignorat, quod omnia hæc manus Domini fecerit, in cuius manu anima omnis viuentis & spiritus vniuersæ carnis hominibus non debent itaque mortes paruulorum ante baptismum naturali rerum cursui, aut parentum negligentia sic tribui, ut nihil ibi superna Dei agant iudicia, ne res humanas in paruulis, non diuinæ providentiæ, sed fortuitus agi casibus (ut inquit Augustinus) opinemur. Vnde satis intelligitur argumentum B. Augustini & Prosperi, ex paruulorum causa ductum, solum nondum esse, sed inuietum permanere. Et hæc quidem paulo diligentius tractanda putauimus, quod errorem redolere videantur circa diuinam rerum in particulari providentiæ, quando & alibi ita provideri solum à Deo rebus vniuersis volunt, ut eas naturalibus quidem facultatibus potentiisque instruxerit, per quas congruentes naturæ suæ motus, actiones, & opera producere, & ad destinatos sibi fines peruenire possent, quibus ipse quidem generali concursu adsit, & cooperetur, ea tamen non item singulatim præordinarit, atque decreuerit, sed rem quamque sibi permittens, exire tantum in actus motusque permittat, naturæ cuique suæ, prout res occasio, tempusque tulerit, consentaneos: Alioquin enim rerum contingentia non parum detrahendum, immò verò nimis esse Deo indignum, si hæc omnia efficaciter ab eo præordinata dicantur, cum frequenter indifferens sit ad Dei

Lib. 1. de
vocat. gen.
c. 12.

Iob. 12.

De dono per-
fect. c. 12.

Ad 1. 2. 3.
art. 2. pro-
pos. 2.

honorem, mundi perfectionem, hominum vtilitatem, num hoc alio modo fiant. Quin & boum, culicum, guttarumque numerum præuisum à Deo agnoscunt, prouidentia tamen eius dispositum ac præordinatum negant, quia videlicet valde Deo videatur indignum, eius prouidentiam ad has etiam minutias velle deducere. Quod sane ab absurdo petitum argumentum Gentiles olim contra Dei prouidentiam particularem vsurpare solitos ex veteribus constat. Et si quid valere putetur, tum sic ad istam arctamur sententiam, ut quod pluribus, sanioribusque auctoribus de prouidentia visum est, tenere non liceat, ne quid scilicet indignum Deo adscribatur. Nam neque D. Thomas, si attentè legatur, à communi illa sententia discessisse comperietur.

*1. Part. q.
23. art. 7.
videatur
idem q. 19.
art. 8.*

ASSERTIO XVIII.

Omnes infideles semper, & vbique habent sufficiens auxilium ex parte Dei, seu in actu primo. Si enim facerent quod in ipsis est, & quantum possent secundum præsentem dispositionem naturalem, vel supernaturalem quam habent, Deus illuminaret eos, ut credere possent vel conuerti.

CENSURA.

De sufficienti auxilio satis superque paulo ante diximus. Ad rationem verò subiunctam quod attinet, respondemus; quod quantumuis infideles faciant, quicquid ex naturali sola dispositione possunt, (nam supernaturalem cur hic addendam putauerint non videmus) nihil adhuc faciunt, quod ad æternæ salutis causam pertineat, quoniam Christus suæ gratiæ necessitatem commendans, sine me, inquit, nihil potestis facere, quod ad veram scilicet iustitiam, & æternam beatitudinem proficit. Quanquam enim qualiscumque eiusmodi ex naturali dispositione infidelium conatus aut innocen-

tia, minor sit gratiæ suscipiendæ indispositio, nulla eius tamen Deo conferendæ prouocatio, vel causa existit: quod vel inde apparet, quia sæpissimè non modo Deum non quærentibus, sed & auertis, inimicis, rebellibus, nullis eorum præcedentibus bonis eiusmodi studijs, atque conatibus, per Christum donetur, alijs præteritis, in quibus maior etiam naturalis eiusmodi innocentia, & quasi iustitia quædam eluxerit, sane diuersa sententia non satis recedere videtur ab illo toties damnato, dogmate Dei gratiam secundum merita nostra dari.

ASSERTIO XIX.

Qui inuincibiliter ignorat fidem, tenetur ad præcepta naturalia, id est, ad Decalogum, ergo habet auxilium morale sufficiens ad illa explenda, quia Deus neminem obligat ad impossibile; alioquin videtur accedere ad sententiam hæreticorum, qui dicunt, per peccatum originale amissum liberum arbitrium ad bonum.

CENSURA.

Observatio Decalogi quin sit infidelibus possibilis non est dubitandum, sed sic possunt implere salubriter Deo iuuante, vt & credere Deo illuminante. Nec verò hinc sequitur ad benè faciendum liberum esse amissum arbitrium, quandoquidem adiuuante & illuminante Deo nemo nisi per liberum arbitrium, bene operatur. Mansit ergo liberum arbitrium, & ad bonum, & ad malum, sed ad malefaciendum sibi ex se sufficit, ad benefaciendum verò necesse est eius gratiâ adiuuetur, qui dicit, *Sine me nihil potestis facere.*

ASSERTIO XX.

Sententia, quæ dicit eos qui saluantur, non efficaciter electos ad gloriam, ante præuisionem bonorum operum

operum, vel applicationis meriti contra peccatum, videtur maximè probabilis. Tenent autem hanc sententiam omnes Patres Græci, adeo vt communiter dicatur sententia Græcorum. Et in scholio. Quanquam diuersa sententia Augustino tribuatur, non puto tamen esse Augustini. Nam vbi de hac re loquitur, non exprimit vtrum loquatur de immediata electione ad gloriam, an de mediata quæ est ad gratiam. Item, an loquatur de electione absoluta & efficaci; an de conditionata, id est, si gratiæ fuerint cooperati, quomodo intelligendas esse promissiones diuinæ docet Tridentinum Concilium sess. 6. Quod si tamen contraria sententia esset D. Augustini, non admodum referret.

CENSURA.

Satis palam est, non aliam Augustinum electionem agnoscere, quam absolutam & efficacem, non quæ liberi arbitrij cooperationem excludat, sed quæ, naturali etiam seruata libertate, vt cooperemur, efficiat. Neque verò Tridentinum vsquam Concilium conditionatam esse docet promissionem, Faciam vt in præceptis meis ambuletis, & mandata mea custodiat & operemini, aut alias similes. De dissidio verò, quod hic inter Græcos Latinosque significatur, deque B. Augustini in hoc argumento auctoritate, in præfatione abunde dictum est.

ASSERTIO XXI.

Deinde probatur alijs pluribus testimonijs, Tene Apoc. 3. quod habes, ne alius accipiat coronam tuam, ergo corona potest amitti. Cui respondet Augustinus c. 13. de corr. & gratia, scripturam ita loqui non quod corona possit amitti, sed vt homines stent in timore.

CENSURA.

Apparet hunc Augustini locum, quod nimis hic frequenter contigit, ex aëre magis, quam ex ipsa loci inspectione citari. Tantum enim abest vt Augustinus ibi

dicat, coronam amitti non posse, ut significet etiam quosdam amittere. Si enim alius inquit non est accepturus, nisi isse perdidit, certum est numerus electorum, qui alterius videlicet substitutione semper compleri debeat. Scripturam ergo eam intelligit ibi Augustinus de non perleueraturo, cui secundum præsentem iustitiam quidem corona sit debita, sed quam defectione iustitiæ perdere mereatur, quam proinde, ut electorum numerus constet, alteri sit necesse donari. Addit tamen ibidem Augustinus, quod quoties eiusmodi scripturæ etiam perseueraturis accommodantur, non id fiat prædestinationis ac perseuerantiæ velut suspensio incerto, sed quia sic eos in timore ac sollicitudine contineri expediat. Nam quanquam futurum non sit vnquam, ut prædestinati finaliter excidant, nec perseuerent, naturæ tamen ac voluntatis mutabilitate (quæ nunquam hic ab eis aufertur) excidere semper & non perseuerare possent. Ad huius ergo instabilitatis suæ considerationem scripturis istis reuocari, ut periculi memores, eo studiosius aduigilent, & viribus suis diffusi, sub Dei se protectione arctius contineant, quando hac ipsa timoris sollicitudine prædestinationis in eis compleatur effectus; Cadere ergo semper atque excidere à corona etiam electi possunt, sed adest eis in tentationibus potentissima Dei manus, ut etiam in calumpniis, lapidationibusque interdum & humana fragilitate iam ruituri, mox erigantur, & confirmantur, fiatque miro quodam modo, ut semper & labi & excidere possint, Deo tamen inter media eos pericula gubernante, ac protegente, nec labantur, nec excidant, sed inuictissimi, insuperabilesque perseuerent.

ASSERTIO XXII.

In statu innocentiae sufficiebat homini ad salutem gratia, qua poterat perseuerare si vellent, ergo & nunc.

CENSURA.

Hæc sententia, quæ habet, sufficere nunc iustis ad

perseuerandum eam gratiam, qualis fuit primis parentibus data, & Massiliensium olim fuit, & directe ac ex professo B. Augustini doctrinæ repugnat cap. 12. de corr. & gratia, & Ecclesiæ orationes euerit.

ASSERTIO XXIII.

Si electio est ad certum gloriæ gradum, igitur omnia opera iustorum debent absoluta Dei voluntate esse præordinata, nec poterunt aliter, nec aliud operari, quam sit à Deo præordinatū, quod est contra libertatē.

CENSURA.

Si ex absoluta Dei voluntate, qua quosdam elegit, quos faceret in finem vsque perseuerantes, omniāque media ad salutem eorum præordinauit, sequitur non posse hominem aliud bonum vel aliter (quod haud dubiè contra libertatem est & Catholicā fidem) operari, ergo B. Augustini doctrina non debuit à Celestino Pontifice, nec sic quidem laudari, tanquam quæ nihil contra fidem haberet, (quomodo tamen ab eo laudatam ipsi agnoscunt) sed magis ut periculosa, & perniciofa damnari: si quidem manifestè docet actualem in finem vsque perseuerantiam, ita ex Dei esse electione, ut eam Christo donante, nemo dicere audeat, forsitan non perseuerabit. Ut interim dissimulemus, quod hac eleganti ratiocinatione Deo quoque ipsi libertas sua detrahatur. Ipse enim absoluta voluntate omnia præordinauit ad mundi perfectionē pertinentia ergo sibi ipsi necessitatem iniecit, nec aliud, aut aliter facere potuit. Quare talis ratiocinatio, non modo ut improbabilis, verum etiam ut sanæ doctrinæ præiudicans, & aduersa, plane est fugienda.

*Epistola
ad Gallia
Epi Copes de
cor & gran
tia. . .*

ASSERTIO XXIV.

Martyria & afflictiones sanctorum, quas patiuntur ab impijs, sunt excellentissima media salutis ipsorum, ergo etiam hæc ante omnem præuisionem erant præor-

dinata, quod est falsū, quia Deus non est auctor peccati.

CENSURA.

Hæc si vera sunt, non potuit ergo Deus absoluta voluntate nec Christi præordinare mortem atque martyrium, nisi peccati etiam crucifigentium auctor cogitetur. Atqui docet scriptura Christi mortem absolute fuisse à Patre decretam, iuxta illud *conuenerunt facere quæ manus tua, & concilium decreuerunt fieri* Et alibi, *Propter scelus populi mei percussu eum*. Quod autem fecit ipse, hoc facere ante disposuit, vitare ergo iuxta hanc rationationem non possumus, quin peccati authorem fateri Deum debeamus. De Sanctorum porro martyrijs scriptum est. vobis datum est pro Christo, non tantum, ut in eum credatis, sed etiam ut pro eo patiamini; De ergo donum Martyrium est, & quidem ut Cyprianus loquitur, *de diuina dignatione descendens*.

ASSERTIO XXV.

Ad illud Ezechielis, faciam ut in præceptis meis ambuletis, &c. Dicq; ibi significari, Deum daturum abundantiorē gratiam in noua lege quam in veteri, quæ fiet, ut re ipsa plures ambulent in lege Dei, quam in lege veteri. Non ergo illud, faciam ut ambuletis, significat illum prouidentia modum per quem omnes infallibiliter seruarent præceptum Dei.

CENSURA.

Hic Commentarius intentioni Prophetæ prorsus non congruit; non enim abundantiorē gratiam pariori opponit, sed vitam sanctam, sceleratæ; & cor carneum, lapideo; planèque significat, per noui testamenti gratiam Deum esse bonos homines effecturum, quos vetus testamentum, propter sui insufficientiam (ut intelligi potest ex Epistola ad Hebræos c. 8.) relinquebat iniquos.

*Vide Augustinum
lib. de Prae-
dest. sancti.
c. 11.*

Act. 4.

Isa. 53.

*Philip. 1.
lib. de mor-
tal. & lib.
4. Epistola
6.*

Ezech. 36.

ASSERTIO XXVI.

Non est voluntas absoluta Patris, ut omnes quos ipse dat filio absolute saluentur, ut patet Ioan. 17. vbi dicit, quod ex illis quos dedit ei Pater perierit filius perditionis, qui seipsum perdere voluit; Sed voluntas Patris est, ut omnes habeant sufficientia auxilia, & non stet per ipsum quo minus saluentur.

CENSURA.

Si hic est scripturæ sensus; ergo vniuersi homines, adeoque & reprobi omnes Christo donati sunt, quod falsum esse constat ex Ioan. cap. 17. vbi dicitur. *Non pro mundo rogo, sed pro iis quos dedisti mihi*; vel sanè qui dati sunt Christo præ iis qui dati non sunt, peculiare nihil habebunt, omnes enim habent sufficientia eiusmodi quæ putantur auxilia, & non stat per Deum quo minus saluentur. Cæterum quod absoluta sit Patris voluntas, ut omnes Christo dati saluentur, docet B. Augustinus lib. de Prædest. Sanctorum c. 16. & lib. de corr. & gra. c. 14. vbi inter cætera his vtitur verbis, *Deo volenti saluum facere, nullum hominis resistit arbitrium.*

ASSERTIO XXVII.

Hæc sententia Apostoli, omnia cooperantur in bonum his qui secundum propositum vocati sunt sancti, loquitur in genere de omnibus diligentibus Deum, non autem tantum de illis qui erant prædestinati.

CENSURA.

Huic intelligentiæ, non solum B. Augustinus, sed ipsa quoque Apostoli verba manifeste repugnant, qui bus ait, *omnia in bonum cooperari*. Certum est autem reprobis temporaliter Deum diligentibus posteaque cadentibus, tentationes non cooperari in bonum, sed in magnum malum, æternumque exitium.

*Lib. 5. contr.
Iulian. c. 3. &
alibi.*

ASSERTIO XXVIII.

Rom 9.

In his verbis, Iacob dilexi, Esau autem odio habui, per dilectionem non significatur efficax ordinatio ad gloriam, sed ad maiora dona gratiæ, quæ non erant ex præiis meritis. Quia enim ex Iacob nasciturus erat Christus, voluit illi Deus, & eius posteritati maxima dilectionis signa ostendere, quæ non ostendit fratri eius Esau, ita vt comparatione Iacob & populi Israelitici Esau & Idumæi possint videri odio habiti.

CENSURÆ.

Aug. Epistola 105.

Commentarius iste prorsus ad Apostoli institutum non pertinet, & ab Augustino aliorumque veterum interpretatione est alienus. Mirum est autem excogitandis huiusmodi commentariis vano se homines labore torquere, & ob quid aliud, nisi quia *saluberrima veritas*, vt Augustini verbis vtamur, *retia metuant*.

ASSERTIO XXIX.

Si Deus præiis originali peccato, absoluta voluntate constituit hunc hominem excludere à regno, vel admittere ad regnum ante omnem operum præiis. nem, ergo nullis operibus bonis vel malis poterit auerti quod decretum est. Nam hæc suppositio diuinæ voluntatis facta est independenter à libertate humana, ergo absolute necessarium est hominem damnari, posito quod Deus illum reprobauerit, & speciali prouidentia procurari debet, vt in peccatis moriatur.

CENSURÆ.

Hæc ratiocinatio si conuincit, ex eadem colligere licebit paruulos ante regenerationem morituros, absoluta necessitate damnari. Facta enim eorum reprobatio est independenter ab illorum voluntate propter solum originale peccatum. Aut sanè dicendum erat eos non reprobari, quod est B. Augustini adeoque & scripturæ

facræ doctrinam euertere. Nec verò quia tales paruulos Deus à regno suo decreuit excludere, idcirco medium eis ad damnationem procurare debet, hoc enim aliunde positum vidit, quia per vnum hominem peccatum intrauit in mundum.

Rom. 5.

ASSERTIO XXX.

Numerus prædestinatorum non est certus ex præordinatione quæ antecedit omnem præscientiam operum.

CENSURA.

Euidens est Augustini doctrina eaque Apostolicæ perquam consentanea, certum esse apud Deum prædestinatorum numerum, non ex antecedente operum præscientia, sed ex absoluta & efficaci præordinatione, vbi si præscientiam (vt in scholio significatur) conditionatam intelligat, vt ex ea tota pendere prædestinatio putetur, iam nec secundum præscientiam quidem certus erit Deo electorum numerus, si quidem conditionata præscientia exempli gratia, si Dei gratiam acceptare homo voluerit, simpliciter præscientia non est, vt quam habere quilibet etiam nostrum possit. Vbi si quis dicat conditionis euentum simpliciter Deo præcognitum esse, recte id quidem, sed non hæc iam conditionata, sed absoluta præscientia est, ex qua haud dubiè certus apud Deum est numerus, sed idè ex præscientia, quia ex præordinatione. Neq; enim idè certum Deus electorum voluit numerum, quia talem præsciuit, sed idè præsciuit, quia voluit, atque præordinauit, vt salutem eorum, ita & omnem salutis modum ac ordinem.

ASSERTIO XXXI.

Quæ totius materiæ conclusio dicitur.

Hæc Sententia de prædestinatione & reprobatione maximè consentanea est diuinæ bonitati, scripturarum auctoritati, Patrum testimonijs, & naturalis rationis

æquitari, in nulla re omnino Pelagio fauens, & quam longissimè à sententia Lutheri & Caluini, & reliquorum hæreticorum nostræ tempestatis recedens, à quorum sententia & argumentis difficile est alteram sententiam vindicare.

CENSURA.

Immo vero iustius fortasse alius quispiam dixerit, Sententia hæc diuinam bonitatem obscurat; iustitiam eneruat; scripturis illudit; Patrum testimonia in sensus alienos detorquet; humanæ rationis corruptioni applaudit; humilitatis fundamentum euertit; precandi necessitatem non magnam relinquit; propriarum virium fiduciam ingenerat; in salutis negotio, quod præcipuum est homini donat, quod minus Deo; gratiam Dei libero arbitrio subiicit, ac eius pedissequam facit; in summa à Pelagio non satis procul abscedit. Lutheri vero, Caluini, & reliquorum nostræ tempestatis hæreticorum sententiam, dum ab ea videri vult quam longissimè recedere, potentiùsque debellare, magis etiam imprudens stabilit atque confirmat. Nam si non possumus, vel (vt ad mitigandam inuidiam dicitur) difficile est ab eorum sensis & argumentis B. Augustini doctrinam vindicare, quis non videat, quanti iam ponderis & auctoritatis accessione hæreticorum sententia roboretur.

*De mandato DD. Decani & reliquorum
Magistrorum S. Theologiæ Facultatis
Vniuersitatis Louaniensis subscripsit.*

*Andreas Sassenus dictæ S. Th.
Facultatis Bedellus, ac No-
tarius publicus.*



CENSURA DVACENSIS.

*ASSERTIONVM QV ARVN DAM
CENSRA, Super quibus Reuerendissimi in Chri-
sto Patres ac Domini, illustrissimus Dominus de Bar-
lemont Cameracensis, & Dominus Ioannes Han-
chinus Mechliniensis Archiepiscopi, nec non Domi-
nus Guillelmus Damasi Lindanus Gandensis Epif-
copus, Sacrae Theologiae Facultatis Duacensis examen,
discussionem, & Sententiam petuerunt, per eandem
Sacrae Theologiae Facultatem Vniuersitatis Duacensis.*

ET PRIMVM DE SCRIPTVRA SACRA.

ASSERTIO PRIMA.

Vt aliquid sit Sacra Scriptura non est necessa-
rium singula eius verba inspirata esse à Spiritu
Sancto.

CENSURA.



ASSERTIO temeraria, & ex qua incom-
parabilis illa dignitas & maiestas, quam in
Scriptura Sacra propterea authorem Spiritum
Sanctum semper & agnouerunt, & religio-
se reueriti fuerunt Ecclesiae Doctores, multum minui vi-

1. Th. 1.
 2. Chrysost.
 hom. 49. in
 Ioan.
 b Aug. Ps.
 59.
 c Chrysost.
 in gen.
 d Aug. lib.
 de Ciuit. c. 3.
 e Id. in Psal.
 44. Theod.
 pref. in Psal.
 f Lib. 2. cōf.
 Her. c. 47.
 g pref. in
 ier. c. 1.

detur. Testantur enim illi & docent scripturam, non modo (quod diserte ab Apostolo dictum est) *diuinitus inspiratam*: sed & à Spiritu Sancto *prolatam*, *dictatam*, *compositam* & à Christo *conditam* esse, eiusque *Scriptores* fuisse velut calamos, quibus Spiritus Sanctus, tanquam primarius author & scriptor, ad eam nobis tradendam vteretur, iuxta illud lingua mea calamus scribæ velociter scribentis. Vnde Sanctus *Ireneus* scripturas perfectas esse pronunciat, propterea quod à Verbo Dei, & à Spiritu Sancto eius sint dictæ. Et Beatus *Gregorius* de authore libri Iob dicit, & scribit in hunc modum: *Sed quis hæc scripserit valde superuacue queritur, cum tamen author libri Spiritus Sanctus fideliter creditur. Ipse igitur hæc scripsit, qui hæc scribenda dictauit; Ille scripsit, qui & illius operis inspiratore extitit, & per scribentis vocem imitanda ad nos eius facta transmisit.* Deinde rem hanc similitudine declarat: *Si magni cuiusdam viri epistolas susceptus legeremus verbi, eaque quo calamo scripta fuissent quereremus, ridiculum profecto esset, si non Epistolarum, & authorem scire, sensumque cognoscere, sed quali calamo eatum verba impressa fuerint indagare studeremus. Cum ergo rem cognoscimus, eiusque res Spiritum Sanctum authorem tenemus, quando Scriptorem querimus, quid aliud agimus nisi legentes litteras de calamo perferuari?* Sic Gregorius. Iam vero id quod dictatur, id non quomodocunque, sed verbatim excipiendum scribenti suggeritur. Ob *h* quam causam, nec verbum, nec syllabam, nec apicem in scripturis otiosum aut superfluum inueniri, frequenter & grauiter Patres testantur. Hinc & in singulis etiam scripturarum verbis excutiendis, diligenter & religiose inueniuntur occupati, ut mysteria inde aliqua eruât sublimi Spiritus Sancti magisterio non indigna vnde huiusmodi apud eos leguntur Sententiarum, nec *i* syllabam nec apicem esse in litteris sacris, in cuius profundo non sit grandis quispiam Thesaurus; Intolerandam prorsus & grandem *h* blasphemiam esse, si quis vel verbum asserat in scriptura inueniri otiosum; Singulos *i* sermones, syllabas, apices puncta in diuinis

h Bas. hom.
 7. Hexam.
 Chrys. hom.
 3. 28. &
 42. in gen.
 de verbis Is.
 vidi dominum, hom.
 31. in Epist.
 ad Rom.
 hom. 49. in
 Ioan. & in
 illud Iu. 2.
 inuenimus
 mariam &
 Ioseph. item
 Alex. Epist.

scripturis plena esse sensibus; deniq; singula verba scripturarum, singula esse Sacramenta. Ab illis porro minime discrepant hodierni Doctores, inter quos R. P. Gregorius à Valentia Societatis nominis Iesu Theologus, in sua analysi fidei catholicæ testatur nihil omnino in scripturis esse quod peculiari Spiritus Sancti instinctu scriptum non sit, idque patere ex cōmuni etiam sensu fidelium. Et paulo post, ° *Dubium esse non debet, inquit, quin omnes & singula Scripturarum particule sint à Spiritu Sancto dictatæ & exarate.* Et R. P. Franciscus Costerus controuersiarum capite primo, eiusdem Societatis Theologus in Enchiridio controuersiarum : *Sacræ listeræ dictatæ à Spiritu Sancto nec iota unum, vel unum apicem habent, cui non insit suum pondus & efficacia.*

1. Remigius
Esq; Procop.
in Genes.
Damase lib.
4. ori. fid.
c. 26. videretur quoque intermoder-
nor fran.
Turrianus
Theologus
Societatis
N. Iesu.
lib. 4. contra Magde-
burgenses
cap. 15. &
in explic.
lib. 5. constitutionum
Apostolicarum, c. 15.
i Chrysost.
hom. 18. &
21. ingen.
x Bas hom.
10 Hexam.
i Hier. ad
Eph 3.
m idem in
Ysal. 9.
n Parte 8.
fol 356.
o Folio 357

ASSERTIO II.

Non est necessarium, vt singulæ veritates & sententiæ sint immediate à Spiritu sancto ipsi scriptori inspiratæ.

CENSURA.

Cum Scriptura Sacra sit Dei verbum, tanquam ore Dei prolatum, & Spiritu Sancto dictatum, sitque eadem partium singularum, quæ totius ratio, dubitari non debet, quin singulæ veritates & sententiæ in ea contentæ, sint à Spiritu Sancto immediate profectæ, & Scriptoribus inspiratæ: (non illæ tantum quæ à Prophetis & Apostolis, verum etiam quæ ab aliis Scriptoribus Sacris editæ sunt. Sicut enim Prophetis & Apostolis, vel per eos locutus est Dominus; ita generatim testatur ° Augustinus Sacræ scripturæ Anthoribus, vel per eos Deum locutum esse, ° quodque nihil aliud intueri oportet in Scripturis Diuinis nisi quod per homines dixerit Dei Spiritus, sed & alibi venerabilem stilum Spiritus Sancti vocat Scripturam sacrā, dicitque d sacris Scriptoribus datam sic eloquendi facultatem & illam texendi sermonis

a Reg. 2. c.
23 Luc 1.
Hebr 1. 2.
pet. 1. 2. corinth 13.
b Lib 18 de ciuit cap 41.
c Lib c 45.
d Lib. 12.
consc. 26. &
l 1. de consens. Euang.
c. 2.

e Tba. in 4.
dist 14. de
prophetia
ars. 1. q. 12
in summa 2.
2. q. 171. ars.
3 vide etiam
Ambros. &
Beda in illud
Lucæ 1. vi
sum est idem
mibi.

modum quo v'si sunt. Nam vt in sacris litteris multa occurrunt quæ suis scriptoribus per humanam scientiam, vel experientiam cognita esse potuerunt, quoniam tamen fallax est, aut certe longissime infra certitudinem verbi Dei subsistit omnis scientia & experientia humana, necessarium fuit tales quoque sententias seu veritates, vt ad Dei verbum pertinerent, non per humanum tantummodo Spiritum, sed plane per diuinam Spiritus sancti motionem atque instinctum ab iisdem Scriptoribus proferri. Sicut Christus Dominus quamuis homo sciens & experiens, nihilominus spiritu quoque diuino dixit exempli causa, *non est Propheta sine honore nisi in patria sua; cæcus si ceco ducatur præbeat ambo in foveam cadunt, & nonne duo passeret esse vaneunt,* & alia eiusmodi à sensibus simul & vulgo desumpta. Quocirca idem generatim de Spiritu sancto Apostolis suis promissio legitur: *Ille vos docebit omnia & suggeret vobis omnia quaecumque dixi vobis:* si omnia, ergo & ea, quæ post Ascensionem magistri in celum memoriâ forte retinebant ab eo audita, & quæ aliquo modo poterant eis humano ac naturali modo esse nota. Vnde Gabriel scribit: multas esse naturales veritates Apostolis à Spiritu sancto suggestas. Nec pugnat cum diuina Spiritus sancti suggestionem, quod liber aliquis canonicus non sine labore, ac meditatione, & humana quadam sit conscriptus industria, quandoquidem non solum vbi, sed & quomodo vult soleat spirare Spiritus sanctus. Atque hinc vt Christus ipse vere Deus omnipotens in quibusdam peragendis operibus suis plane diuinis & supernaturalibus nonnullam tamē molitionem interdum adhibebat humanam & tardam, ita & in verbis ac librorum compositione, si scribere voluisset, laborem nonnunquam & meditationem, simulque industriam aliquam adhibere potuit humanam, quamuis interim Spiritus eius humanus, itemque os, lingua, manus, digiti, perpetua quædam essent instrumenta diuini Spiritus. Et sane si non est necessarium, vt singulæ veritates & sententiæ, quæ

Mat. 13.

Mat. 23.

Joan. 14.

In 2 dist 25.
q. 1. dub. 1.

2 Machab.
Eccli. 23. &
33.

sunt in sacris litteris, immediate sint à Spiritu sancto ipsi scriptori inspiratæ, non modo sequetur indeterminabilis altercatio super sententiis immediate vel non immediate inspiratis, verumetiam de integris euangeliiis (quorum historia potuit humanitus esse nota) imo & de omnibus scripturis non Propheticis dubitabitur, an immediate Spiritus sanctus eas Scripturibus inspirauerit.

ASSERTIO III.

Liber aliquis (qualis forte est secundus Machab.) humana industria, sine assistentia Spiritus Sancti scriptus, si Spiritus Sanctus postea testetur ibi nihil esse falsum, dicitur Scriptura Sacra.

CENSURÆ.

Multo magis hæc quam duæ superiores, improbanda est assertio, tanquam manifesti erroris periculum continens. Constat enim inter omnes omnem Scripturam Sacram iuxta Apostolum esse diuinitus inspiratam, diuinam esse doctrinam, quam Spiritu Sancto inspirante atque dictante authores Sacri litteris mandauerunt. Vnde nec summorum Pontificum aut Conciliorum de rebus fidei decreta, ac definitiones scripto mandatæ, quamuis Spiritus Sanctus per Ecclesiam nobis testetur ibi nihil esse falsum, Scripturæ Sacræ nomine vñquam fuerunt comprehensæ: ad eò vt nec Symbolum Athanasij, quod tota decantat Ecclesia, nec illa Leonis ad Fauianum Epistola cuius textum vsque ad vñum iota in omnibus venerabiliter suscipi Gelasius Papa sub Anathemate præcipit, Scripturis Sacris, vel ab ipso Gelasio vel à posterioribus fuere annumerata; in quibus tamen pariter humanam industriam, & Spiritus Sancti assistentiam agnoscimus. Quare multo minus si quis liber sola humana industria, absque

a Greg. à
Valentia
analy. fidei
parte 8. pag.
333. vide
etiam P.
Costerum in
controuers.
de Scriptu-
ra.

Cap. 5. R.
Ecclesia.

Spiritus Sancti assistentia, scriptus fuerit, etiam si postea testetur Spiritus Sanctus ibi nihil esse falsum, efficere-
 tur Scriptura Sacra. Quod qui dixerit præter alia fateri
 cogetur singularem quampiam veluti Thucididis aut
 Liuij historiam, si Spiritus Sanctus testetur nihil esse
 falsi in ea, Scripturam Sacram ideoque & scripturam
 diuinitus inspiratam effectum iri: eadem enim sunt Apo-
 stolo Scriptura Sacra seu Sacræ Literæ, & Scriptura
 diuinitus inspirata. Quapropter quum liber Machab.
 secundus (hoc enim exemplum etsi dubitanter in asser-
 tione interponitur) iuxta Conciliorum definitiones
 scriptura sit vere canonica, diuina, & sancta, faten-
 dum quoque est quod sit Scriptura diuinitus inspirata,
 quodq; Spiritu Sancto inspirante à suo autore sit edi-
 tus; qualis dici nullo pacto potest, si humana tantum in-
 dustria sine assistentia Spiritus Sancti conscriptus fuerit;
 quantumlibet postea testatus dicatur Spiritus Sanctus
 nihil in eo falsi contineri. Quod si autem tale quid vel
 de vno Sacræ Scripturæ libro concesserimus, eadem ra-
 tione & de multis alijs idem sentire licebit, ac nomina-
 tim de Euangelio Marci, de quo Hieronymus commemo-
 rat eum iuxta quod petrum referentem audierat
 Euangelium scripsisse, idque Petrum cum audisset
 probasse, & Ecclesiæ legendum sua autoritate edidisse.
 Verum cum id non sit ita accipiendum, quasi Euan-
 gelij illius historia à Marco fuerit humano Spiritu con-
 scripta, & postea diuino Spiritu per Petrum approbata;
 sed sic potius vt Petrus intellexerit, diuina inspiratione
 scriptum esse illud opus, ideoque sua autoritate com-
 probauit, & Ecclesiis legendum tradidit, cur non simi-
 le quid agnoscimus in libro secundo Machab. & quouis
 alio Sacræ Scripturæ libro, cui Apostolus aliquis vel
 Ecclesia auctoritatem dederit: non enim ideo inspira-
 tum aliquid diuinitus est, quia postea sit approbatum,
 sed ideo est approbatum, quia fuerat diuinitus inspira-
 tum: Neque enim approbatio seu testificatio Spiritus
 Sancti facit ipsum esse diuinum, quale prius non erat.

*Rom. 1.**1. Timoth. 3.**Rom. 1. & 1.**Timoth. 3.**Carth. 3. &**Trid.*

Denique manifesta est Augustini sententia Deum illis authoribus, vel per eos tunc quando scriberent locutum fuisse, idque vniuersos credere fideles.

*Lib. 18. de
civit. cap.
41.*

DE PRÆDESTINATIONE ET REPROBATIONE.

ASSERTIO I.

Augustinus definit quod prædestinatio est præscientia & præparatio beneficiorum Dei, quibus certissime liberantur quicunque liberantur. Quæ definitio valde bona est, si intelligatur de prædestinatione hominum, quæ susponit seruitutem & peccatum; & de certitudine ex præscientia, non ex mera præordinatione.

CENSURA.

Prædestinatio hominum lapsorum complectitur in primis salutem æternam, deinde omnia præsidia quibus eorum salus procuratur. Primum enim proposuit Deus ab æterno, quibus gratuito amore sui regni consortium tribueret: & hos à reliquis ad eum honorem non assumptis consilio suæ voluntatis separauit. Deinde modum & vniuersum ordinem apud se disposuit; secundum quem electorum salutem procuraret. Hunc ordinem assertor inuertit, faciens præscientiam & præordinationem mediorum priorem illa Dei præordinatione, qua certos præordinauit ad finem suum vltimum, vitam æternam; cum de fine primum disponatur. Secundo loco peccatur ea re in assertione, quod certitudinem prædestinationis pendere velit ex præscientia, & eò trahat verba Beati Augustini: cum sit ex absoluta Dei voluntate, diligentis, eligentis, ac præordinatis ad vitam æternam: ipsæque contrà Augustinus apertissime ad idem obiectum referat præscientiam de qua loquitur, ad quod prædestinationem; vt Prosper, ex Augustini sententia, in bonis prorsus eadem esse vult præcita &

*16. & cap.
17. 18. & 19.*

*Ad Capitula
Gall. sen-
tentia vlti-
ma.*

prædestinata. Assertor vero tam referre videtur ad ea quæ erat homo facturus, sicut ex assertionibus, 4. 11. 13. 20. & 30. potest intelligi: imò ex hac ipsa satis intelligitur: Quasi scilicet primum Deus considerasset quid liberum cuiusque arbitrium cum tali aut tali gratia, si daretur ei, facturum esset: deinde autem proposuisset ei dare talem gratiam, & denique gloriam. Ex quibus incidit in aliud maius absurdum, quod prædestinatio sit ex præuisione boni vsus liberi arbitrii. Quæ doctrina repugnat scripturis sacris & expressæ doctrinæ sancti ^a Augustini, ^b Prosperi, Fulgēt. & aliorum qui contra Pelag. & eorum reliquias catholicam de gratia Christi doctrinam erudite & laudabiliter defenderunt. Repugnat & definitionibus Cælestini Papæ in Epistola ad Episcopos Galliarum, & Leonis in Arausicano Concilio, ut alia ^d prætereamus, qui dum nullum bonum ad salutem vite æternæ pertinens in nobis esse designiunt^e, quod non in nobis, siue in cordibus nostris, atque in ipso libero arbitrio Deum operetur: ita ut omnis motus bonæ voluntatis sit ex Deo, qui agit in nobis ut quod vult velimus, & agamus, nec nostram expectet voluntatem, sed facit; quique, quoties bona agimus, in nobis atque nobiscum ut operemur operatur, sic ut nulla faciat homo bona, quæ non Deus præstet ut faciat homo: manifeste ostendunt, sub prædestinatione diuina comprehendere præparationem leu præordinationem omnis boni nostri, quo in vitam æternam tendimus, iuxta Scripturas, ^f sine me nihil potestis facere, Deus est qui operatur in nobis & velle & perficere: Qui gloriatur in Domino gloriatur: Quis te discernit? Quid habes quod non accepisti? Creati in Christo Iesu in operibus bonis, quæ præparauit Deus, ut in ipsis ambulemus: & alia huiusmodi, quibus ad defendendam Christi gratiam Sanctus Augustinus & alii copiose vsi sunt. Quò peculiariter faciunt ea, quæ electionem seu prædestinationem non ex operibus, sed ex vocante secundum propositum voluntatis

a Epi. 105 & 106. lib. de corrupt. & gratia de prædest. cap. 55. de dono perseuer. lib. 2.

ad Simplician. Hypognosticon lib. 6.

b Prof. passim in opusculis

c Fulg. lib. de incarn. Christi, & de fide ad Petrum, & de duplici prædest. ad Maxim.

d Vide Epistolam Prosperi & lib. ad August.

e Cælest. ad Episcopos Gal. cap. 9. 10.

f 11. 12. & 13. Arausic. Concil. can. 4. 9 & 10.

g Ioh. 15. ad Timoth. 2. ad Titum. 3.

Philip. 2. 2. Cor. 10. 1. Corinth. 4. Ephes. 2. Roman. 2. 8. 11. Ephes. 1. & 2.

diuinæ

diuinæ, asserunt: & ad occulta Dei iudicia referunt, cur alius præ alio eligatur. Item promissiones illæ noui testamenti. Ezech. 11. & 36. *Non propter vos ego faciam, sed propter nomen sanctum meum: & dabo vobis cor nouum, & ponam spiritum nouum in medio vestri: & auferam cor lapideum de carne vestra, & dabo vobis cor carneum: & Spiritum meum ponam in medio vestri: & faciam vt in præceptis meis ambuletis, & iudicia mea custodiat, & operemini.* Et Hierem. 31. *Dabo legem meam in visceribus eorum, & in corde eorum scribam eam.* Et Deuter. 30. *Circumcidet Dominus tuus cor tuum & cor seminis tui, vt diligas Dominum Deum tuum in toto corde tuo & in tota anima tua.* Cum enim per legem non esset iustitia: nec data fuisset lex, quæ posset viuificare, promisit Deus, deinde & misit filium suum, per quem iustificatio legis impleatur in nobis, Deus enim facit quod prædestinauit, & complet quod promisit. Prædestinatione quippe eo Deus præseinit, quæ fuerat ipse factururus, ait Augustinus in libro de prædesti. cap. 15. item, *Deus non de nostra voluntatis potestate, sed de sua prædestinatione promisit: promisit enim quod ipse factururus fuerat, non homines: quia eisi faciunt homines bona, quæ pertinent ad colendum Deum, ipse facit vt illi faciant quæ precipit, non illi faciunt vt ipse faciat quod promisit Alioquin vt Dei promissa impleantur, non in Dei, sed hominum est potestate.* Sic ille. In eiusdem rei typum etiam illa veteris testamenti de terra Chanaan populo Israël danda promissio (lex enim spiritualium est rerum figura, & noui testamenti allegorias continet) non nitebatur vllis populi illius præuiis meritis, sed mera liberalitate voluntatis diuinæ. Neque enim, inquit, *propter iustitias tuas & auitatem cordis tui ingredieris, vt possideas terram gentium illarum, sed vt compleretur verbum suum Dominus, quod sub iuramento pollicitus est patribus tuis Abraham, Isaac & Iacob.* Vnde & terra illa nomen accepit, vt vocaretur terra promissionis vsque in hodiernum diem. Præterea manifeste nobis commendat hanc prædestinationis gratiam oratio Dominica, qua Deum oramus vt à nobis sanctificetur nomen eius, & fiat à nobis voluntas eius, & in tentationem non

g Ad Rom.
9. & 11.
Aug. Epis.
14. & 105.
& sape alibi.
Ad Heb. 8.

Ad Gal. 1.
& 3.

Cap. 10.

Vide & Epi-
istolam 105.
ad sextum.

Rom. 8.

Deuter. 9.

inducamur; adeo ut si alia documenta non essent (ait Augustinus de dono perseverantiæ cap. 7.) hac oratio Dominica nobis ad causam gratiæ quam defendimus, sola sufficeret.

Quamquam gratiam commendant & euidenter asserunt & aliæ preces Ecclesiæ, de quibus eodem loco Augustinus: attendat Ecclesia quotidianas orationes suas. Orat ut increduli credant; & Deus ergo eos cōuertit ad fidem. Orat ut credentes perseverent; Deus ergo donat perseverantiam usque in finem. Hæc Deus facturū se esse promissit. Ipsa est prædestinatio sanctorum. Et Celestinus Papa ad Episcopos Galliæ ca. 10. Obsecrationum quoque sacerdotalium sacramenta respiciamus, quæ ab Apostolis tradita, in toto mundo atque in omni Ecclesia catholica uniformiter celebrantur, ut legem credendi lex statuat supplicandi. Ac demum enumeratis iis quæ in die Parasceues pro omni hominum genere orat Ecclesia, concludit: Totum diuini operis esse sentitur, ut hæc efficienti Deo semper gratiarum actio, laudisque confessio pro illuminatione talium vel correctione referatur. Vnde rursum Augustinus, lib. 2. contra duas Epistolas Pelagij testatur, nihil homini in Scripturis Sacris iuberi à Deo propter probandum liberum arbitrium, quod non inueniatur vel dari ab eius bonitate, vel posse propter adiutorium gratiæ demonstrandum.

Hinc est illud ab Augustino frequentatum, fremente licet ac indignante Pelagio: Domine da quod iubes, & iube quod vis: Et illud eiusdem à Prospero repetitum: dona ipse quod mandas. Quod idem Ecclesia orat in Sabbato Sancto dicens; da nobis velle & posse quod præcipis. Cuncta igitur bona nostra ad prædestinationem Dei sunt referenda, ut prædicare prædestinationis beneficium, non sit aliud quàm prædicare Deum omnia bona in electis suis operari, uti docet Augustinus lib. de dono perseverantiæ cap. 17. Declarat præterea hanc prædestinationis doctrinam ipsum primarium gratiæ ac prædestinationis nostræ exemplar. Christus homo Deus, qui cum ad eam dignitatē ob nullam præuisionem liberi arbitrii motum fuerit prædestinatus, satis ostendit nihil amplius tribuendū esse homini lapsō in sua ad gloriam

Vide & Innoc. in Epistola ad Con. Auiens. qua est 93. apud Aug. & ipsum Aug. Epistola 107. Et li. d. dono persever. cap. 27. & Catechismus Parochoarū lit. pro quibus orandum.

Cap 10 Trē in serm. quodam contra Pelagian. fragm. 1.

Lib. 1 confess. ca. 19. lib. de dono persever. cap. 20. Vtque in Psal. 118.

De prædest. sanctorum ca. 25. de dono

prædestinatione, vti multis locis ratiocinatur Augustinus. His accedit, quod negari non potest, paruulos saltem qui per ceptum regenerationis sacramento ante vsum rationis decedunt, ex sola Dei præordinatione, non ex vlla præuisione liberi arbitrij prædestinatos esse; vt ad inscrutabilia Dei iudicia referendum sit, cur illi prædestinati sint, non alij. Quo argumento sæpissime vtuntur veteres: quo & inter neotericos vtitur R. P. Theod. Peltanus ex Societate nominis Iesu Theologus in libr. de satisfactione nostra, sectione 10. ita inquit, *Secreta æterni patris electione sit vt æconomia Christi fructus effectusque quibusdam elementer conferatur, aliis iusto iudicio subtrahatur, quemadmodum id varij infantium casus minime obscure nobis ostendunt.* Quin & ipse harum assertionum author nonnullos adultos, sola Dei præordinatione electos non videtur abnuere, quandoquidem dicat in assertione 10. *forte in Paulo, Magdalena, aliisque nonnullis, dum conuerterentur, efficaci gratia excitatione voluntatem fuisse infallibiliter determinatam.* Confirmatur denique doctrina hæc illa prædestinationis apud Augustinum definitione, quam assertor in alium sensum diuertere conatur, quandoquidem & scopus Authoris, & totus loci contextus, atque adeo verba proxime præcedentia, vbi dicitur, *Deum prauidisse sua beneficia, quibus nos liberare dignatur*, hunc sensum postulent. Eundem Augustini locum olim à quibusdam excerptum & interdubia relatum tractans Prosper, quando negasset verbis illis absque graui errore resisti posse, subiungit: *agnoscamus itaque soper enter, pieque fateamur, præscisse incommutabilem Deum, quibus esset daturus vt crederent, aut quos daturus esset filio suo, vt ex ijs non perderet quemquam: & si hæc præscriuit, beneficia sua, illum, quibus nos dignatur liberare, præscinisse.* Et hæc esse prædestinationem sanctorum, præscientiam scilicet preparationem gratia Dei, qua certissime liberantur quicumque liberantur. Ceteros autem quicumque non liberantur, quos à generali perditione humani generis, gratia non exemit, iusto nouerimus iudicio non exemptos: & quid nobis remissum

perseu. cap. ult. de corrup. & Grat. cap. 11. li. 2. de peccat. mortis & remissis. c. 17. Enchir. cap. 37. tract. 82. in Ioan. Epistola. os 106 l. 4. contra Iul. c. 8 & de dō perse. 12. Enchir. c. 93. prof. & Hil. in Epistolis ad Aug. prof. ad Ruf. & lib. 1 de vocat. gentium. c. 16 Fulgent de Incarn. Chr. si cap. 30.

Lib. de dono perseu. c. 14.

Ad excerpta Genuen. sium dub 8.

sis in eis discamus sic ille. Hanc orthodoxam de prædeterminatione Dei doctrinam à Massiliensibus & Fausto fati nomine malitiose infamatam Sanctus Prosper & Fulgentius post Augustinum ita retinendam docuerunt, vt ei repugnantes nec pie nec catholice sapere constanter affirmarint. Sic enim Prosper scribit in Epistola ad Ruffinum: Ab hac confessione gratia Dei ideo quidam resiliunt, ne cum eam talem confessi fuerint, qualis diuino eloquio predicatur, & qualis opere suæ pietatis agnoscitur, etiam hoc necesse habeant profiteri, quod ex omni numero hominum per sacula cuncta natorum certus apud Deum definitusque sit numerus prædestinati in vitam æternam populi, & secundum propositum vocantis Dei electi. Quod quidem tam impium est negare, quam ipsi gratia contraire.

Et alibi de Augustino sic ait: Quamuis nunquam tam insipienter locutus sis ad populum Christianum, & id quod mendax obretractatio ineptissime finxit, horrueris, pia tamen constantique doctrina abundanter probauit predicandam Ecclesiæ esse prædeterminationem, in qua est gratia preparatio, & gratiam, in qua est prædeterminationis effectus, & præscientiam Dei, in qua ante secula æterna quibus esset collaturus sui dona præsciuit: cuius prædeterminationis quisquis est impugnator, apertissimus est Pelagij adiutor. Hæc Prosper. Cuius verba & sententiæ in toto hoc argumento gratiæ & prædeterminationis eo plus valere debent apud cordatum quemque, quod ex auctoritate Sedis Apostolicæ reliquias Pelagij fuerit persecutus, & opuscula eius vt religiosissimi viri (reiectis Cassiani Presbyteri Massiliensis, & Fausti Regiensis Episcopi opusculis, vt apocryphis) approbauit Gelasius Papa cum Concilio 70. Episcoporum. Fulgentinus autem primùm quidem de prædeterminatione post alia multa scribit in hunc modum: Hic nihil prouenit in salutem hominum, quod ille non in æterna bonæ voluntatis suæ dispositione faciendum prædestinauerit, à quo & fides gratis infunditur, per quam bene ambulemus, & perseuerantia donatur, per quam ad speciem peruenire possimus. Hæc autem dona sua semper Deus in æterna atque incommutabili habet voluntate disposita, in qua præordinauit atque preparauit, & quæ daret, & quibus daret: ipse cau-

Pros. in Epistola ad Ruffin. Item ad cap. 1. & 6 Gallo. Faustus eam passim fassi nomine traduci: in 2. libri de Grat. & libero arb.

Ad excerpta Gall. & Genuesium in fine

In præfat. ad obiecta Vincent.

Cap. sancta Romana Ecclesia. Lit. de Incarna. & Gratia Christi. ult. vide eundem lib. 1. ad Monachum.

tem prædestinando præparauit gratia donū, qui gratiā donando implet prædestinationis effectum. Et paulo post, Deus enim, qui hominem condidit, ipse prædestinatione sua & donum illuminationis ad credendum, & donum perseuerantiæ ad proficiendum, atque permanendum, & donum glorificationis ad regnandum, quibus dare voluit, præparauit, quique non aliter perficit in opere, quàm in sua sempiterna atque incommutabili habet voluntate dispositum. Deinde quàm tutum sit ei doctrinæ resistere, his verbis declarat: Cuius prædestinationis veritatem, qua nos ante mundi constitutionem prædestinatos in Christo testatur Apostolus, si quis detrectat cordis credulitate recipere vel oris confessione proferre, si ante vltimum diem vitæ presentis impietatis suæ contumaciam, qua Deo viuo & vero rebellis obssistit, non abieceris, manifestum est eum non pertinere ad eorum numerum, quos Deus in Christo ante mundi constitutionem gratis elegit & prædestinauit ad regnum, hæc Fulgentius. Sic & auctor hypognosticon plane pronunciat, dicens; prædestinationem negare, quam apud Deum esse breuiter probauimus, immanis blasphemia est. Quæ cum ita sint, vt aliā multa ad hoc argumentum pertinentia omittamus, non potest non peregrina, & periculosa, & proinde merito reprobanda videri doctrina, quæ prædestinationem ex operum præuisione definit. Quam quidem & ante 140. annos Facultas Theologica Parisiensis damnasse legitur sub hifce tribus articulis; Quod propter opera alicuius futura bona Deus prædestinauit aliquem ab æterno: Quod aliquis prædestinatus est ab æterno propter bonum vsum liberi arbitrii, quem Deus præscinit eum habiturum: Quod non sic grati & misericorditer Deus prædestinauit illum quem prædestinauit, quin & pro omnibus bonis ipsius futuris, vel alterius.

In fine lib.
6.

Habetur
inter errores
à Facult.
Theolog.
Parisensi.
damnatos

ASSERTIO II.

Deus post primum peccatum originale habuit voluntatem dandi Adamo & toti eius posteritati sufficientia media contra peccata, & auxilia ad consequendam vitam æternam: Ergo dat illis sufficiens auxilium vt possint reuerti.

G. iij,

CENSURA.

Vult hæc assertio à Deo per Christum omnibus omnino hominibus dari. Sufficiens auxilium, per quod possint conuerti; idque magis & sequentes aliquot assertiones, præsertum, 7. & 16. declarant sufficiens autem Dei auxilium est præter quod ex parte Dei non est aliud necessarium. Aduersantur proinde huius assertionis verba Scripturis & Patribus, imò proprie dictam Christi gratiam, quæ secundum Augustinum *non est bonis malisque communis, sed bonos discernit à malis*, euertere videtur. Scriptura testatur quod in præteritis quibusdam generationibus *dimisit Deus omnes gentes ingredi vias suas*; quod quibusdam non auxiliatur; quod multi ab eo deseruntur & dimittuntur secundum desideria cordis sui. Vnde etiam fideles, intelligentes nondum sibi sufficere auxilium quod habent, & hoc ipsum subtrahi posse, orant cum psalmista; *Adiutor meus esto, ne derelinquas me*. Deinde, eadem scriptura teste, nec pro omnibus Christus orat Patrem, nec omnes Christo dati sunt à Patre. Ite enim, *non pro mundo rogo, sed pro ijs quos dedisti mihi*. Non omnes ergo habent sufficiens auxilium ex parte Dei ad salutem consequendam. Nam alioquin, & iam Christo pro ijs non orante, & patre eos non dante, salutem consequi possent: quod nemo Catholicus dixerit. Item dici non potest, eos omnes habere sufficiens auxilium ad salutem quibus Euangelium Christi, sine cuius fide nemo potest saluari, non est prædicatum. Nam, ut ait Apostolus, *quomodo credent ei quem non audierunt?* &c. *auditus autem per verbum Christi*: quod certum est non omnibus Adæ posteris annuntiatum fuisse. At neque illi, quibus Euangelium prædicatur, credere possunt, nisi Deus cor eorum aperiat, ut predicationi intendant. Quod non in omnibus, sed in quibusdam tantum fieri, ex scriptura manifestum est. Vnde Prosper, *Nunquid dubium est*, ait, *cum verbum veritatis prædicatur, alios*

Lib. de
præd. sanc.
c. 5.

Act. 15.

Psal. 80.

Psal. 26.

Ioan. 17.

Rom. 10.

Vide Aug.
lib. 1. de
pcc. mer.
cap. 22.

Act. 16. 24.
ad Coloss. 4.

Ad excerpta
Genuen.

dub. 4.

Vide Aug.

voluntate credere, alios voluntate non credere? sed cum illo-
rum cor Deus aperuerit, illorum autem non aperuerit, discer-
nendum est quid veniat de misericordia, & quid de iudicio. Sic
ille. Præterea nec debuissent Moyses & David adeo glo-
riose prædicare auxilia data vni populo Dei, vt dice-
rent, *Non est alia natio tam grandis, que habeat Deos appropin-
quantes sibi, sicut Deus noster adest cunctis obsecrationibus no-
stris; & non fecit taliter omni nationi, & iudicia sua non ma-
nifestauit eis*. Si omnibus omnino sufficienter auxiliatus
fuiſſet Deus ad salutem. Parum enim interest, quibus
modis aut medijs auxilium illud detur, dummodo de-
tur sufficiens. Merito igitur Augustinus Epistola 107.
ad Vitalem inter sententias, quas dicit ad fidem rectam &
Catholicam pertinere, has posuit: *Scimus gratiam Dei non
omnibus hominibus dari, scimus eis, quibus datur, misericordia
gratuita dari: scimus, eis, quibus non datur, iusto iudicio non
dari*. Et idem in Epistola ad Paulinum, 106. refert Pe-
lagium noluisse videri sine gratia Dei defendere libe-
rum arbitrium, cum possibilitatem volendi ac operan-
di, sine qua nihil boni velle atque agere valeremus, à
creatore nobis insitam diceret; *Vt hæc intelligatur*, in-
quit, *doctore ipso; Gratia Christi, que paganis atque Christia-
nis, impijs & pijs, fidelibus atque infidelibus communis est*.
Quamuis ergo hæc assertio à Pelagij sententia in eo dif-
ferat, quod hic Creatori, illa Redemptori gratiam
istam acceptam referat; in eo tamen conuenit, quod
vterque eam tantum in possibilitate constituit, omni-
busque facit communem. Quod Augustinus pro ab-
surdo habet. Vnde idē & alibi ad inscrutabilia Dei iudi-
cia vult pertinere, quod huic detur gratia, huic non de-
tur; gratiam haud dubie intelligens, auxilium ex parte
Dei ad salutem necessarium. *Hæc gratia, inquit, cur ad illum
veniat, ad illū non veniat, occulta causa esse potest, iniusta esse non
potest*. Alias vero parvulorū sine baptismo decedentium
exemplum producit, quo tanquam inuicto argumento
ostendat, ex parte Dei omnibus hominibus sufficiens
non adesse salutis subsidium. *Quomodo dicitur*, ait in Epi-

de prad.
sanct. cap.
5 & 9.

Item serm.
de ver. A-
postoli cap 2.

Lib. 1. de
pac. mer. ca.
21. vide etiam
de prad. 55.
cap. 6. & 9.
de dono per-
seu. cap. 8.
tract. 16. in
Iohannem de
gratia & li.
arb. cap. 13.
vid. &
Prosp. ad
excep. 4.
Gen. dub. 4.
5. 6. & 8. &
lib. 1. de vo-
ca Gen. ca.

ultimo &
Fulg. de in-
carnatione
Christi.

Lib. 4. com.
Iul. cap. 8.

istola 107. omnes homines gratiam Dei fuisse accepturos, si non illi, quibus non donatur, eam sua voluntate respuerent, cum multis non detur paruulis? Etiam eodem argumento, ut supra diximus, inter Neotericos vsus est K. P. Theodorus Peltanus Soc, lesu Theologus. Quod si sententiam de solis adultis accipiendam quis putet, iam, ut ait Augustinus, intolerabilior sequetur absurditas. Isto enim modo beneuolentior in faciemus Deum omnibus impijssimis & scelestissimis hominibus, quam innocentissimis & ab omni labe peccati æternis purissimis. Sicque fit, inquit, ut Deus ipse Christianos omnes fieri velit, quorum multi nolunt; non omnes velit, quorum est nemo qui nolit. Iam qui legerit Prosperi librum vtrūque de vocatione gentium, & alia eius opuscula contra Pelagianorum reliquias elaborata, ac præcipue carmen de Ingratis, in quo doctrinam hanc ex professo refellit; Itēque Fulgentij & Petri Diaconi, de gratia Christi libellos, prospiciet quantum ab illorum Patrum sana doctrina discrepet hæc sufficientis auxilij assertio ex Massiliensium & ipsius Fausti (qui contendit gratiam à Deo omnibus offerri & ingeri, & argumenti de paruulis solutionem desperans cap. 13. ineptissime nugatur) doctrina & placitis deprompta. Nec porro verum est, quod sumit assertor, Deum habuisse voluntatem dandi Adamo ac toti eius posteritati sufficientia media & auxilia ad consequendam vitam æternam, si de voluntate Dei absoluta, quæ beneplaciti vocatur, loquatur, de qua assertionem loqui ex illatione patet. Eam enim voluntatem si habuisset, qui omnia quacūque voluit fecit, haud dubie dedisset omnibus & gratiæ suæ & perscuerantiæ donum; quæ ad consequendam vitam sunt necessaria; atque ita omnes saluarentur.

A.S.S.E.R.T.I.O. III.

Tota Scriptura plena est præceptis, & exhortationibus, ut peccatores conuertantur ad Deum: Atqui Deus non

non præcipit impossibilia: ergo dat illis sufficiens auxilium vt possint conuerti.

CENSURA.

Inepta est collectio. Qui enim iubet vt faciamus, simul iubet vt petamus quod facere non possumus, siue ad quod sufficiens auxilium nondum habemus. Vnde Patres Concilij Tridentini verbis ex Augustino desumptis; *Deus impossibilia non iubet, sed iubendo monet & facere quod possis, & petere quod non possis.* Ac similiter alibi Augustinus, *Magnum aliquid, ait, Pelagiani se scire putant, quando dicunt, non iuberet Deus quod sciret ab homine non posse fieri. Quis hoc nesciat? sed ideo iubet aliqua que non possumus, vt nouerimus quid ab illo petere debeamus.* Sic ille. Si autem petentes quidam nondum possunt, quanto minus possunt non petentes, imò nec petere volentes, nec eum à quo petatur agnoscere? Nec ob id putandum est aliquid impossibile iuberi. Nam præter liberum arbitrium, quod, hac vita durante, ita potest ad bonum & ad malum flecti, vt nondum in alteram partem sit immobiliter determinatum, sicut in beatis & damnatis, etiam ipsum auxilium sine quo Dei præcepta à libero arbitrio impleri non possunt, & per quod possint, omnibus petentibus est paratum, dicente Domino, *pétite & accipietis.* Non enim præcepta & exhortationes conuincunt iam omnibus datum esse, iamque ab omnibus haberi tale auxilium; sed remittunt ad illum qui dare potest, vt ab eo petant quod nondum acceperunt. Quod si omnibus adest, etiam antequam petatur, aufertur nobis magna pars orationis Dominicæ & precum Ecclesiasticarum. *Quid enim stultius, ait Augustinus, quàm orare vt facias quod in potestate habes?* Vnde ex ipsa orationis necessitate manifesto argumento colligitur, non omnes statim cum præcepto & exhortatione habere sufficiens auxilium adimplenda Dei mandata, quando quidem *legem credendi*, vt Pontifex ait, *Lex statuit sup-*

*Sess. 6 c. 11.
De natura
& gratia c.
43.*

*De grat. lib.
arbit. cap. 16.
vid. etiam
cap. 15. &
de pers. sust.
cap. 5 & 10.*

*Vid. Prosp.
ad 6. obiect.
Vinc.*

*De natura
& gratia c. 15.*

ep. ad Celest.

Episc. Gal-
lia.
Item Aug.
de dono per-
seu. cap. 14.

58

CENSURA DVACENSIS.

*plicandi. Quamvis igitur, ut idem Augustinus ait, dica-
mus Dei donum esse obedientiam, tamen homines exhortamur ad
eam. Sed illis, qui veritatis exhortationes obedienter audiunt,
ipsum donum Dei datum est: illis autem qui non sic audiunt, non
est datum.*

ASSERTIO IV.

Dices, Deum quidem omnes vocare ad pœnitenti-
am, sed non secundum propositum, aut non illa vo-
catione quæ est sine pœnitentia. Resp. hoc videtur alie-
num à bonitate Dei, quia hoc non esset serio, sed delu-
sorie vocare, si vocaret aliquem non ex intentione ut
conuertatur. Augustinus autem, *ut in scholio additur,*
propositum Dei accipere videtur, ut sit idem quod illo
modo quo novit illum secuturum.

CENSURA.

In rep. 9.

Apostoli Pauli doctrina est ad Rom. 8. & 11. non om-
nes homines, sed solos electos seu prædestinatos vocari
secundum propositum, & ea vocatione quæ est sine pœ-
nitentia. Neque alienum est à Dei bonitate, aut ut
assertor post Catharinum cauillatur, delusoria aut de-
risoria ea vocatio, qua vocat multos non secundum pro-
positum: quia vocationis diuinæ primus finis est homi-
nis conuersio, etiamsi illa non sequatur. Quod enim
quispiam vocatus non conuertatur, propriæ eius mali-
tiæ imputandum est, quod autem conuertatur, voca-
tis bonitati & potentiæ ascribendum est. Hinc Prosper
libr. 2. de vocatione gentium capite 13. *Cum talia ad
Cain loqueretur Deus. (Genesis 4.) nunquid ambiguum est
voluisse eum, & (quantum ad illum medendi modum sufficiebat)
egisse, ut Cain ab illo impietatis furore respiceret? sed malitia
persinax inde facta est inexcusabilior, unde debuit esse corre-
ptior.* Neque verò Dei intentio frustratur, si qui voca-
tur, non conuertitur: quia in hominum vocatione non

solam hominum conuersionem absolute Deus intendit (semper enim tunc sequeretur) sed alios etiam fines; veluti vt declararetur humanæ vel infirmitatis, vel malitiæ magnitudo quanta sit, cum non sequitur vocantem. Item, vt excellentiam gratiæ suæ declararet & necessitatem, vtpote sine qua nemo credere vel pœnitentiam agere possit; vt ita omne os *obstruatur, & subditus fiat omnis mundus Deo*; nec quisquam *nisi in Domino gloriatur*. Sic quamuis non esse pœnitentiam aucturos Iudæos Christus probe cognosceret, iis tamen apud Matthæum voluit plurimas virtutes facere: sicut & olim iis legem dederat, quam tamen vel in ipso capite ab iis non semel violatum iri præsciebat. Porro scholium additum, quo propositum Dei quasi ex mente Augustini exponitur, vt idem sit quod, *comodo quo nouit hominem secuturum*, tam Apostoli quam Augustini doctrinæ penitus aduersatur; qui prædestinationem non ex præuiso aliquo opere humano, sed ex sola Dei misericordia eligentis, & beneficiorum eius preparatione, vterque definit: quemadmodum ad primam assertionem annotauimus plenius. Atque hoc intelligi Dei propositum apud Apostolum ad Romanos 8. patet alia cum isto loca eiusdem Apostoli conferenti, veluti Rom. 4. 1. Cor. 1. 2. ad Tim. 2. Neque enim ita de speciali auxilio gratiæ sentiendū est, quemadmodum hoc scholio indicatur, Deum sic illud offerre, vt expectet assensum & sequelam voluntatis humanæ, iisque, quos secundum propositum vocat, eo offerre modo quo præsciuit illos secuturos: quasi non & ipsum liberæ voluntatis assensum, & sequelam, tanquam præcipuum quendam suæ prædestinationis effectum, in iis omnibus efficaci virtute gratiæ suæ operetur: aut quasi non etiam rebelles ad se compellere volentes posset, etiam eorum, quos præuidit, vel si quos saltem præuidisset, tam duos & contumaces fore, vt nulla omnino oblatione moti, nulla pulsatione excitati, sequi vellent: quod quidem sentire, est à publicis Ecclesiæ vocibus, & ab Augustini aliorumque Patrum

Rom. 9.
1. Cor. 1.

August. in
illud ad Gal.
lex propter
transg. possi-
ta est.

Con. Araus.
can. 4.

in Sabb. post.
Do. 4. quad.
& in Dom.
4. post. pentec.
est & Aug.
epist. 107.
cap. 8.

doctrina palam dissentire. Testatur enim ille lib. de prædestinatione sanctorum, gratiam quæ occulte humanis cordibus diuina largitate tribuitur à nullo duro corderespui, cum ideo tribuatur ut duritia cordis primis auferratur. Et scribens in Pl. 88. de quibusdam pessimis, volunt, inquit, illi etiam cum desperatione peccare, & stare omnino in peccato, ut offendant oculos Patris: Nonne Deus de lapidibus suscitabit filios Abraham? Et de corrept. & gratia cap. 8. An audetis dicere, rogante Christo ne deficeret fides Petri, defecturam fuisse, si Petrus eam deficere voluisset? Et c. 14. Volenti Deo saluum facere, nulum hominis resistit arbitrium. Paulo post, Non est dubitandum voluntati Dei humanas voluntates resistere non posse, quominus faciat ipse quod vult; quandoquidem etiam de ipsis hominum voluntatibus quod vult facit. Item Epist. 107. Deus non credentibus, & eius doctrinam voluntate impia persequentibus misericordiam prærogauit, eosque ipsos omnipotentissima facilitate conuertit, ac volentes ex nolentibus fecit. Et omnium apertissime in Enchiridio cap. 18. Quis, inquit, tam impie desipiat, ut dicat, Deum malas hominum voluntates, quas voluerit, quando voluerit, ubi voluerit, in bonum non posse conuertere? Sic & Prosp. in carm. de ingratis, contra eos disputans qui gratiæ tantum excitandi tribuunt officium, airi

*At vero omnipotens hominem cum Gratia saluat,
Ipsa suum consummat opus, cui tempus agendi
Semper adest quæ gesta velit; non moribus illi
Fit mora, non causis anceps suspenditur ullis.*

Et idem alibi. An dicendum est, voluntati Dei humanas obfistere voluntates? Et tam feros, tamque intractabiles hominum mores, ut Euangelium audiant, & predicationi impia corda non pateant? Et quis istis corda mutauit, nisi qui finxit sigillatim corda eorum? Rursumque lib. 1. de vocatione Gentium. Nunquid virtus Gratia, quæ sibi quos voluit subdidit, connestere eos qui inconuertibiles permanserunt, non potuit? Vnde alibi testatur, non solum Tyrios & Sydo-

De gra. li.
arb. cap. 12.

Ad excor-

nios, sed etiam Corozain & Bethsaida potuisse conuerti, & si-
deles ex infidelibus fieri, si hac voluisset in ijs Dominus operari.
Tale est & illud Ambrosii de Samaritanis Christum re-
cipere nolentibus, Nam si voluisset Christus, ex indemoniis fe-
cisset denotos. Si enim, ut aiebat Hieronymus, in magnete
lapide & succinis hæc est vis, ut annulos, & stipulam, & festu-
cam sibi copulens; quanto magis Dominus omnium creaturarum
ad se trahere poterat quos volebat, & alia eiusmodi multa.
Non ergo Deus tempus & locum, vel etiam modum
seruat, quo præuidit hominem secuturum, sed ipse
omnino sua potentissima gratia, & nihilominus salua
hominis libertate, facit ut infallibiliter sequatur quem-
cunque secundum propositum vocare dignatur. Si au-
tem, iuxta assertorem, alienum à bonitate Dei reputa-
ri non debet, nec eius quasi delusoria haberi vocatio, si
qui homines omnes saluos vult fieri, non tamen vocet
omnes eo modo, quo, si vocarentur, scit eos infallibi-
liter secuturos vocantem (quos proinde nec vocare vi-
detur ex intentione ut conuertantur, sciens videlicet
eos eo modo non conuertendos, qui alio modo vocati
conuerterentur) gratis profecto cauillatur, delusoriam
eiusdem fore vocationem, si quosdam vocet non secun-
dum propositum, aut non illa vocatione quæ est sine
pœnitentia.

pta Genueu.
cap. 8.

Libra 7. in
Luc.

Vide etiam
Basil. verba
ad assertio-
nem 2.
Et Chrys. in
illud Ioan.
6. nisi Pater
traxerit eum.

ASSERTIO V.

Iubentur omnes baptizari: Ergo Deus, quantum in
ipso est, vult omnibus dari gratiam Baptismi.

CENSURA.

Quidquid Deus præcipit, idem & vult, voluntate
signi, quæ in præcepto consistit; non semper autem vo-
luntate absoluta, quæ bene placiti est: At neque sic, ut
velit omnibus, quibus præcipit aliquid, iam adesse suf-
ficiens auxilium ad id quod præcipit implendum; ut su-

pra ostensum est. Vnde pater, etiamsi quod sumitur verum esset, efficaciter tamen non inde colligi quod intenditur. At neque hoc verum est. Certum enim est, non omnes obligari præcepto de baptismo suscipiendo, sed eo tantum, quibus est promulgatum. Quod autem ad hanc attinet assertionem, Deus quantum in se est vult omnibus dare gratiam baptismi, ea primùm manifestam in paruulis exceptionem habet. Vnde ait Augustinus, quod plerumque festinantibus parentibus, & paratis ministris ut baptismus paruulo detur, *Deo tamen nolente non datur*. Et in Ep. ad Vitalem 107. *Multi, inquit, salui non fiunt, non quia ipsi, sed quia Deus non vult: quod sine ulla caligine manifestatur in paruulis*. Quare dici non potest Deus, quantum in ipso est, ipsis voluisse dare gratiam baptismi. Deinde nec deadultis verum est, si significetur, uti vult assertor, omnibus adesse sufficiens auxilium, sic ut ex parte Dei nihil amplius requiratur ad gratiam baptismi consequendam. Eam enim nemo adultus consequitur absque fide & pœnitentia, *fides enim prima datur, ex qua impetrantur cetera*, ait Augustinus. Constat autem non omnibus dari fidem & pœnitentiam. *Non enim omnium est fides*, & de quibusdam dicitur, *nequando det illis pœnitentiam*.

*De dono
per se cap
12.*

*De prædest.
sancti c. 7.
1. Thess 3
2. ad Tim.
2. 1. Cor. 2.*

ASSERTIO VI.

*Ep 107. &
de prædest.
cap. 8.*

Hunc locum (*Deus vult omnes homines saluos fieri*) vult omnes saluos fieri qui salui fiunt, non videtur exponere Augustinus secundum intentionem Apostoli; & sex ampliusque argumentis dicta interpretatio oppugnatur.

CENSURA.

Sic ille, cum nonnulla, ut videtur, trepidatione de bona sanctissimi doctissimi que Ecclesiæ doctoris expositione pronuntiat. Catharinus verò, eandem quam assertor secutus doctrinam, audet & dicit, *talibus glossis lacerari & de-*

strui verbum Dei. Nec dissimiliter in suo hyperaspiste Erasmus similia sapiens, sugillat & carpit optimi doctoris sensum, quem in allegandis, pro defensione gratiæ Christi, scripturarum testimonijs producere solebat contra Pelagianos. Estque vbi generalius pronuntiare ausus fuerit, *Nusquam à veteribus peccatum esse magis, quam in veris atque germanis diuinarum scripturarum proferendis intelligentijs, quando contra hereticos veritatem propugnabant Catholici.* Quæ quidem licentia quid aliud quam petulantibus ingenijs auribusque prurientibus fenestram, ne dicamus patentissimam portam, ac viam aperit, per quam damnatæ olim & subinde exterminatæ hæreses iterum reuocentur in orbem? Quamuis igitur huius Apostoli sententiæ reperiantur & aliæ probabiles expositiones, tum apud alios Authores, tum apud Augustinum, probari tamen non potest quod hæc vna expositio, quæ non modo Augustino, sed & Prospero, & Fulgentio, alijsque doctis visa est scopo & contextui Apostolico bene congruere, studiose ad hoc impugnetur, vt illi interpretationi locus fiat, quæ habet, Deum omnibus hominibus sufficiens ad salutem auxilium dedisse: *Vt videlicet intelligamus, ideo non omnes saluos fieri, & in agnitionem veritatis venire, ait contra Iulianum Augustinus, quia ipsi nolunt petere, cum Deus velit dare: nolunt querere, cum Deus velit ostendere: nolunt pulsare, cum Deus velit aperire.* Quasi non & ipsum petere, querere, pulsare diuinæ gratiæ virtus in homine operetur. Qui sensus & Massiliensium olim fuit, & à Prospero, Fulgentio, atque ab Augustino reiectus, ac ex professo oppugnatus.

Lib. 1. de ratione vera Theol. versus finē.

Prosp. Ep. ad Ruf. Ad c. 8. Gal. c. 1. de vob. Gen cap. 12. Fulgen. de incarn. & grat. Christi cap. 31. Author hypog. lib. 6 cap. vltimo. Lib. 4. contra Iulia. cap. 8. Ep. ad Vit. 107. & Prosp. Episc. ad Ruf.

ASSERTIO VII.

Deus voluit dare Christum in redemptionem pro omnibus, nullo excepto: Ergo omnibus præparauit sufficientia media per Christum. Probatur consequentia, quia eatenus est Christus omnium Redemptor, quatenus per ipsum donantur omnibus sufficientia me-

dia, quibus resurgant à peccatis. Si enim non darentur sufficientia, verus non esset eorum Redemptor: quia neque quoad sufficientiam, neque quoad efficaciam.

CENSURA.

Lib. I cap.
16.

Respons. 1.
ad obiect.
Vincens.
habetur etiā
ad cap. Gal.
Resp. 9. &
Sentent. 9.
B. quoque
Thomae
de veris.
quest. 19. ar.
7. ad 4. &
par. 3. quest.
18. art. 3.

Huic argumento Massiliensium (quod idem & Fausti fuit) responsum est iam olim à Prospero in hunc modum: *Quoad magnitudinem & potestatem pretij, & quoad unam pertinet causam generis humani, Sanguis Christi redemptio est totius mundi. Sed qui hoc seculum sine fide Christi, & sine regenerationis sacramento periranscunt, redemptionis alieni sunt. Cum itaque propter unam omnium naturam, & unam omnium causam, in veritate à Domino nostro susceptam, recte dicantur omnes redempti, & tamen non omnes à captivitate sine eruti: Redemptionis proprietas haud dubie penes illos est, de quibus princeps mundi misus est foras, & iam non vasa Diaboli sed membra sunt Christi. Et mox, Poculum quippe immortalitatis, quod confectum est de infirmitate nostra & virtute divina, habet quidem in se ut omnibus prosit: sed si non bibitur, non medetur, sic ille. Sufficientia ergo, quam postulat generalis redemptio, in precio sanguinis Christi est, non autem in auxilio omnibus collato, ut prætendit obiectio. Nam alioquin etiam paruulis, quibus per baptismum succurri non potuit, tale auxiliumtribuendum erit: aut certe dicere oportebit, non pro illis Christum se dedisse in redemptionem, & ita non pro omnibus. Differens item hac de re R. P. Theodorus Peltanus Societatis Iesu Theologus, Cerrò statuemum est, inquit, Christum Dominum uno quidem modo Servatorem & Redemptorem esse omnium, alio autem modo non omnium, sed multorum tantum, vel aliquorum: hoc quidem secundum efficientiam: prius verò secundum pretij magnitudinem & sufficientiam. Confirmat utrūque modum ex scripturis: posteriorem quidem his inter cæteras: *Hic est sanguis novi testamenti, qui pro multis effundetur: & filius hominis venit animam suam dare redemptionem pro multis.* Priorem vero his, *ut gratia Dei pro omnibus gustaret**

Marc. 14.
Matth. 20.
Ad Heb. 2.

Vbi supra.

CENSURA DVACENSIS.

63

*staret mortē, item, unus pro omnibus mortuus est. Quamquam non male fortasse hæc posteriores scripturæ ita accipiantur, vt sensu congruant cum illis vbi pro multis Christus dicitur se redemptionem dedisse; cum insolens non sit in sacris litteris vniuersalitatis notā ad eum modum accipi. Potest autem & alio probabili sensu, quod de omnium redemptione dicitur, accipi, quem indicat venerabilis Beda scribens in illud primæ Epistolæ Ioan. cap. 2. *Ipse est propitiatio pro peccatis nostris, non pro nostris autem tantum, sed etiam pro totius mundi*, quem locum sic interpretatur: *Non pro illis solum propitiatio est Dominus, quibus tunc in carne viuentibus scribebat Ioannes, sed & pro omni Ecclesia, quæ per totam mundi latitudinem diffusa est, à prima nimirum electo vsque ad vltimum, qui in fine mundi nasciturus est porrecta. Quam expositionem venerabilis Beda à sancto Augustino sumpsit, apud quem ea inuenitur in Epist. 48. circa medium.**

ASSERTIO VIII.

Vt peccator possit conuerti, non est necessarium vt recipiat vtrūque auxilium, præueniens scilicet & concomitans in actu secundo, sed satis est vt accipiat auxilium præueniens in actu secundo, & tunc vere habet auxilium sufficiens ad actualem conuersionem.

CENSURA.

Sententia hæc, quatenus dicit, per auxilium præueniens acceptum in actu secundo, id est gratiam excitantem, posse peccatorem conuerti, ita vt ad actualem eius conuersionem non sit necessaria singularis illa gratiæ Dei cooperatio, quæ ex nolente volens, ex auerso conuersus, & ex malo bonus efficiatur, tam scripturis quam Augustini doctrinæ repugnat: Ea enim proprie est gratia Christi, & gratia noui testamenti, *quæ auferit cor lapideum, & tribuit cor carneum: quæ operatur ipsum velle & per-*

Ex h. 36.

Ad Eph. 3.

Jerem 31.

ficere: per quam scribitur lex Dei in cordibus nostris: quæ facit ut faciamus, non tantum ut possimus facere, si velimus, quam humiliter petimus in oratione quotidiana dicentes Deo, *Fiat voluntas tua*: quam fideliter agnoscimus, quoties pro omni bona voluntate, & pro omni bono opere, Deo, tanquam vero & proprio auctori, gratias agimus. Non enim tantum oramus Deum, ut possimus facere eius voluntatem (quamquam quid vel hoc opus est, si omnes semper habent auxilium sufficiens ut possint?) sed ut faciamus: neque gratias agimus pro eo tantum: quia dedit posse conuerteri, ac bene operari posse (alioquin nihilo plus gratiarum deberet Deo conuersus quam non conuersus, bene operans quam non bene operans) sed quia dedit ipsum conuerteri, ac bene operari: ut sic in omnibus Deus honorificetur, & qui gloriatur, in Domino gloriatur, à quo est omne datum optimum, & omne donum perfectum: cui nullum bonum nostrum à nobis offerri potest quod non ab illo acceperimus: dicente

1. Pet. 4.

2. Cor 10.

Iac 1.

1 Paral.

29.

De grat &
lib arb.

c. 16.

*David, Tua sunt omnia, & quæ de manu tua accepimus, dedi-
muus tibi.* Quod autem ad B. Augustini doctrinam atti-
net, quod illi hæc sententia repugnet, & his & similibus,
quæ prope sunt infinita, locis patere potest: *Certum est,
nos velle cum volumus, sed ipse facit ut velimus, de quo dictum
est, Deus est qui operatur in vobis & velle, &c.* Certum est nos
facere, quando facimus: sed ille facit ut facimus, præbendo vires
efficacissimas voluntati, qui dixit, *faciam ut in iustificationibus
meis ambuletis.* De natura & gratia capite 32. Nullos vide-
tur attendisse, cum dixit, & ipse faciet, nisi eos qui dicunt, nos
facimus, id est, nos ipsi nos ipsos iustificamus, Vbi quidem ope-
ramur & nos, sed illo operante cooperamur. Enchiridij 23.
*Præcedit bona voluntas hominis multa Dei dona, sed non omnia.
Quæ autem non præcedit, in iis est & ipsa.* De gratia Christi
cap 14. *Si omnis qui didicit, venit: profecto quisquis non ve-
nit, non didicit.* Et eodem lib. cap. 24. *Legant, & intelli-
gant: intueantur atque fateantur, interna atque occulta, mirabi-
li ac ineffabili potestate operari Deum in cordibus hominum non
solum veras reuelationes, sed & bonas voluntates.* Eodem rur-

similis est

Iohannis cap

20 de præd.

sancti.

sus cap. 25. *Non solum Deus posse nostrū donauit, atque adiunxit: sed & velle & operari operatur in nobis.* Et omniū apertissime c. 47. vbi distinguens hæc tria posse, velle, agere, id est possibilitatem, voluntatem, actionem, id tanquam componendæ controuersię necessarium exigit à Pelagio, vt consentiat, non solum possibilitatem in homine, etsi nec velit, nec agat bene, sed ipsam quoque voluntatem & actionem, id est, vt bene velimus, & bene agamus (quæ non sunt in homine, nisi cum bene vult, & bene agit) diuinitus adiuuari, vt sine illo adiutorio bene nihil velimus & agamus: eamque esse gratiam Dei per Iesum Christum Dominum nostrum. Et sane totus ille liber hanc B. Augustini doctrinam singulis prope paginis exprimit & declarat. Iam si ex libro de correp. & gratia, de prædest. SS. & de dono perseuerantiæ, & ex Epistolis 105. 106. 107. alijsque eiusdem contra Pelagianos editis opusculis producere vulerimus in hanc causam testimonia, nullus erit citandi finis. Cæterum adijciendus videtur vnus ex D. Bernardo locus item aptissimus: *Cauendum*, inquit, *ne cū hac inuisibiliter intra nos ac nobiscum actuari sentimus, ea nostra voluntati attribuamus, quæ infirma est, aut Dei necessitati, quæ nulla est: sed soli gratia, quæ plenius ipsum liberum excitat arbitrium, cū seminat cogitatum, sanat, cū commutat affectum roborat, vt perducatur ad actum, seruat, ne sentiat defectum, sic autem ista cum libero arbitrio comparatur, vt tantū illud in primo præueniat, in cæteris comitesur, ita tamen quod à sola gratia captum est, pariter ab utroque perficiatur, vt mistim, non sigillatim; simul, non vicissim, per singulos profectus operetur, non partim gratia, partim liberum arbitrium, sed totum singula opere indiduo peragant, totum quidem hoc, & totum illa, sed totum in illo, & totum ex illa, sic Bernard.* Eandem hanc gratiam ipsum velle tribuentem humiliter & veraciter agnoscit illa laudatissima, & à multis pijs & religiosis, in iisque nominatim Patribus societatis nominis Iesu, frequentata precatio Sancti Thomæ Aquinatis in qua Deo dicitur, quod à me requiris vt faciam, hi quæso.

*Lib de grat.
& lib arb.
sub finem.*

*Qua incipit
concede mihi
hi quæso.*

tribue ut sciam, possim, & velim; & de exequi, ut opus agnoscat. Item clarissime idem sanctus Doctor scribens in cap. 5. Ioan. & ad illud, *Nisi Pater traxerit eum*; & lib. 3. contra Gentiles capite 79. nec non in Summa 1. 2. quæst. 114. art. 3. Cui doctori suo atque ipsi veritati consentanea cum scripsisset Cardinalis Cajetanus in illud Math. 4. *Venite post me*, & in illud Luc. cap. 5. *surgens secutus est eum*, virgam iniqui censoris sui Catharini subterfugere non potuit, viri doctorum iudicio audentioris quàm doctioris.

In annota.
adversus ca-
jetanū pag.
292.
Oleat in
Gen. 31.

ASSERTIO IX.

Concomitans concursus specialis, seu supernaturalis, ita præparatus est peccatori, sicut concursus naturalis & generalis præparatus est potentia Vniuersali, verbi gratia potentia videndi. Et infra; Deus non dat ipsa opera bona, nisi quatenus per gratiam præuenientem dat nobis auxilium sufficiens, & paratus est dare concursum gratia concomitantis in actu secundo, si velimus.

CENSURA.

Conkursus ille concomitans specialis, siue supernaturalis, quem ad instar concursus generalis, tanquam ab eo distinctum, ponit, & peccatori præparatum esse vult ista assertio, neque necessariò ponitur, neque vere sufficit. Quare in eo quod addit, Deum non aliter dare ipsa bona opera, nisi quatenus per gratiam præuenientem dat nobis auxilium sufficiens, & paratus est dare concursum gratia concomitantis in actu secundo, si velimus, rursus tollit illam *(specialem & proprie dictam gratiam Christi)*, quæ secundum Prophetam facit ut operemur, & de qua scribens Apostolus, *creatos nos dicit in operibus bonis, quæ præparauit Deus, ut in illis ambulemus*; quia secundum alium Prophetam ipse in nobis omnia operatur, non quocunque modo, sed proprie & per se, ut canon Tridentinus testatur. Quæ proinde gratia, non

Ezech. 36.
Ephes. 2.

Psal. 136.
Can. 6. SS. 6.

si velimus, sed *ut velimus* operatur, quomodo clare dicitur in Arausicano Concilio. Alioquin, quod absit, fatendum erit, voluntatem bonam & opera bona magis proprie esse nostra, quàm Dei; & hominem peccatorem magis à se ipso conuerti, quàm à Deo; & suo arbitrio discerni, non dono Dei; ideoque in se ipso non minus, imò verò & magis, quàm in Deo, de sua conuersione posse gloriari, & quod B. Celestini Pontificis verbis dicunt Tridentini Concilij Patres, *Tantam esse erga nos Dei bonitatem, ut nostra velit esse merita, que sunt ipsius dona, & pro his quæ largitus est æterna præmia sit donaturus*, hætenus tantum verum esse, quia præter auxilium sufficiens, quod vocant, dat concursum gratiæ concomitantis, si velimus; non autem quia dat efficaciter ipsum velle, cùm in ipso voluntatis actu proprie sit ratio meriti. Quid autem de ea conditione, *si velimus*, senserit Augustinus, etiam ante exortam hæresim Pelagij, monstrant hæc eius verba lib. 1. ad Simplicianum quæ est. 2. *Illud nescio quomodo dicatur, frustra Deum misereri, nisi nos velimus. Si enim Deus miseretur, etiam voluit: ad eundem quippe misericordiam pertinet ut velimus; Deus enim est qui operatur in nobis velle & operari*. Idem verò postea multò clarius hanc doctrinam asseruit, ut supra ostendimus. Vnde & in libro de prædest. SS. ita ratiocinatur: *Quare non eos docet? si dixerimus, quia nolunt discere, responderetur nobis, & ubi est quod ei dicitur, Domine tu conuertens iustificabis nos? aut si non facit volentes ex nolentibus Deus, quid orat Ecclesia, si secundum præceptum Dei, pro persecutoribus suis? Fulgentius quoque ad istam quæstionem, Cùm non faciat Deus omnes velle, non aliud respondet quàm illud Apostoli, An non habes potestatem figulus luti, &c. Igitur profunditas illius quæstionis ait Prosper, quam secundum admirationem Apostoli impenetrabilem confitemur, per liberos autem biterij velle & nolle non soluitur: quia licet insit homini bonum nolle, tamen nisi donatum non habet bonum velle. Porro secundum eum intellectum, qui hac assertionem exponitur, fatendum erit quod Deus omnibus dat, etiam pessimis hominibus*

Can 4. & 6.

Cap. 8.

Lib. de in-
car & Grat.
Christ c. 21.Lib. 1 deuo-
cat gentium
cap. vi.

bus, & in malitia persistentibus, opera bona, iisque omnibus dat velle & perficere, & omnes omnino ad se attrahit, quia videlicet dat omnibus auxilium sufficiens, & paratus est omnibus dare concursum concomitantis gratiæ in actu secundo, si velint: quomodo Faustus olim Pelagianizans huiusmodi scripturas peruertendo interpretabatur, ut apud eundem videre est lib. 2. de gratia & lib. arb. cap. 17. sed hæc quàm sint absurda & à scripturæ sensu aliena, quis non videt?

ASSERTIO X.

Augustinus, ubicumque dicit nos non tantum gratia egere qua possimus, sed etiam qua faciamus, intelligendum est de supradicto concomitante concursu, quod scilicet non possimus facere sine auxilio gratiæ concomitantis. Alioquin dictum eius non esset vniuersaliter verum. Nam ut faciamus non requiritur efficax excitatio, quæ voluntatem infallibiliter determinet, qualis forte fuit in Paulo, Magdalena, aliisque nonnullis, dum conuerterentur, sed sufficit multo minor, quæ plenissimam relinquit libertatem.

CENSURA.

Cap. 11. Hæc glossa prorsus repugnat sententiæ authoris, quam præter alia loca declarat apertissime in libro de correp. & gratia, ubi distinguens inter gratiam ante & post lapsum homini datam: *Prima*, inquit, *gratia est, qua fit ut homo habeat iustitiam, si velit, secunda vero plus potest, qua etiam fit ut velit.* Et infra, *Nec de ipsa perseverantia boni voluit Deus sanctos suos in viribus suis, sed in ipso gloriari, qui iis non solum dat adiutorium quale primo homini dedit, sine quo non possint perseverare, si velint, sed in iis operatur & velle, ut quoniam non perseverabunt, nisi etiam possint, & velint, perseverandi iis possibilitas & voluntas divina gratia largitate donetur, Et iterum: Subuentum est igitur infirmitati*

voluntatis humanæ, ut diuinâ gratiâ indeclinabiliter & insuperabiliter ageretur, & ideo, quamuis infirma, non tamen deficeret, neque aduersitate aliqua vinceretur. Et mox, Fortissimo quippe dimisit atque permisit facere quod vellet: infirmis seruauit, ut, ipso donante, inuictissime quod bonum est vellent, & hoc deserere inuictissime nollent. Ex quibus alijsque Augustini locis patet, ita efficacem esse gratiam Christi, ut voluntatem hominis infallibiliter, nullam tamen inferendo necessitatē, ad bonū determinet. A qua quidem necessitate, nimium metuit assertor, quamquam nihil metuerit B. Augustinus, tametsi ei obijciente Pelagio, quod libertatem tolleretur. At neque metuit S. Thomas, dum parte prima quæst. 105. art. 4. docet, *Deum in nostra voluntate operari*, pro fundamento illius doctrinæ collocans illud Apostoli, *Deus operatur in nobis & velle & perficere*. At neque metuendum ab ea necessitate putat inter recentiores R. P. Societatis Iesu Theologus Benedictus Pererius, qui libro 8. de naturalium rerum principijs & assertionibus cap. 8. & 9. in summa, postquam sibi obieciisset, si Deus semper actu concurrit effectiue ac determinatiue ad quamlibet operationem nostræ voluntatis, videri labefactari, imò funditus tolli libertatem voluntatis: ita respondet, ut primū doceat, hunc Dei concursum esse omnino verum, certum, & indubitatum, de quo fas non sit Christiano Philolopho dubitare: deinde dicat, *licet voluntas nihil operetur, nisi mota & determinata à Deo: quia tamen mouetur à Deo conuenienter naturæ suæ, & ut suapte natura apta est moueri, id est non necessario, sed libere: ideo vere dicitur, verèque est libera*. Si enim voluntas ita moueretur à Deo, ut ipsa se nullo modo moueret, & ad agendum determinaret, omnis profecto meritū ac demeriti, & libertatis ratio funditus tolleretur. Sed quia Deus eam sic mouet, ut ipsa nihilominus simul etiam seipsam moueat, ac per suam deliberationem se determinet ad agendum hoc vel illud quippiam, ob eam causam meritū appellatur & verè est libera. Non enim intelligendum est voluntatem esse liberam omnino, ita ut à nullo pendeat, nullique subijciatur: quomodo solus Deus liber est. Ra-

Similia leges apud R. P. Francis. Costarum in contro- uers. de lib. arbit.

is enim cuiusvis creaturæ necessariam & inseparabilem comineo dependentiam eius à creatore, tam in existentia, quàm in omni operatione. Ergo libenter (ait) nostra voluntatis ea est, quæ potest competere creaturæ: nempe quæ distinguit ac separat voluntatem ab agente naturali. Hæc ille. Quod si autem in Paulo, vel Magdalena. alijsque, dum conuerterentur, agnoscitur illa efficax & infallibiliter voluntatem determinans per gratiam excitatio, saluâ interim arbitrij libertate, ut agnoscere videtur assertor; quid est, quod in cæteris eam negemus, & Augustini dicta, ut de scripturis taceatur, in diuersos sensus aded torqueamus violenter? Quod faciunt, qui prædictam B. Augustini distinctionem ita conantur saluare, ut dicant, ea ratione nobis dari velle, quæ primo homini: quia scilicet dantur nobis crebræ excitationes internæ, & externæ, & singularis protectio, cura, &c. quasi hæc primo homini defuerint, ad quem interiùs tentandum ne quidem accessum habere diabolus potuit; vel certè omnia hæc in vnum collecta gratiam primi hominis æquent, nedum superent, quod vult Augustinus; vel denique, his omnibus positis, ipsum velle in nostro prorsus non relinquitur libero arbitrio, sicut & in primi hominis; aut ipsum velle per hæc tribuatur, cum esse possint etiam in nolente.

Aug de
correp &
gra. cap. 11.

ASSERTIO XI.

De don. pers.
cap. 14.

Quod dicit Augustinus, ijs qui non sunt à perditionis massa segregati, non adhiberi dicta vel facta diuina, per quæ possent credere, si audirent ea, vel viderent, cum grano salis accipiendum est; ut intelligantur non accipere actu secundo illa auxilia, cum quibus nouerat Deus eos de facto conuertendos: quod certissimum est de omnibus qui non conuertuntur.

CENSURA.

Loquitur eo loco Augustinus de auxilijs externis. Ait enim,

enim, si congrua suis mentibus vel audiant verba, vel signa conspiciant. Quod ad sensum audiendi vel videndi pertinet. Non ergo sic accipi potest Augustini sententia, quasi velit eiusmodi auxilia sufficere cuiquam ad conuersionem. Quamquam nec assertor sentiat, auxilia externa sufficere. At neque diuinum illud munus intelligentiæ, cuius ibidem meminit Augustinus, quo videlicet moueantur homines ad fidem, si congrua suis mentibus vel audiant verba, vel signa conspiciant, æstimari potest auxilium ad credendum sufficiens, idque omnibus datum; tum quia naturaliter id inesse hominibus, nec omnibus, sed quibusdam dicit Augustinus; tum quia aperte negat, Tyrijs & Sidonijs vt crederent fuisse datum. Sed quia, inquit, vt crederent non erat ijs datum, etiam vnde crederent est negatum. Neque vult Augustinus id vnde crederent non esse datum, hoc sensu, quia non est ab illis acceptum in actu secundo; sed quia simpliciter verum est, in Tyro & Sydone non fuisse factas virtutes, per quæ erant credituri. Quare & proxime sequens Augustini sententia, qua dicit, quibusdam qui non sint à perditionis massa gratiæ prædestinatione discreti, non adhiberi vel dicta, vel facta diuina, per quæ possent credere, si audirent talia, vel viderent, similiter debet intelligi. Quam intelligentiam & ipsa verba manifeste requirunt. Quocirca ex hoc loco Augustini, inter cæteros, manifestum est, non omnibus dari sufficiens auxilium ad conuersionem. Neque putandum est, omnibus, quibus externa huiusmodi auxilia ad conuersionem desunt, adesse occulta, vel interna: quia via ordinaria & regularis, qua Deus conuersionem hominum procurat, est per externa dicta vel facta; vt quibuscunque hæc desint, illis interna adesse, prorsus sit inopinabile.

ASSERTIO XII.

Ad illud quod ex cap. 6. de prædestinatione SS. ob-

ijcitur, vbi Augustinus docet, hunc nolle credere, quia eius voluntas non præparatur à Domino; quod tamen erat necessarium vt credere vellet; Respondetur, valde improprie dici, quod is cui sufficienter proposita est fides, ideo nolit credere, quia eius voluntas non præparatur à Domino.

CENSURA.

Non dicit eo loco Augustinus, hunc nolle credere, quia eius voluntas non præparatur à Domino; quamvis verum sit, hoc esse necessarium, nempe voluntatem hominis à Deo præparari, ad hoc vt credere velit, idque eo loco ab Augustino sit significatū. Non enim quia recte & conuenienter dicitur; Hic vult credere, quia voluntas eius præparatur à Domino; ideo consequens erit, recte quoque & conuenienter dici; Hic non vult credere, quia voluntas eius non præparatur à Domino. Cum enim fidei donum sit indebitum, nullo modo causa infidelitatis in eum reijci potest, qui fidem non dedit, etiamsi absque eo haberi non possit. Porro negari non debet, esse multos quibus sufficienter proposita est fides quoad æternam prædicationem & quascunque internas suasiones, seu excitationes ipsum voluntatis actum præcedentes, quibus tamen ex mente Augustini nondum præparata est voluntas à Domino. Quod omnes illæ sententiæ Augustini probant, quibus docet, ipsum credendi actum in cordibus hominum Deum operari. *Hoc est opus Dei*, inquit Saluator, *vt credatis in eum quem misit ille*. Quem locum tractans Augustinus ait; *Non dicit, hoc est opus vestrum; sed, hoc est opus Dei, vt credatis in eum quem misit ille; vt qui gloriatur, in Domino gloriatur*. Item in Epistola ad Vitalem, inter alia scribit in hunc modum; *vt in Deum credamus, & pie viuamus, non volentū, neque currentis, sed misereantis est Dei, non quia velle non debemus & currere: sed quia ipse in nobis & velle operatur & currere. Unde & Dominus Iesus credentes à non credentibus, id est, ab*

Ioan 6.

Tractatu
25 in Ioan-
nem.

Epist 107.

ire vas is vasa misericordia discernens, nemo, inquit, venit ad me, nisi fuerit ei datum à patre meo. Et postea inter eas sententias, quas scire se dicit, ad fidem rectā & Catholicā pertinere, has duas posuit postremas: Scimus, pro ijs, qui nolunt credere, nos qui iam credimus, recta fide agere, cum Deum oramus ut velint. Et, Scimus, pro ijs qui ex illis crediderunt, tanquam de beneficijs, recte & veraciter, & debere nos Deo gratias agere, & solere. Quod tamen ne libertati voluntatis videatur contrarium, hanc proxime præmiserat sententiam: Scimus qui proprio corde credunt in Deum, sua id facere voluntate ac libero arbitrio. Et infra ex orationibus Ecclesiæ validissime Vitalem coarguens, Nunquid, inquit, orare prohibebis Ecclesiam pro infidelibus, ut sint fideles: pro ijs qui nolunt credere, ut velint credere: pro ijs qui ab eius lege doctrinaque dissentiant, ut eius legi doctrinaeque consentiant, ut det illis Deus quod per Prophetam promissit, cor cognoscendi eum, & aures audiendi? Nunquid, ubi audieris Sacerdotem Dei ad eius altare populum hortantem ad Deum orandum, vel ipsum clara voce orantem, ut incredulas gentes ad fidem suam venire compellas, non respondebis, amen? Ideo nonnunquam, ut idem subiungit egregius doctor, per orationem credentium nondum credentes credere facit, ut ostendat quod ipse facit. Nemo enim est tam imperitus, tam carnalis, tam tardus ingenio, qui non videat Deum facere, quod rogari se precipit, ut faciat. Et mox: Hoc & gratiarum actio indicat, quod oratio: oratio pro infidelibus, gratiarum actio pro fidelibus. Quis enim est orandus ut faciat, illi gratiarum actio reddenda cum fecerit. Verissime igitur ab eodem alibi dictum est: Cur ille credat, ille non credat, cum ambo idem audiant: & si miraculum in illorum conspectu fiat, ambo idem videant, altitudo est diuinitatis scientia & sapientia Dei, cuius inscrutabilia sunt indicia, & apud quem non est iniquitas, dum cuius vult miseretur, & quem vult indurat. Quam de fidei initio, id est, primo credendi actu atque effectu, doctrinam ad corrigendum Massiliensium errorem etiam plenius efficaciusque probat idem doctor toto fere libro de predestinatione SS.

*In Epist. ad
fix. 106.*

ASSERTIO XIII.

Est quoddam perseverantiæ donum, consistens in quodam speciali auxilio & protectione, qua Deus ita protegit & munit quosdam ut fere indeclinabiliter & infallibiliter in gratia perseverent usque ad mortem: quod quibusdam conceditur, ut forte Apostolis post acceprum Spiritum: & ut in scholio additur, ijs qui dicuntur confirmati in gratia. Aliud est perseverantiæ donum, quod consistit in quodam auxilio & protectione, qua Deus ita adest, ut possint in gratia perseverare, si velint. Et hoc donum est necessarium ad salutem, & datur omnibus iustis immediate in actu primo.

CENSURA.

Malch. 10.

Sessione 6.
cap. 13.

i. paraly.
29.

Perseuerantiam nec scriptura, nec Concilij Tridentini Patres, nec Augustinus, alique doctores aliam agnoscunt, quam de qua dictum est. *Qui perseverauerit usque in finem, hic saluus erit*; nec aliud in homine lapsò perseverantiæ donum, quam quo fiat ut usque in finem perseveretur. Quod, ut habet Concilium Tridentinum, aliunde haberi non potest, nisi ab eo, qui potens est eum qui stat statuere, ut perseveranter stet, & eum qui cadis restituere. De quo etiam Can. 16. ita pronunciat; *si quis magnum illud usque in finem perseverantia donum se certo habiturum absoluta & infallibili certitudine dixerit, nisi hoc ex speciali revelatione didicerit, Anathema sit*. Hoc igitur perseverantiæ donum omnibus & solis electis proprium esse constat, iis videlicet, qui Christo dati sunt à Patre, & pro quibus orat Patrem; ex quibus nullus omnino perit. Hoc singulare donum subditis suis à Domino suppliciter petebat Rex David dicens: *Custodi in aeternum hanc voluntatem cordis eorum, & semper in veneratione tui mens ista permaneat*. Huiusmodi autem nullum agnoscit hæc assertio, quandoquidem non ipsam perseverantiam, seu ipsum

perseuerare, sed tantum posse perseuerare Dei dono ad-
 scribit. Atqui posse perseuerare non est perseuerare, ne-
 que si detur posse perseuerare, continuò datur & perse-
 uerare; imò ex eo ipso quo quis non perseuerat, mani-
 festum est eum non habuisse donum perseuerantiæ, ait
 Prosper ad c. 7. Gallorum, post Augustinum initio li-
 bri de dono perseuerantiæ. Quod ergo integro homini
 tribuit Augustinus perseuerantiæ adiutorium in libro
 de correp. & gratia cap. 11. & 12. nimirum eiusmodi, si-
 ne quo non posset, & per quod perseuerare posset, si
 vellet; hæc assertio lapsis tribuit, & quidem omnibus
 iustis commune facit. Quod autem Augustinus secun-
 dum scripturam tribuit hominibus post lapsum erectis,
 atque in solis agnoscit electis, videlicet tale perseueran-
 tiæ donum, per quod non nisi perseuerantes sint, vt
 cum non perseuerabunt, nisi possint & velint, perseue-
 randi iis possibilitas simul & voluntas diuinæ gratiæ lar-
 gitate donetur, & per quod ita subuentum esse dicit in-
 firmitati voluntatis humanæ, vt *diuina gratia indeclinabi-*
liter & insuperabiliter ageretur; & ideo, quamuis infirma, non
tamen deficeret, neque aduersitate aliqua vinceretur; hoc in-
 quam perseuerantiæ donum hic non agnoscitur, sed
 excluditur potius, sicut id excludere volebant Massi-
 lienses, supradictam Augustini doctrinam carpentes,
 vt in ep. ad Augustinum testatur Hilarius. Ad quam
 respondens Augustinus, idem illud perseuerantiæ do-
 num multo etiam copiosius apertiusque asseruit in li-
 bro cui ab eo dono titulum indidit de quo etiam ita præ-
 clare scriptum est à S. Thoma Aquin. *Impossibile est hæc*
duo simul esse vera, quod Spiritus sanctus velit aliquem mouere
ad actum charitatis, & quod ipse charitatem amittat, precando.
Nam donum perseuerantiæ computatur inter beneficia Dei, qui-
bus certissime liberantur quicumque liberantur, vt dicit Augusti-
nus. Cui simile prorsus est illud Augustini in Psalm. 84.
Superbire non potest, cui Deus ostendit misericordiam suam. Vi-
deri quidē potest Assertor priori distinctionis membro
rale aliquod donum agnoscere: sed reuera posse perse-

2. 2. quas 24.
ar. 11.

de dono pers.
c. 14.

uerare etiam ibi donum Dei fatetur, dum ait illud consistere in quodam speciali auxilio & protectione, qua Deus ita protegit & munit quosdam, ut fere indeclinabiliter & infallibiliter in gratia perseuerent usque ad mortem. Non enim hic ipsum perseuerare diuinæ operationi tribuitur; sed tantum Deo tribuitur protectio quædam & munitio, qua quis ita protegitur & munitur ut fere indeclinabiliter perseueret. Deinde hoc ipsum non vult Assertor nisi paucis admodum concedi, cum alterum iustis omnibus commune fecerit. Vbi est ergo illud perseuerantiæ donum, quod omnibus & solis electis datur? Apparet autem Assertorem ex Catharini paradoxo hanc duplicis doni perseuerantiæ distinctionem sumpsisse. Nam similiter ille duplex genus electorum, seu prædestinatorum commentus est. Et eodem spectare videtur, quod olim Pelagianorum nonnulli prædestinationem absolutam in solis Apostolis accipiendam esse dicebant, cæteris prædestinationem ex operum præuisione tribuentes, ut significatur in fine operis Hypognosticon apud Augustinum. Porro confirmatos in gratia, sic ut cadere non possint, hac immortalitate durante (nisi forte alicui, quod non negamus, tale quid speciali priuilegio datum fuerit) nullos esse, satis ostendit illud Apostoli: *Castigo corpus meum, & in seruitutem redigo, ne forte, cum aliis predicauero, ipse reprobus efficiar: & illud, quod omnes orare iubentur, Ne nos inducat in tentationem.* Quamuis enim quibusdam forte sua prædestinatio fuerit reuelata, non tamen per hoc à tentationum periculis fuerunt exempti: quales profecto nullos agnoscere se Prosper aperte declarat de vocatione gentium, ubi exceptione de Christo facta, *In cæteris, inquit, hominibus, donec caro concupiscit aduersus Spiritum, & Spiritus aduersus carnem, & donec Spiritus quidem promptus est, caro autem infirma, incommutabilis animi fortitudo non potest reperiri: cum non huius, sed alterius vita sit vera pacis perfecta & secura felicitas. In presentis ergo agonis incerto, ubi tota vita tentatio est, & ab insidianti superbia nec ipsa tuta est vi-*

*Lib. de præd.
& altero de
duabus sci-
entia clauibus,
sub finem.*

*Tho. 1. par.
quæst. 100.
& in quæst.
disput. quæst.
de lib. arb.
Item Durā-
duran 3. di-
stinct. 3. q. 4.
& alij alibi.
cap. 18.*

Fortia, mutabilitatis periculo non caretur. Et licet innumeris sanctis suis donet virtutem perseverandi usque in finem divina protectio, à nullis tamen aufert quod ipsi repugnat ex ipsis. Et infra, Merito igitur ab incipientibus non solum, verum etiam à prouectissimis sanctis uniformiter Domino supplicatur, & dicitur, Ne nos inducas in tentationem, sed libera nos à malo. Sic ille.

ASSERTIO XIV.

Indurati & excæcati habent sufficiens auxilium ex parte Dei vt conuertantur. Et infra: Omnes infideles semper & ubique habent sufficiens auxilium ad salutem ex parte Dei.

CENSURA.

Reijcienda penitus tota hæc assertio est, velut beneficio singularis illius gratiæ Christi, quæ non omnibus est communis, & tamen omnibus ad conuersionem & salutem est necessaria, plurimum detrahens. Nam neque induratus conuerti potest, nisi per gratiam auferentem cor lapideum, & tribuentem cor carneum, quam utique quamdiu induratum est, non habet, neque excæcatus aspicere potest lumen veritatis, nisi per gratiam tenebræ eius illuminantem, & velamen de corde eius auferentem: quam similiter quamdiu excæcatus est non habet. Neque infidelis quisquam credere potest, nisi per gratiam, qua cor eius ex infidelitate ad fidem mutetur. Quam gratiam eum non habere, dum infidelis manet, perspicuum est. Si ergo donum Dei nondum habet infidelis, quomodo dicendum est habere sufficiens auxilium ad salutem ex parte Dei, cum absque dono fidei non possit esse fidelis? Quantum autem tota hæc doctrina à sensu scripturæ dissonet, satis ostendunt ea loca, in quibus legitur, quosdam non tantum deseriri à Deo, ac dimitti secundum vias suas, & secundum desiderium cordis sui: verum etiam obdurari, & excæcari, ideoque, quod

*Ezech. 36.
Psal. 17.*

2 Cor. 3.

*Ioan. 12.
& 5.*

Hierom. 13.

sancti præueniens inspiratio si putatur omnibus vbique & semper esse communis, iam non vbi, & cum vult, sed semper & vbique spirat Spiritus sanctus. Neque orandus erit Deus, vt Spiritus sui inspirat one præueniat, moueat, & emolliat infidelium & induratum corda, sed illi tantum erunt monendi, vt diuinæ inspirationi consentiant, & cooperentur: quandoquidem iam satis habent ex parte Dei vnde credant, & conuertantur. Fallitur profecto qui talem imaginatur statum cuiuscunque peccatoris, qui, vt ait Prosper, *priusquam à do-* *Hypognos.
lib. 6. c. 4.*
minatione diaboli per gratiam Dei liberetur, in illo profundo iacet, in quod se sua libertate demersit, amans interim languores suos, & pro sanitate habens quod egrotare se nescit; donec prima hac medela conferatur egrotis, vt incipiat nosse quod langueat, & possit opem medici desiderare, qua surgat.

*ad 6. cap.
Gall.*

ASSERTIO XV.

Omnia loca Scripturæ sacræ, quæ significant impossibile esse quosdam conuerti, intelligenda sunt, vt impossibile accipiat pro eo quod est valde difficile.

CENSURA.

Non est negandum, quin possint conuerti ad Deum omnes peccatores durante hac vita; sed simul quoque fatendum est, nullum peccatorem conuerti posse, nisi per specialem Dei gratiam, seu speciale auxilium, quo voluntas eius in bonum mutetur: quod auxilium non habet, nisi cum actu conuertitur. Nihil ergo repugnat, imò sanctorum Patrum expositioni congruit plane, impossibile in scripturis proprie accipi. cum dicitur impossibile esse quosdam conuerti aut corrigi; sed ita vt consideretur homo secundum dispositionem & vires præfentes: quomodo ab Augustino dictum est, *Iustus implet* *Lib. 3. contra
Cresc.
cap. 4.*
legem Christi per dilectionem, quam iniustus implere non potest. Et à Patribus Concilii Trident. *Iubendo monet Deus &*

sess 6. c. 11.

ex Aug. de
nat. & grat.
cap. 45 vide
& Hier in
epist. ad
Ctesiph. c. 4.

Matth. 19.

Marci 10.

Luc. 18.

Vide Hier.
lib 2. cont

Felag cap 5.

Rom. 8.

facere quod possis, & petere quod non possis. Quo fit ut perpetram asseratur omnia Scripturæ loca, quæ significant esse impossibile quosdam conuerti, sic esse intelligenda, ut impossibile accipiat pro eo quod est valde difficile; cum præsertim Saluator in Euangelio potius contra difficile pro impossibili videatur interpretatus; ubi quod difficile dixerat, quærentibus & admirantibus discipulis, ita exponit, ut impossibile esse pronuntiet. *Diues, in- quiebat, difficile intrabit in regnum cælorum; & , quam difficile qui pecunias habent, intrabunt in regnum cælorum!* Deinde vero ait facilius esse camelum per foramen acus transire, quàm diuitem intrare in regnum cælorum. Et mox, *Apud homines hoc impossibile est, apud Deum autem omnia possibilia sunt.* Quo loco quin impossibile proprie accipiat, nullum est dubium. Sed ita dixit Dominus impossibile apud homines, quomodo dixit Apostolus *impossibile legi*; quia hoc quod utrobique impossibile dicitur, nisi Deo specialiter adiuuante fieri ab homine non potest, quemadmodum satis uterque locus declarat.

ASSERTIO XVI.

Paruuli ex parte Dei habent sufficiens remedium contra peccatum, præsertim in noua lege. Nam Christus pro omnibus mortuus est, & pro omnibus instituit sacramentum in remedium peccatorum, nemine excepto. Atque id, *quod in scholio additur*, ex epistola Cypriani 59. satis aperte colligitur.

CENSURA.

Mors Christi, & Sacramentum Baptismi, remedia sunt quæ sufficiunt saluti omnium paruulorum, nemine excepto. Sed non inde consequens est, omnes paruulos habere sufficiens remedium cōtra peccatum ex parte Dei. Quamuis enim paratum ac propositum sit tale remedium; non tamen ab eo recte dicitur haberi, cui

impossibile est illud applicari; impossibile, inquam studio & industria humana. Multa enim tam ex parte Dei, quam ex parte hominum requiruntur, eaque in paruulorum potestate non sunt posita; vt paruuli ipsi Christo commoriantur, & consepeliantur per baptismum. Et tamen nisi hoc modo commortui & consepulti ei fuerint, nec Baptismus, nec mors Christi illis sunt remedio. Cyprianus autem in epistola ad Fidum, non significat omnes paruulos habere sufficiens remedium salutis: sed dicit, neminem, cuiuscunque ætatis hominem per nos à baptismo & gratia Dei, qui omnibus & misericors, & benignus, & pius est, debere prohiberi. Hoc enim quod dicit, *omnibus*, ad eam ætatem, non autem ad omnes in vniuersum homines, videtur referendum esse. Aut certe ea ratione ait B. Cyprianus esse apud omnes vnā diuini muneris æqualitatem, & Deum se omnibus ad cælestis gratiæ consequutionem æqualitate librata præbere parem, quod, vt dictum est, sacramentum instituerit baptismi, omnium saluti, etiam paruulorum, nemine excepto, sufficiens; quodque ministris iusserit baptizare omnes. Illa enim est Cypriani in illa epistola intentio, vt ipse etiam B. Augustinus declarat, scribens ad sanctum Hieronymum in hæc verba: *B. Cyprianus non aliquod decretum condens nouum, sed Ecclesiæ fidem firmissimam seruans, ad corrigendos eos qui putabant, ante octauum diem natiuitatis non esse paruulum baptizandum, mox natum rite baptizari posse cum suis quibusdam Coepiscopis censuit.*

*Vide Prosp. ad 8. c. Gal-
lorum. Et ad
cap. 4. in
fine.*

Matth. 28.

Epist. 28.

ASSERTIO XVII.

Quod applicatio talis remedij baptismi vel his, vel illis ob aliqua impedimenta occurrentia fiat impossibilis, non est Deo imputandum, quia non ordinat vt non possit applicari, vel vt talia impedimenta occurrant, sed tantum permittit secundum communem cursum rerum, sicut permittit peccata.

CENSURA.

Non recte dicitur, Deum tantum permittere, sicut permittit peccata, non autem vere ac proprie producere ea impedimenta, per quæ paruulis aliquibus impossibilis fiat applicatio talis remedij, v. g. Baptismi: præsertim cum absque omni culpa humana talia impedimenta eueniunt, vt sit in ijs qui antequam nascantur, in utero moriuntur. Nam sicut, Deo volente, dum absoluta eius voluntate loquimur, alius baptizatur; ita, nolente eo, alius non baptizatur. Quod in paruulis sine baptismo morientibus euidenter patet: quos non baptizari, & proinde non saluari dicit Augustinus, *non quia ipsi nolunt, sed quia Deus non vult. Neque enim, vt idem ait, lib. de dono perseuerantiæ, res humanas in paruulis non diuina prouidentia, sed fortuitis agi casibus opinandum est, cum rationales vel damnanda, vel liberanda sunt anime; quandoquidem nec pesser cadit in terram sine patris voluntate, qui in cælis est: aut parentum negligentia sic tribuendum est, vt nihil ibi agant superna iudicia. Quæ ipsa Dei iudicia agnoscens inter recentiores R. P. Peltanus ita scribit: Aliam hyperphysicam causam (nam physica & libera itidē multa existere possunt) agnoscere non possumus, cur infantium alij suscepto baptismi Sacramento exsinteti, celesti beatitudine potiantur: alij eiusdem Sacramenti gratia frustrati in æternum exilium à Christi regno proscribantur, quàm diuersū Dei optimi maximi de his & illis consiliū, diuersūq; in hos & illos studiū. Sic ille. Constat autē & alibi sæpe paruulorum exemplum ad probanda inscrutabilia Dei iudicia circa salutem & prædestinationem hominum ab Augustino, & post eum à Prospero & Fulgentio adduci. reclamantibus licet primū Pelagianis, deinde Massiliensibus, dum vel rationem reddere conati sunt, cur è paruulis vnus assumatur, alter relinquitur, vel vt ait Hilarius Arelatenensis in Epistola ad Augustinum, causam paruulorum ad exemplum maiorum afferri non patiebantur. Et sane periculosa est admodum ea opinio,*

Epist. 107.
ad Vital.
cap. 12.

Vide &
Aug. Ep. 1.5
& Prosp.
lib. 1. de
voc. gent.
cap. 22. &
libro 1.
cap. 22.

Lib. de sa-
tisf. parte
10.

Vid. Prosp.
in Epist. ad
August. &

vt pote multū Scripturæ dissona, & perfectissimæ causalitati ac sapientiæ diuinæ non parum derogans, quam hic assertor sequi videtur, Dei scilicet prouidentiam non immediate extendi ad omnia & singula quæcūque in rerum natura existunt & sunt, peccato dumtaxat excepto: quasi hac tantum ratione Deus omnia agat, omnibūque prouideat, quod rebus à se conditis indidit vires ac proprietates, per quas illæ deinde se moueant, suāsque operationes exerceant, accedente tantummodo ipsius generali Dei concursu, quo res, ne in nihilum concidant, sustentet ac conseruet. Aliud nobis diuinæ Scripturæ loquuntur, in quibus legimus, quod *Deo cura est de omnibus*: quodque sapientia Dei *omnia prospicit, attingens à fine usque ad finem fortiter, & disponens omnia suauiter*: & *omnia in mensura, numero, ac pondere disposuit, & omnia operatur in omnibus, quod Deus ei quod è semine nascitur, dat corpus, sicut voluit*, id est, sicut iam ante disposuit, & *unicuique seminum proprium corpus*. Quæ rursus ita nobis commendant Dei prouidentiam, vt doceant nec volatilia, nec lilia horti, nec fœnum agri, nec pilos capitis ab ea exceptos esse. Vnde Augustinus lib. 5. de Gen. ad lit. *Quod ait Saluator, inquit, vnum passerem non cadere in terram sine Dei voluntate, & quod fœnum agri post paululum mistendum in clibanum, ipse tamen vestiatur, nonne confirmat non solum istam totam mundi partem rebus mortalibus & corruptibilibus deputatam, verum etiam vilissimas abiectissimasque eius particulas diuina prouidentia regi?* Et Cyrillus in Thesauro, *Quod si putatis, ait, indecens ad minima quæque prouidentem descendere, erubescatis aliquantulum, quasi, audientes Christum: nonne duo passeris, &c. Qui & alibi proprium id naturæ Deitatis esse affirmat, vt prouidentia sua omnia contineat atque gubernet, res etiam deiectas atque minimas.* Dionysij quoque generalis est doctrina in libro de diuinis nominibus, vbi agens de eo quod rerum omnium in Deo præ existant paradigmata, siue ideæ, asserit in Sacris Litteris *istâ paradigmata vocari predestinationes, & Diuinas ac bonas voluntates*: dicitque quod eadem illa.

Faust. lib. 1. de lib. arb. cap. 13.

Sap. 6. 7. 8. & 11.

1. Cor. 12 & 13.

Mat. 6. & 10. 11. &c. Vid. & lib. 5. de ciuit. c. 11. & Ep. 106. ad Paulin.

Lib. 5. cap. 2.

Lib. 12. cap. 14.

Cap. 5.

prædestinationes sint decretivæ, definitivæ, ac distinctivæ, atque etiam factivæ, secundum quas Deus omnia quæ sunt, prædefinit, atque in esse produxit. Deinde, vt perspicua ratione concludamus, quomodo non est dicendum Deum omnia immediate operari, qui non tantum per essentiam & præsentiam, verum etiam per potentiam omnibus intime inest: aut quomodo non omnia in particulari præordinavit, si omnia immediate operatur?

ASSERTIO XVIII.

Omnes infideles semper & ubique habent sufficiens auxilium ex parte Dei, seu in actu primo. Si enim facerent quod in ipsis est, & quantum possent secundum præsentem dispositionem naturalem vel supernaturalem, quam habent, Deus illuminaret eos vt credere possent vel conuerti.

CENSURA.

De priori parte assertionis supradictum est. Quod autem attinet ad illud, *facere quod in se est*, si sic intelligitur, vt sit facere quod quis potest solis naturæ viribus sine gratia Dei: eo sensu non recte dicitur, si homo faciat quod in se est, illum à Deo illuminandum vt credere possit vel conuerti. Nam sic gratia Dei homini secundum quod conatur, facitque quod naturæ viribus potest, & aliquo saltem modo secundum merita daretur (quod olim reprobaturum est) nec ad occulta Dei iudicia pertineret cur hic credat ille non credat: hunc Deus liberet, illum non liberet: quod vult Augustinus in Epist. 105. ad Sixtum, & alibi: sed ipse se homo aliquo modo discerneret per id quod non accepit, quod negat Apostolus 1. Cor. 4. Notū quoque est illud^b Prosp. quod *sine Dei gratia nemo currit ad gratiā.* Si vero dicitur homo facere quod in se est, dum facit quod est in ipsius potestate, secundum quod motus est à Deo, quemadmodum

^a Vide Aug. lib. 1. de peccat. merit. cap. 12. lib. de Grat. & lib. arbit. cap. 14. in Epist. 105. lib. 1. ad Simplicianum in fine. Item Prosp. contra Collat. cap. 4. & seq. Et in earm. de ingratis cap. 17. S. Greg. hom. 19. in Ezech. A.

Tiletanus p. 1. cont. Kemnitium fol. 250. b. Prosp. ad c. 6. Gal. & in earm. de ingratis c. 25.

eam locutionem exponit D.^s Thomas in Summa, recte dicitur hoc pacto homini facienti quod in se est Deum suâ gratiâ non defuturum; & omnis qui petit, accipit; & qui querit, inuenit; & pulsanti aperietur. Neque eo modo sine gratia itur ad gratiam; quamquam petere, quærere, pulsare, atque omnino conari ad bonum salutare nemo potest, nisi per Dei gratiam hæc eadem in homine fiant, quemadmodum clare definitum est in Concilio Arausicano can. 6.

c D. Th. 1.
2. q. 106.
art. 6. *vide*
etiam Ca-
tech. Paroc.
in Titul. de
grad. ora-
tionis.
Math. 7.

ASSERTIO XIX.

Qui inuincibiliter ignorat fidem, tenetur ad præcepta naturalia, id est, ad decalogum; ergo habet auxilium morale sufficiens ad illa explenda: quia Deus neminem obligat ad impossibile. Alioquin videremur accedere ad sententiam hæreticorum, qui dicunt, per peccatum originale amissum arbitrium ad bonum.

CENSURA.

Habere infideles auxilium sufficiens morale ad impletionem decalogi, usque adeo verum non est, ut nec fideles omnes id habere dicendum sit. Nam si haberent omnes peccatores, & fideles, non esset necessaria oratio, qua peterent à Deo adiutorium ad eius mandata implenda. Frustra enim petitur ut habeatur, quod iam sufficienter habetur. Neque propterea quemquam ad impossibile obligari consequens est, quandoquidem auxilium illud ita in diuina bonitate præparatum est, ut nemini, sicut oportet petenti denegetur. Vnde Prosper Cassiano similia obijcienti respondens dicit: *homini dari præceptum, ut diuinum querat auxilium.* Et alio loco; *Imperantur, inquit, ista homini, ut ex præcepto Dei, quo ei hoc quod accepit, indicitur, agnoscat, id se suo vitio perdidisse, & non iniquam esse exactionem, quia ad reddendum quod debet idoneus non est; sed à litera occidente refugiat ad Spiritum vini;*

Cap. 6.

In Epistola
ad Demetri-
triad & c.
21. cont.
Collat.

sicantem, & facultatem quam antè non inuenit in natura, quærat ex gratia. Quare neque consequens, per peccatum originale amissum esse arbitrium ad bonum. Mansit enim in homine post peccatum naturalis arbitrii facultas & ad bonum & ad malum flexilis. Nam si ad bonum flecti non posset, nunquam se Deo adiuuante ad bonum inflecteret. Quod enim insanabile est, non sanatur: quale est liberum arbitrium in dæmonibus. At de hominibus dicitur à Sapiente Sap. 1. *sanabiles fecit Deus nationes ortus terrarum.* Verumtamen si nullo sensu dici posset amissum esse liberum arbitrium ad bonum, non de eo post Augustinum dicerent Patres Arausici Concilii, *Quod amissum, nisi à quo potuit dari, non potest reddi.* Vnde ipsa veritas dicit: *si vos filius liberauerit, tunc vere liberi eritis.* Cæterum videat assertor quomodo non magis ex ipsius doctrina sit consequens, per peccatum originale amissum esse liberum arbitrium ad bonum, quæ putat, libertatem ad bonum in homine lapsæ saluari non posse, nisi perpetuò ei dicatur adesse sufficiens auxilium, quo adiutus bonum eligere possit. Ex ea enim hypothesi manifeste sequitur, quod præueniendo beneficium redemptoris (ad quod pertinere vult sufficiens illud auxilium) perierit homini per peccatum originis liberum arbitrium ad bonum. Bonum autem intelligimus quod ad pietatem, siue, vt canon Arausicanus loquitur, *ad salutem pertinet vite æternæ.*

ASSERTIO XX.

Sententia, quæ dicit, eos qui saluantur, non efficaciter electos ad gloriam ante præuisionem bonorum operum, vel applicationis meriti contra peccatum, videtur maxime probabilis. Tenent autem hanc sententiam omnes Patres Græci, adeo vt communiter dicatur sententia Græcorum, *Et in scholio*, Quamquam diuersa sententia Augustino tribuatur, non puto tamen esse Augustini. Nam ubi hac de re loquitur, non exprimit vtrum

Fulg de In-
car & grat.
Christ c. 2.
21 & 24
Prosp ad ob-
isell 6. Vin
cent.

Can. 13.
Lib 14 de
ciuitate Dei
cap. 11.

assertione 27
& 16.

Can. 7.

utrum loquatur de immediata electione ad gloriam, an de mediata, quæ erat gratia. Item an loquatur de electione absoluta & efficaci, an de conditionata, id est, si gratiæ fuerint cooperati: quomodo intelligendas esse promissiones diuinas docet Trid. Concilium sess. 6. Quod si tamen contraria sententia est D. Augustini, non admodum referret.

CENSURA.

Doctrina illa, quæ negat efficacem electionem ad gloriam ante præuisionem operum, prorsus improbabilis est, & noxi erroris periculo non caret: ut quâ beneficium gratiæ & redemptionis Christi non parum obscuretur, quemadmodum ad primam assertionem declaratum est. Porro hæc de Græcis Patribus, quasi ad hunc modum sentientibus, obiectio & à Massiliensibus olim mota est, qui, uti Prosper scribit ad Augustinum, *ea quæ de epistola Pauli Romanis scribentis ad manifestationem diuinæ gratiæ, præuenientis electorum merita, proferebantur, à nullo unquam Ecclesiasticorum esse ita intellecta affirmabant.* Cui obiectioni quia in libro de dono perseverantiæ satisfecit Augustinus, ostendens & alios insignes Ecclesiæ Doctores, & in iis græcum Gregorium Nazianzenum, tametsi sub aliis verbis, ante exortam Pelagianam hæresim, eadem secum sensisse & scripsisse, nobis quoque satis id merito esse debet, præsertim hæc tanti doctoris, alioquin in definiendo modestissimi tardissimique audita sententia, qua eodem loco sic indubitanter & intrepide pronūciat, *hoc scio, neminē contra istam præde-*

Ca. 18 & 19

Cap. 18.

stinationem, quam secundum scripturas sanctas defendimus, nisi errando disputare potuisse. Quod si Græcorum doctrina (qualis prima facie legentibus apparet) hac in parte sequenda est, dicere quoque oportebit à libero arbitrio gratiam Dei præueniri; quod hæreticum esse constat. Cui tamen sententiæ in speciem admodum fauentia apud Græcos, præsertim Chrysostomum, loca repe-

Lib. 5 an-
not. 101 &
lib. 6. annot.
184 251 257
& 333.

riuntur, vt videre est apud Sixtum Senensem in Bibliotheca sancta. Certe non dissimili exemplo Iulianus Pella-
gianus, cum de peccato originis quaestio versaretur, ad Orientales, id est, Græcos prouocabat Episcopos, quod apud eos quaestione nondum mota, non ita expressa huius dogmatis extare testimonia cōspiceret. Sed eum doctè refellit Augustinus libro 1. eorum quos aduersus eum conscripsit. Quo tamen de sententia orientalis Ecclesiæ circa mysterium prædestinationis & gratiæ Christi non relinquatur dubitandi locus, primo adscribemus verba Petri Diaconi, qui cum aliis quibusdam in causa fidei ex oriente Romam missus fuit circa annum Domini 500. in libello de incarnatione & gratia Christi hoc ipsum gratiæ Christi argumentum tractans, suæque & suorum fidei rationem exponens, inter alia ita scribit; *tunc etiam B. Basilus Casariensis Episcopus in oratione sacri altaris, quam pene vniuersus frequentat Oriens, inter cetera, dona, inquit, Domine virtutem ac tutamentum, malos, quæsumus, bonos facito, bonos in bonitate conserua. Omnia enim potes, & non est qui contradicat tibi. Cum enim volueris, saluas, & nullus resistit voluntati tuæ. Ecce quàm breuiter, quàmque succincte doctor egregius olim huic controuersie finem posuit docens per hanc precem, non à se ipsis, sed à Deo malos homines bonos fieri, nec suâ virtute, sed diuinæ gratiæ adiutorio in ipsa bonitate perseuerare. Haftenus ille. Quid autem aliud sibi volunt hæc Basilij verba, quàm prædestinari hominem absoluto decreto voluntatis Dei, & non ex præuisione operum? Quod autem pœne vniuersus Oriens in oratione sacri altaris frequentabat, hoc ipsum indubie etiam credebat. Quam fidem satis euidenter ipse quoque Chrysostomus hom. 12. in Epistolam priuam ad Cor. tractans illud Apostoli, *quid habes quod non accepisti*; & ante eum Gregorius Nazianzenus (præter locum ab Augustino citatum) Oratione in nouam dominicam. Iam vero quid hac de re senserit Augustinus vel le adhuc in dubium reuocare, profecto nimium est pugnaciter agere. Quamquam hoc ipsum quod ait Affer-*

Petrus diacon.
lib. de Incar.
& grat. c. 8.

Vide eundem
hom. 8 in 2.
ep. ad Tim.
& Dionys.
lib. de diuinis
nom. cap. 5.

tor, eam sententiam, quæ prædestinationem tradit ex præscientia, communiter dici sententiam Græcorum, satis eum monere debuerit de Augustini sententia. Nam si illa peculiariter sententia Græcorum vocatur; ergo diuersa sententia Latinorum est. Si autem Latinorum, ergo vel maxime Augustini, cuius inter Latinos in hoc argumento studium citra controuersiam excelluit. Quod ad extremum addit assertor, *non ndmodum referre, etsi contraria sit Augustini*, non diceret, si cum vniuersa Ecclesia agnosceret quàm tum alibi, tum maxime in hoc argumento de gratia & prædestinatione deferendum sit Augustino, vt pote gratiæ Christi contra hostes eius Pelagianos defensori præcipuo. Cuius hanc ipsam de gratia Christi doctrinam aduersus querelas presbyterorum quorundam Augustino, tanquam is necessarium in disputando modum excessisset, obloquentium, Celestinus Pontifex publico scripto commendare & approbare non dubitauit, *euidenter pronuncians*, inquit Prosper, *quam sibi istius presumptionis nouitas displiceret, quia auderent quidam aduersus antiquos magistros insolenter insurgere, & indisciplinata calumnia predicationi Veritatis obstrepere.* Quia tamen ipsi (vt idem Prosper scribit ad Ruffinum,) *non ignorabant Romanam, Africanamque Ecclesiam, & per omnes mundi partes vniuersos promissionis filios, cum doctrina illius tanti viri, sicut in tota fide, ita in confessione gratia congruere.* Quocirca rectissime in eadem epistola monet, Augustini libros legendos, *vt in consensenda Dei gratia defæcatissimam ac saluberrimam euangelicam atque Apostolicam doctrinam intelligentiam consequamur.* Cæterum, quod habet Assertio, Tridentinum Concilium dicere, cum conditione esse intelligendas promissiones diuinas, nusquam id dicit, neque sentit Concilium de hac promissione nouæ legis, de qua dictum est, *Dabo legem meam in visceribus eorum: & dabo vobis cor nouum: & faciam vt in præceptis meis ambuletis: & huiusmodi*, non quod cooperatio liberi arbitrij non requiratur, sed quod hanc cooperationem ipsa etiam diuina pro-

*Epistol. ad
Epis Gall.
Contra Col-
latorem in
fine.*

*Hierem 31.
Ezech. 36.*

Cap. 4.

missio comprehendit. Facit enim Deus per gratiam suam ut faciamus. Vnde de hoc promissionum genere apertissima est hæc Prosperi sententia libro primo de vocatione Gentium capite nono: *Manet prorsus, & quotidie impletur, quod Abr. ha. Dominus sine cōditione promissit. sine lege donauit: qui etsi quidam, quibus hæc predicata sunt, non crediderunt, incredulitas tamen eorum fidem Dei non euacuauit.*

ASSERTIO XXI.

Apocal. 3.

Deinde probatur alijs pluribus testimoniis: *Tene quod habes, ne alius accipiat coronam tuam.* Ergo corona potest amitti. Cui respondens Augustinus cap. 13. de correptione & gratia, scripturam ita loqui, non quod possit amitti, sed ut homines sint in timore.

CENSURA.

*Sic August.
de correptione
& gratia
cap. 13.*

Coronam amitti posse recte ostenditur illo loco Apocal. 3. Intelligitur enim de ea quæ debetur præsentis iustitiæ, non quæ electis est ab æterno præparata. Non enim potest mutari æternum decretum prædestinationis diuinæ. Recte tamen Augustinus etiam perseveraturis, & proinde electis, hoc dici quod est in Apocal. significat, non quia perseverantiæ donum semel acceptum amitti, aut electio mutari queat, sed *ut omnes qui bene currunt, timeant, dum occultum est quò perueniant.*

ASSERTIO XXII.

In statu innocentie sufficiebat homini ad salutem gratia, qua poterat perseverare si vellet: Ergo & nunc.

CENSURA.

Idem hoc volebant Massilienses, quibus non placuit discrimen illud gratiæ, quod inter hominem lapsum

& integrum posuerat Augustinus in libro de correptione & gratia capite 12. ut est in Epistola Hilarii ad Augustinum. Infirmiorem autem huius argumenti prospiciet, qui legerit caput 11. & 12. libri memorati. Certe bonum argumentum hoc ei videbitur fortè, qui status utriusque distantiam, & ortam ex peccato nostræ naturæ corruptionem non satis perpenderit. At non ita Sanctus Augustinus, cuius ut vnum ex multis testimonium ponamus, hæc apertissima verba sunt dicti operis cap. 12. *Primo homini, qui in eo bono, quo factus fuerat rectus, acceperat, posse non peccare, posse non mori, posse ipsum bonum non deserere, datum est adiutorium perseverantia, non quo fieret ut perseveraret, sed sine quo per liberum arbitrium perseverare non posset. Nunc vero sanctis in regnum Dei per gratiam predestinatis non tantum tale adiutorium perseverantia datur, sed tale, ut ipsi perseverantia ipsa donetur, non solum ut sine isto dono perseverantes esse non possint, verum etiam ut per hoc donum non nisi perseverantes sint.*

ASSERTIO XXIII.

Si electio est ad certum gloriæ gradum, igitur omnia opera iustorum debent absoluta Dei voluntate esse præordinata, nec poterunt aliter, nec aliud operari quam sit à Deo præordinatum: quod est contra libertatem.

CENSURA.

Bona iustorum opera, per quæ gloriæ & certum gloriæ gradum consequuntur, absoluta Dei voluntate esse præordinata non debet negari, quandoquidem sicut finem, id est, vitam æternam, ita & omnia media ad finem, cuiusmodi sunt opera bona, Deus æterno suæ prædestinationis decreto, nulla interposita conditione præiussi operis, electis suis præparavit, ut initio ostendimus, & aperta est Apostoli sententia, qua creatos nos esse dicit in operibus bonis, quæ præparavit Deus ut in ijs ambulemus. Ex qua doctrina nequaquam conse-

ad Epistolam 2.

quens est, iustos non posse aliter, nec aliud operari quam sit à Deo præordinatum, si verba hæc capiantur in sensu diuiso. Vnde nec vllò modo tollitur, aut minuitur per hanc absolutam & certissimam Dei prædestinationem humani libertas arbitrij, nihilo magis quàm diuini. Quis enim negauerit, Deum sua ipsius opera absolutâ voluntate præordinasse, velut mundi creationem & gubernationem? Et tamen fatendum est, iuxta Catholicam fidem, eum summa libertate operari quæcumque operatur. Nec verò noua hæc est à parte liberi arbitrij sumpta obiectio. Nam etiam Pelagiani gratiam & Massilienses ex libero arbitrio oppugnarunt. Et Faustus prætextu defendendi liberi arbitrij contra electorum prædestinationem disputauit. Quibus abunde ab Augustino, Prospero, & Fulgentio, alijsque respondum est. *Nimum verò inepte*, ait Prosper, *nimumque inconsiderate ab istis aduersantibus dicitur, quod per hanc Dei gratiam libero nihil relinquatur arbitrio*. Et infra: *Nunc autem idem arbitrium conuersum est, non euersum; & donatum est ei aliter sapere, aliter agere, & incolumitatem suam, non in se, sed in Medico collocare*. Proinde homo, qui in libero arbitrio fuit malus, in ipso libero arbitrio factus est bonus: sed per se malus, per Deum bonus, qui illum ita in initialem illum honorem alio initio reformauit, ut ei non solum culpam male voluntatis & actionis remitteret, sed etiam bene velle, bene agere, atque in his permanere donaret. Idem alibi libertatem quoad malum per gratiam in hac vita non tolli, sic breuiter ostendit: *Quia Deus ad obediendam sibi ipsum velle sic donat, ut etiam à perueraturus illam mutabilitatem, quæ potest nolle, non auferat*. Et Augustinus, ita, inquit, *sine gratia Christi non potest viuere, ut & mors ea in potestate sit liberi arbitrij*. Porro sicut verissime dictum est ab eodem Augustino, paucos esse qui valeant intellectu penetrare, quomodo Deus per gratiam homines attrahat, & nihilominus dimittat illos libero suo arbitrio; quem operationis diuinæ modum alibi *mirabilem & ineffabilem* vocat: ita pauci sunt, qui capere possint, quomodo Deus ea quæ sunt in tempore,

P. tr. Diaconus in fine libri de incar & Grat. Christi.

In Epist. ad Ruff. vide etiam Fulg. de incar. cap. 10.

Lib. 1. de vocatione gent. c. 18.

Tract. 21 in Ioan.

Lib. 2. contra lit. Petil. c. 24.

Li. de grat. Christi cap. 24 & de

ab æterno præordinauerit, nec tamen libertatem humanis actibus, nec contingentiam adimat cæteris quibuscúmque effectis.

grad. SS.
cap. 20.

ASSERTIO XXIV.

Martyria & afflictiones Sanctorum, quas patiuntur ab impijs, sunt excellentissima media salutis ipsorum: ergo etiam hæc ante omnem præuisionem erant præordinata: quod falsum est, quia Deus non erat author peccati.

CENSURA.

Ex eo quod Martyria & afflictiones Sanctorum, quas patiuntur ab impijs, ante omnem præuisionem dicantur præordinata à Deo, nullo modo consequens est Deum esse peccati authorem. Neque interest, ut author alicuius dicatur, utrum ante præuisionem, vel post, intelligatur id à Deo esse præordinatum. Excepto ergo peccato, omnia in Deum authorem referenda sunt, etiam passiones & mortes sanctorum. Nam Dominus mortificat & uiuificat: Ex, *vita & mors à Deo sunt, & si factum est nihil.* erit malum in ciuitate, quod non fecerit Dominus. Vnde Augustinus in lib. 83. quæstionum q. 21. Deus, inquit, omnium que sunt author est que in quantum sunt, bona sunt. Et Anselmus in libro de concordia prædestinationis & præscientiæ, *Omnis qualitas & omnis actio, & quidquid habet aliquam essentiam, à Deo est, à quo est omnis iustitia, & nulla iniustitia. Facit igitur omnia Deus, que iusta, vel iniusta voluntati sunt, id est bona opera & mala. In bonis quidem facit quod sunt, & quod bona sunt: in malis quod sunt, sed non quod mala sunt, & quæ sequuntur.* Quibus plane consentanea scribit inter hodiernos R. P. Franciscus Costerus ex Societate Nominis Iesu Theologus in Enchiridio suo Controuersiarum. Speciatim autem de traditione Christi in mortem, eiusque & Martyrum passioni-

Aug tra-
cta 1. in
Ioan ad il-
lud. sine ipso
factum est
nihil.

1. reg. 1.
Eccles 11.
Amos 3.

Parte 1. sub
fine.

De lib. arbitrii
ad 1 obie-
ctionem.
Vide &
Bonauent.
in Dist. 37.

Vide & August. in Psal. 63. & tract 7. in Ioan. & Leon. serm. 1. de Epiph. Domini.

Faust. 2. de
lib. arb. c. 3

bus similia tradit Augustinus, scribens in Psal 93. Notandum autem, simili fere argumento Faustum olim conatum ostendere, quod non ex sola Dei destinatione parvuli, quos Herodes occidit, tam beatam mortem fuerint consecuti.

ASSERTIO XXV.

Ezech. 36.

Ad illud Ezechielis, *Faciam ut in præceptis meis ambuletis*, &c. Dico ibi significari Deum daturum abundantiorē gratiam in noua lege, quā in veteri; qua fiet ut re ipsa plures ambulent in lege Dei, quam in lege veteri. Non ergo illud, *faciam ut ambuletis*, significat illum prouidentiam modum per quem omnes infallibiliter seruarent præceptum Dei.

CENSURA.

Ad Heb. 7.
ad Gal. 3.
c. 3.
2. Cor. 3.

Noua & non ferenda interpretatio. Manifeste enim continet hæc scriptura promissionem nouæ legis, sicut & illa Hierem. 35. *Dabo legem meam*, &c. Discrimen autem inter legem veterem & nouam perse, non in eo est, quod sub veteri pauciores, sub noua verò plures ambulent in lege Dei (accidit enim legi veteri quod sub ea aliqui ambulent in lege Domini, quandoquidem nihil ad perfectum adducit lex, neque ex lege iustitia) sed quod lex vetus tantum in tabulis scripta fuerit, lex noua in cordibus scribatur. Vnde dicitur eodem loco apud Prophetam, *Auferam à vobis cor lapideum, & dabo vobis cor carneum*. Hæc Prophetæ mens est, iuxta B. Augustini & aliorum Patrum fidelem & constantem interpretationem. Quorum vnus Fulgentius: *Quid est*, inquit, *faciam ut faciatis, nisi mei erit operis omne bonum quod operati fueritis? Ipse ergo facit ut faciamus, quo in nobis operante sit omne bonum quod facimus*. Sic Fulgent. Quod autem ex sua interpretatione concludit assertor, *Non ergo illud, faciam ut ambuletis, significat illum prouidentiam modum*

Lib. 1. ad
Monim. cap.
14.

dum, per quem omnes, (hoc est, ad quos illa promissio pertinet) infallibiliter servarent praeceptum Dei, multum fallitur. Quod enim promisit Deus se facturum, infallibiliter fiet: atque, ut Prosper ait, tractans locum Hierem. 31. Deus electos suos credituros promisit, perseveraturos promisit. Fient ergo hac infallibiliter, & quidem ab eo qui promisit, qui hac omnia in electis suis operatur.

*Lib. 1. de
Vocat gent.
cap. 9.*

ASSERTIO XXVI.

Non est voluntas absoluta Patris, ut omnes, quos ipse dat filio, absolute saluentur; ut patet Ioannis 17. ubi dicit quod ex illis quos dedit illi Pater, perierit filius perditionis, qui seipsum perdere voluit. Sed voluntas Patris est, ut omnes habeant sufficientia auxilia, & non stet per ipsum quominus saluentur.

CENSURA.

Ex ignorantia Phrasis Scripturæ procedit hæc obiectio. Non enim sensus est, ex ijs qui dati sunt vnum perijisse; sed potius hoc sermone significatum est, eum qui periit, datum non esse. Ita 4. Reg. 5. dicit Naaman Syrus ad Elizæum, *Non faciet servus tuus holocaustum aut victimam dijs alienis, nisi Domino*, id est, sed tantum Domino; qui utique dijs alienis non erat connumerandus. Sic Math. 12. *quos non licebat ei (David scilicet) edere, neque his quicum eo erant, nisi solis Sacerdotibus.* Item Actor. 24. *Si quid inuenerint in me iniquitatis, nisi de vna hac voce,* &c. Et ad Gal. 2. *Non iustificatur homo ex operibus legis, nisi per fidem Iesu Christi.* Et Apocal. 21. *Non intrabis aliquid in eum coinquinatum, aut abominationem faciens & mendacium, nisi qui scripti sunt in libro vitæ agni.* Certe alia loca satis ostendunt, absolute & sine exemptione hunc locum intelligi debere, ut Ioannis 6. *omne quod dat mihi Pater, ad me veniet.* Et rursus, *Hæc est voluntas eius, qui misit me, patris, ut omne quod dedit mihi, non perdam ex eo.* Ac de-

inique c. 18. id quod c. 17. dictum ab Evangelista, repetitur, nulla vel specie exceptionis addita: *Vt impleretur sermo quem dixit, quia quos dedisti mihi, non peridi ex ijs quemquam.* Non enim, ut ait Augustinus, *perijt filius promissionis, sed filius perditionis. Hi ergo Christo intelliguntur dati, qui ordinati sunt in vitam eternam. Ipsi sunt illi predestinati, & secundum propositum vocati. Quorum nullus perit, ac per hoc nullus eorum ex bono in malum mutatus finit hanc vitam, quandoquidem sic est ordinatus, & idcirco Christo datus, ut non pereat, sed habeat vitam eternam.* Et idem alibi, *Ex predestinatis & electis nemo perit, quacunque state moriatur. Absit enim, ut predestinatus ad vitam sine Sacramento mediatoris finire permittatur hanc vitam. Propter hoc Dominus ait: hec est autem voluntas eius, qui misit me, Patris, ut omne quod dedisti mihi, non perdam ex eo.* Sic Augustinus. Mirum autem in his Assertionibus tam leuia & futilia, & nonnulla pene puerilia argumenta pro serijs & ponderosis afferri, quæ probatissimæ fundatissimæque summis ac grauissimis de rebus doctrinæ B. Augustini opponantur, & improbabilibus, ut ne dicam periculosis opinionibus locum faciant, & firmamentum addant.

ASSERTIO XXVII.

Rom. 8.

Hæc Sententia Apostoli: *Omnia cooperantur in bonum his qui secundum propositum vocati sunt Sancti*, loquitur in genere de omnibus diligentibus Deum, non autem tantum de illis qui erant prædestinati.

CENSURĀ.

cap. 9:

Ex toto contextu Apostoli perspicuum est, eum de electis loqui. Augustinus quoque vocatos secundum propositum non alios intelligit, quam prædestinatos; de quibus ita scribit in lib. de correptione & gratia: *Talibus Deus, diligentibus eum, omnia cooperatur in bonum: usque adeo prorsus omnia, ut etiam si qui eorum decuant, atque exor-*

bitant, etiam hoc ipsum ijs faciat proficere in bonum, quia humiliores redeunt atque doctiores. Quæ eadem ex Augustino verba Venerabilis Beda dicti loci Apostoli commentarium fecit, vt & post eum B. Anselmus. Hæc autem de reprobis, Deum ad tempus diligentibus, dici non posse perspicuum est. Vnde rursus eodem loco Augustinus, Sciens Apostolus nonnullos diligere Deum, & in eo bono non permanere vsque ad finem, mox addidit, his qui secundum propositum Dei vocati sunt. Illi enim in eo quod diligunt, permanent vsque in finem; & qui ad tempus inde deniunt, reuertantur vt vsque in finem perducant, quod in bono esse ceperunt. Constans vero est in hac expositione D. Augustinus, vt patet operis citati cap. 7. lib. 2. contra duas Epistolas Pelag. cap. 2. & alibi.

*Vide soli
log. cap. 28.*

ASSERTIO XXVIII.

In his verbis, *Iacob dilexi, Esau autem odio habui*, per dilectionem non significatur efficax ordinatio ad gloriam, sed ad maiora dona gratiæ, quæ non erant ex præiudiciis meritis. Quia enim ex Iacob nasciturus erat Christus, voluit illi Deus & eius posteritati maxima signa dilectionis ostendere, quæ non ostendit fratri eius Esau; ita vt comparatione Iacob & populi Israelitici, Esau & Idumæi possint videri odio habiti.

Ad Rom. 9.

CENSURA.

Manifestum est, Apostolum Prophetæ testimonium adducere, vt ostendat non ex præiudiciis operibus, sed ex solo suæ voluntatis beneplacito Deum alios præ aliis ad salutem elegisse. Id quod verba eius perspicue doceant. Cum enim, inquit, *nondum nati fuissent, aut aliquid boni egissent, aut mali, vt secundum electionem propositum Dei maneret, non ex operibus, sed ex vocante dictum est ei, quia maior seruiet minori; sicut scriptum est, Iacob dilexi, Esau autem odio habui.* Et mox: *igitur non volentis, neque curren-*

tis, sed misereris est Dei. Et rursum, Ergo cuius vult, miseretur: & quem vult, indurat. Quod probat subiecta figuli comparatione: An non habet potestatem figulus luti ex eadem massa facere aliud quidem vas in honorem; aliud verò in contumeliā? Hunc autem sensum verborum Apostoli non vno loco tradit Augustinus, qui eadem illa verba tractans in Enchir. sic ait; Quia in re si futura opera, vel bona huius, vel mala illius que Deus utique praeſciebat, vellet intelligi, nequaquam diceret, non ex operibus; sed diceret, ex futuris operibus, eoque modo istam solveret quaestionem. Idem retractans libros ad Simplician. in quorum priore hunc totum Apostoli locum, qui est de vocatione secundum propositum, exposuerat; In eius, inquit, quaestione solutione laboratum est quidem pro libero arbitrio voluntatis humanae, sed vicis Dei gratia: nec nisi ad illud potuit perveniri, ut liquidissima veritate dixisset intelligatur Apostolus, quis te discernit? quid habes, quod non accepisti? Si autem acceperis, quid gloriaris quasi non acceperis? Quod volens etiam martyr Cyprianus ostendere, hoc totum ipso titulo definiuit, dicens, in nulla gloriandum, quia nostrum nihil est. Sic Augustinus, apud quem videre quoque est dicti loci Apostolici exactam tractationem, in Epistola ad Sixtum Romanæ Ecclesiæ tunc presbyterum, postea Pontificem. Porro notandum; quod eundem hunc locum Faustus etiam lib. 1. de libero arbit. capite 6. dum gratuita prædestinationis doctrinam obſcurare, imò euertere nititur, aliò prorsus violentè detorsit, sensum afferens ex diametro cum scopo Pauli pugnantem.

ASSERTIO XXIX.

Si Deus, præiūso originali peccato, absoluta voluntate constituit hunc hominem excludere à regno, vel admittere ad regnum, ante omnem præiūſionem operum: ergo nullis operibus bonis, vel malis poterit auerti quod decretum est. Nam hæc suppositio diuinæ voluntatis facta est independenter à voluntate humana:

Cap. 98.

Epist. 103. ad Sixt.

Lib. 1. de lib. arbit. c. 6.

ergo absolute necessarium est, hominem damnari, posito quod Deus illum reprobauerit, & speciali providentia procurare debbit ut in peccatis moriatur.

C E N S U R A.

Distinguendum est inter prædestinationem, & eius executionem. Vnde quamvis in diuina prædestinatione prior sit gloria quam actus humani arbitrij, ideoque præordinatio gloriæ facta sit independenter à libertate humana: in executione tamen actus humani arbitrij prior est gloria: quæ proinde ab illo dependet, iuxta illud: *si vis ad vitam ingredi, serva mandata*. Sed tamen hoc ipsum quod est servare mandata, cum sit homini eadem prædestinatione à Deo præparatum ac prouisum, ut medium ad salutem, non sit à libero arbitrio, nisi eo operante, qui fecit in tempore quidquid præordinavit ab æterno. Reprobatio verò fit propter præuisum peccatum: quod quia per se sit sufficiens medium ad damnationem, non hic quaeri debet specialis Dei providentia, qua tale medium procuretur. At tamen non erit consequens, etiamsi salus aut damnatio hominis quoad executionem non dependeret ab eius voluntate, ob id absoluta necessitate euenturam. Cuiusmodi consequentiae vitium manifeste patet in parvulis.

A S S E R T I O X X X .

Numerus prædestinationis non est certus ex præordinatione quæ antecedit omnem præscientiam operum.

C E N S U R A.

Certum esse apud Deum numerum prædestinatorum neque ait, neque negat assertor. Quod autem certum sit ex præordinatione omnem præscientiam operum antecedente satis initio, quantum censuræ breuitas pati-

tur ostendimus: Et vero quid aliud quàm ex mera Dei præordinatione & voluntate pendere certitudinem numeri electorum (cui nec addi quisquam possit, nec auferri) significant hæc & similes Scripturæ ; *ut in errorem inducantur, si fieri potest, electi.* Omne quod dat mihi Pater, ad me veniet. Hæc est voluntas Patris, ut omne quod dedit mihi non perdam ex eo. Et rursum, Nemo potest venire ad me, nisi Pater, qui misit me, traxerit eum. Et infra, Propterea dixi vobis, quia nemo potest venire ad me, nisi fuerit ei datum à Patre meo. Item, Oves meas nemo potest rapere de manu Patris mei. Et, vos non creditis, quia non estis ex ovibus meis. Et alibi, Non pro mundo rogo, sed pro his quos dedisti mihi, quia tui sunt. Et apud Apostolum, si Deus est pro nobis, quis contra nos? Quis accusabit adversus electos Dei? Certus sum quia neque mors, neque vita, poterit nos separare à Charitate Dei. Et alio loco, firmum fundamentum Dei stat; habens signaculum hoc, cognovit Dominus qui sunt eius. Certitudinis igitur huius ratio est, non in præscientia operis humani, sed in decreto & in promissione divina; quæ quæcumque Deus absolute decrevit & promisit, potens est & facere, & certissime faciet. Vnde illa est aperta Augustini sententia: *quoniam immutabilia sunt diuina promissa, ideo prædestinatorum neminem perire posse.* Quocirca non potest non peregrina, atque à Scripturarum & sanctorum Patrum, Augustini maxime, sensu aliena iudicari hæc doctrina, quæ prædestinationem eiusque certitudinem pendere vult ex operum prævisione. Quam doctrinam, sicut & illam de sufficienti, quod omnibus adsit, auxilio, continent quidem apertissimè duo libri, quos Faustus edidit quondam de libero arbitrio. Vbi inter alia multa legitur illud huic assertioni plane congruens; *Nisi præscientia exploraverit, prædestinatio nihil decernit.* Sed eos libros, ut sanæ doctrinæ contrarios, anathematizarunt olim Orientales, à quibus in causa fidei Romam missus fuerat Petrus Diaconus; & cum alijs eiusdem authoris reprobavit Gelasius Pontifex. Eosdem refutavit B. Fulgentius in eo opere, de quo Isido-

Matt. 24.

Ioan. 6.

Ioannis 10.

Ioannis 17.

Rom 8.

2. Tim. 2.

Lib 18 de
ciuitate Dei
cap. 51.

Lib. 1. c. 3.

Petrus Dia-
conus in fin.
lib. de incar.
& Grat.
Christi.
Cap 5. Rom.
Ecclesia.

rus; Legimus, inquit, eius de gratia & libero arbitrio libros
 responsonum septem, in quibus Fausto Gallie Regiensis vrbis Epi-
 scopo Pelagiana prauitati consentienti respondens, obnititur eius
 profundam destruere calliditatem. De quo & in vita eius sic
 legitur, duobus libris, quos Faustus Galliarum subdolo sermone
 composuit, fauens occulte Pelagianis, sed Catholicus tamen vo-
 lens videri, ne occultum serperet virus, septem libris ipse respon-
 dit, plus laborans exponere, quàm conuincere, quia dubios eius
 sermone exponere, hoc erat delirantis argumenta conuincere.
 Schismaticum autem & hæreticum simul authoris Spi-
 ritum indicat Epistola operi præfixa ad Lucidum Pres-
 byterum, in cuius statim initio *summos Antistites*, id est,
 Romanos Pontifices taxat, quasi magis à bonitate suspen-
 dere, quàm curare velint errantes. Quare etiam atque etiam
 videant, qui nouas istiusmodi Assertiones proferunt,
 quosnam & quales suæ doctrinæ patronos venerentur.
 Nam in illis duobus Fausti libris tota fere harum Asser-
 tionum doctrina ex professo traditur ac defenditur.
 Imposuit quidem nonnullis, etiam hoc sæculo, viris
 doctis Fausti profunda calliditas: sed id priusquam eis,
 quis & qualis fuerit Faustus, innotesceret, Et visa fuit
 Erasmo, P. ghio Catharino ad conciliandum cum gra-
 tia liberum arbitrium commodissima via, quam Faustus
 commonstrat sed horum vel authoritas, vel doctrina,
 quanti in hoc genere sit facienda, non est obscurum:
 quia & alibi non leuiter impegerunt.

De viris il-
 lus. ca. cap.
 13.

201

Cap. 16.

Vide etiam
 Ioan. Ma-
 xentium in
 resp. sua pro
 Monachis
 cap. 18. Vbi
 libris illos
 Fausti hæ-
 reticos pro-
 nunciat. Et
 Adonem in
 Chronico ad
 annū 492.
 Et Vincent.
 in speculo
 historiali
 lib. 20.
 cap. 106.
 Et Six-
 tum. Senen-
 sem 6. bi-
 blioth. sac.
 annot. 251.
 vbi dicit
 Faustum ra-
 tione nomina
 scripsisse
 contra Au-
 gust.

ASSERTIO XXXI.

Quæ totius materie conclusio dicitur.

Hæc sententia de prædestinatione & reprobatione,
 maxime consentanea est diuinæ bonitati, scripturarum
 authoritati, Patrum testimoniis, & naturalis rationis
 æquitati, in nulla re omnino Pelagio fauens, & quam
 longissime à sententia Lutheri, & Caluini, & reliquo-
 rum hæreticorum nostræ tempestatis recedens, à quo

rum sententia & argumentis difficile est alteram sententiam vindicare.

Maxime est consentanea divina bonitati.

CENSURA.

Hoc quidem prima facie videri cuipiam potest, sed penitus rem consideranti contrarium magis apparet, videlicet hac doctrina bonitatem Dei multipliciter obscurari. Primum, quia sub occasionem sufficientis auxilij, quod omnibus, etiam induratis & excecatis semper & vbique adesse fingitur, gratiæ illius Christi, quæ propria est bonis, & doni perseverantiæ, quod proprium est electis, dignitas grauitur læditur & minuitur. Deinde quia per eam excellentissimum & potentissimum diuinæ bonitatis opus, quod est peccatoris conuersio, non nisi secundum auxilium illud omnibus commune, & nonnullas forte præuias excitationes, Deo tribuitur authori: sic vt actualis ipsa, quæ fit in voluntate, mutatio, non sit dextræ Excelsi, sed liberi tantum arbitrij. Tertiò, quia orationes, laudes, gratiarum actiones, quibus maxime Dei erga nos bonitas agnoscitur & commendatur, magna ex parte euacuat atque euertit, docens hominem bonam, qua coram Deo iustificetur ac saluetur, voluntatem à se ipso potissimè sperare, sibi gratiam habere, in se ipso gloriari. Postremo, quia cum è tanto numero infidelium, quibus Euangelium non fuit annunciatum, non nisi paucissimos, aut vix vltimos, per solum hoc, quod vocatur, sufficiens auxilium ad iustitiam & salutem dici queat peruenire: sequitur, illius occasione grauiorem omnes eos qui non saluantur incurrere damnationem, propterea quod auxilio sufficienti oblato atque concesso non fuerint vsi qui profecto minus punirentur, si tale auxilium nunquam habuissent. Qua in re non iam bonitas Dei, sed magna seueritas apparet.

Scripturarum auctoritati.

Imò Scripturas in alienos, ineptos, Patribus incognitos, & Catholicæ doctrinæ parum consentaneos sensus detorquet.

Patrum testimonijs.

Imò Patrum testimonijs, illorum maxime qui contra Pelagianos atque eorum reliquias de gratia & prædestinatione clarius & accuratius scripserunt, admodum dissentanea est.

Naturalis rationis æquitatis.

Fallit humana ratio, si non auctoritate diuina fulciatur; eadēque Pelagium sefellit; & huius sæculi Philosophis persuasit, vt dicerent se esse sapientes, & quoniam negare non poterant se non à se ipsis factos homines, crederent saltem ac dicerent se à seipsis, non autem à Deo, fieri bonos. Sic enim Philosophus & orator Romanus quasi communi Philosophorum ore; *virtutem, inquit, nemo unquam Deo acceptam retulit. Nimirum recte. Propter virtutem enim iure laudamur, & in virtute recte gloriamur. Quod non contingeret, si id donum à Deo, non à nobis haberemus.* En rationem humanam. Et mox; *Num quis, quod bonus vir esses, gratias dñs egit unquam? At quod diues, quod honoratus, quod incolumis. Iouemque optimum maximum ob eas res appellant, non quod nos iustos, temperantes, sapientes efficiat, sed quod saluos, incolumes, opulentos.* Et iterum; *iudicium hoc omnium mortalium est, fortunam à Deo petendam, à se ipso sumendam esse sapientiam.* Sic Isocrates Philosophus & Orator Græcus præstantissimus, *Quod à Deo datur, esse bonam fortunam dixit; quod à nobis ipsis, bonum consilium.* Sic & moralis ille Poëta cecinit;

*Sed satis est orare Iouem, qui donat & auferi,
des vitam, des opes, æquum mi animum ipse parabo.*

*Ad Rom. 1.
August.
serm. 11. de
verbis A-
post. & serm.
13. de verbis
Domini.*

*Cic lib. 3.
de natura
Deorum.*

*In oratione
ad Demonic.*

*Horatius in
Epistola ad
Lellium.*

En quod persuadet, & quò perducit humana ratio lumine fidei destituta. Quare mirum non est, si & secretum illud gratuite prædestinationis diuinæ mysterium eidem corruptæ rationi humanæ videatur iniquum. De quo Philosophus si interrogaretur, non aliud ex sua Philosophia responderet, quam prædestinari à Deo debuisse ad fælicitatem eos, quos bene iustèque per suum liberum arbitrium victuros prævidisset tantum, non etiam præordinasset; ac prædestinationis illius causam hanc esse præuisionem; ita enim naturalis rationis æquitatem postulare. Verum huic corruptæ rationis æquitati ex aduerso restitit Paulus in-

Rom 9. &
11.

quens; *Nunquid iniquitas est apud Deum? O homo, tu quis es, qui respondens Deo? nunquid dicit figmentum ei qui se finxit, quid me fecisti sic? Et alibi; O altitudo diuinitarum sapientia & scientia Dei, quàm incomprehensibilia sunt iudicia eius, & inuestigabiles via eius! Quis enim cognouit sensum Domini, aut quis consiliarius eius fuit? aut quis prior dedit illi & retribuetur ei? Resistit & cælestis Pater familias in Euangelio, cùm ait cuidam; Amice, non facio tibi iniuriam: an non licet mihi quod volo, facere? An oculus tuus nequam est, quia ego bonus sum? Sicut enim in diuersa causa non fuit iniquum idem iudicium; sic nec in vna atque eadem causa iniquum est iudicium tam diuersum, vt vnus assumatur, alter relinquatur; vnus misericorditer liberetur, alius iuste damnatur.*

August. de
dono perse-
uer. ca. 8 &
Pros. lib. 1.
de vocatione
gentium cap.
17.

In nulla re omnino Pelagius fauens.

Celestinus
Papa in epi-
stola ad Epis-
Gallicæ 3.

Imò sane metuendum ne harum assertionum parens cum Massiliensibus & Fausto (quibuscum adeò multa sunt ei communia) quomodo Pelagium anathematizare non dubitet, damnatis tamen eius sensibus plus satis appropinquet.

Longissime à sententia Lutheri & Caluini, &c.

Et olim Pelagiani quam longissime à Manichæis re-

cedere voluerunt, & à Sabellianis Ariani, & à Nestorianis Eutychiani, ac Monothelitæ. Sic videlicet dum *visant scilicet vitia, in contraria currunt*: cum potius audient dum esset illud Hilarij, *Ne damnemus Patres, ne annuamus hæreticis, ne, dum hæresim expellimus, hæresim nutriamus.*

In fine libri
de Synod.

A quorum sententijs & argumentis, &c.

Si beati Augustini de gratia & prædestinatione sententia in eam vocetur suspicionem, quasi doctrinæ Lutheri, & Caluini, & reliquorum nostræ tempestatis hæreticorum fauceat, aut certè difficile sit etiam doctis ab illorum sententia & argumentis eius doctrinam vindicare: non ergo recte Augustinum tanquam *clarissimum & præcipuum Ecclesiæ lumen*, eundemque *gratiæ Christi præcipuum atque optimum defensorem*, semper venerata est atque etiam nunc veneratur Ecclesiæ. Quin potius si ita res habeat, ab eius librorum lectione, tanquam periculosa, procul arceri deberent fideles. Ita enim Massilienses olim de eius opusculis quibusdam, ut apud Prosperum est, ^a verè sentiebant. Sed si indignum & prorsus intolerabile est de tanto doctore, præsertim post tam illustri sedis Apostolicæ de eo ac totius Ecclesiæ testimonia, ^b tam male suspicari: videatur etiam atque etiam quo loco sint habendæ, quæ ab eius probatissima doctrina tam longe dissident, assertiones. Illud etiam cogitetur, non semper veritati vicinius esse, quod est in doctrina facilius. Alioquin enim in mysterio Sacrosanctæ Trinitatis Arius, vel Sabellius: & in mysterio Incarnationis Nestorius: & in mysterio Sacri altaris explicatio Berengarius, Zuinglius, Calvinus, nobis potius sequendi essent, quàm Ecclesiæ Christi catholica. Sane difficultatem in materia gratiæ & prædestinationis semper Patres agnouerunt, eamque *vix paucis penetrabilem*. ^c Quæ tamen ab ipsis, dum contra Pelagium, eiusque sequaces Scriberent, Deo iuvante, non indocte, neque infelicitè, cum restulit, explicata est. Quod si ergo putat hu-

Rom. brev.
in Ambros.
Es Sixtus V.
Papa in Bul.
la contra Ge-
næb edita.

a Cōtra Col-
lator in prin-
cipi, & in fi-
ne, & in epis.
ad Russ. &
præfatione
ad capitula
Gallorū, &
responsione
ultima ad
excerpta Ge-
nuen.

b Cælestino in
epis. ad Epi-
scopos Gal.
Gregor lib.
8. epis. 37.
Hieron in
epis. ad Au-
gust. qua in-
cipit, *Omni
quidem tem-
pore.*

c Aug. 2 cōs-
tit. Petili c.
24 de Grat.
Christic. 24

¶ 47. lib. 4.
contra tul. c.
8. lib. 2. de
pecc. meritis
c. 18. de pra-
dest. sanct. c.
8. & 10.

ius nouitiae doctrinae Assertor, vel quisquis similia cum ipso sapit, se rationem inuenisse, qua adeò facilè & ad captum multitudinis possit hæc gratiæ cum libero arbitrio concordia explicari, vel inde intelligat quàm non eadem doctrinae viâ cum illis in hoc gratiæ & prædestinationis mysterio tradendo procedat.

*De mandato Decani & Magistrorum Faculta-
tis sacrae Theologiae Vniuersitatis Duacensis sub-
scripsi Donatus Banfoit eiusdem Facultatis
sacrae Theologiae Bedellus & Notarius pu-
blicus. Anno millesimo quingentesimo octua-
gesimo octauo Ianuarij die vigesima.*

*Subsignatum D. Banfoit Notarius publicus &
Sacrae Facultatis Theologiae Bedellus.*

ERRATA SIC CORRIGE.

- Pag. 5. linea 29. nullo lege vilo.*
p. 19. l. 8. tenarent. lege tentarent.
*p. 25. l. 11. pręparari. Idque iusto iudicio fieri, proprie pone (,) post prę-
parari, & (.) post fieri.*
p. 31. l. 5. videlicet. l. videlicet.
p. 51. l. 27. quando. l. cum.
p. 67. l. 14. cum commutat affectum roborat, appone virgulam post affectum;
p. 77. l. 31. precando. l. peccando.
p. 94. l. 7. dum absoluta l. dum de absoluta.
p. 97. l. 2. quæ erat gratia. l. quæ est ad gratiam.
Ibid. l. 14. hæc l. hanc.
p. 101. l. 10. respondens l. responder.



FIVE